

gu'r còmh-nadh anns an t-saoghal so, chum a's gu'm mair sinn beò gu siorruidh maille riut-sa 's an t-saoghal a tha ri teachd, trid Iosa Crìosd ar Tighearna. *Amen.*

¶ *An sin their an sluagh na briathran a leanas, an déigh a' Mhinisteir.*

Pill sinn, O 'dheadh Thighearna, agus bithidh sinn air ar pilleadh. Bi fàbharach, O 'Thighearna, bi fàbharach ri d' shluagh, A tha 'pilleadh a d' ionnsuidh le gul, le traisg, agus le urnuigh. Oir tha thu a' d' Dhia tròc-
aircach, Làn de dh' iochd, Fad-fhulangach, agus mòr-thruacanta. Tha thu 'g ar caomhnadh an uair a tha sinn a' toilltinn peanais, Agus ann ad chorruch tha thu 'smuainteachadh air tròcair. Caomhain do shluagh, a dheadh Thighearna, caomhain iad, Agus na leig le d' oighreachd a bhi air a toirt gu masladh. Eisd ruinn, O 'Thighearna, oir is mòr do thròcair, Agus a réir lìon-mhorachd do thròcairean amhaire oirnn, Tre dheadh-thoillteanais ar n-Eadar-mheadhonair do Mhic bheannaichte Iosa Crìosd ar Tighearna. *Amen.*

¶ *An sin their am Ministeir 'n a aonar,*

Gu'm beannaicheadh an Tighearn sinn, agus gu'n gleidheadh e sinn; gu'n togadh an Tighearn suas solus a ghnùis oirnn, agus gu'n tugadh e sìth dhuinn a nis agus gu siorruidh. *Amen.*

SAILM DHAIBHIDH.

URNUIGH MHAIDNE.

A Cheud Shalm.

Beatus vir, qui non abiit.

IS beannaichte an duine sin nach gluais ann an comhairle nan aingidh, agus nach seas ann an slighe nam peacach : agus nach suidh ann an caithir luchd-fanoid.

2 Ach aig am bheil tlachd ann an lagh an Tighearn' : agus a smuainicheas air a lagh-san a là agus a dh'oidhche.

3 Bithidh e mar chraoibh suidhichte làimh ri sruthaibh uisge : a bheir a mach a toradh 'n a h-aimsir.

4 Agus nach caill a duilleach : agus soirbhichidh leis gach ni a ni e.

5 Cha-n ann mar sin a bhitheas na h-aingidh : ach mar mhol a sgapas a' ghaoth.

6 Air an aobhar sin cha seas na h-aingidh ann am breitheanas : no peacaich ann an coimh-thional nam firean.

7 Oir is aithne do an Tighearn slighe nam firean : ach sgrìosar slighe nan aingidh.

An ii. Salm.

Quare fremuerunt gentes ?

C'Ar son a ghabh na cinnich boile : agus a smuainich na sldigh ni dlomhain ?

2 Car son a dh'éirich rìghrean na talmhainn, agus a ghabh na h-uachdarain comhairle le 'chéile : an aghaidh an Tighearn', agus an aghaidh 'aoin ungtas, ag radh,

3 Briseamaid o 'chéile an cuibhreach : agus tilgeamaid dhinn an cuing ?

4 An ti a tha 'n a shuidhe air nèamh, ni e gàire : ni an Tighearn fanoid orra.

5 An sin labhraidh e riu 'n a fheirg : agus 'n a chorruidh cuiridh e uamhann orra.

6 Gidheadh dh'ung mise mo rìgh : air Sion, mo shliabh naomh-sa.

7 Cuiridh mi 'an céill ordugh an Tighearna ; thubhairt e rium : Is tu mo Mhac-sa, an diugh ghin mi thu.

8 Iarr orm, agus bheir mi dhuit na cinnich mar oighreachd : agus crìocha na talmhainn mar sheilbh.

9 Brisidh tu iad le slait iarunn : mar shoith-each creadhadair, pronnaidh tu iad 'n am bloighdibh.

10 A nis ma ta, a rìghre, bithibh glic : gabhaibh fòghlum, a bhreitheamhna na talmhainn.

11 Deanaibh seirbhis do an Tighearn le eagal : agus deanaibh gairdeachas le ball-chrith.

12 Pògaibh am Mac, air eagal gu'm bi fearg air, agus gu'n sgriosar sibh 's an t-slighe : 'n uair a lasas (ach gu beag) a chorruidh ; is beannaichte iadsan uile a dh'earbas as.

An iii. Salm.

Domine, quid multiplicati ?

A Tighearna, nach lìonmhor a dh'fhàs mo naimhdean : is iomadh iad a tha 'g éirigh a'm' aghaidh.

2 Is iomadh iad a their ri m' anam : nach 'eil furtachd aige ann an Dia.

3 Ach tha thusa, a Thighearn', a'd' sgéith dhomh-sa : mo ghlòir, agus fear-togail mo chinn.

4 Le m' ghuth dh' éigh mi ris an Tighearn : agus dh' éisd e rium as a shliabh naomh.

5 Luidh mi sìos, agus choidil mi ; dhùisg mi : oir chum an Tighearn suas mi.

6 Cha-n eagal leam deich mìle sluaigh : a chuir iad féin a'm' aghaidh air gach taobh.

7 Eirich, a Thighearna ; saor mi, O mo Dhia : oir bhuaill thu mo naimhdean uile air an gial ; bhris thu fiacla nan aingidh.

8 Is leis an Tighearn an fhurtachd : air do shluagh tha do bheannachd.

An iv. Salm.

Cum invocarem.

AN uair a dh' éigheas mi, éisd rium, a Dhé m' ionracais : an uair a bha mi ann an teinn, dh' fhuasgail thu orm ; dean tròcair orm, agus éisd ri m' urnuigh.

2 A chlann nan daoine, cia fhad a thionndaidheas sibh mo ghlòir chum nàire : a ghràdh-aicheas sibh dìomhanas, a shireas sibh an déigh bhreug ?

3 Ach bitheadh fios agaibh, gu'n do ròghnuich an Tighearn an duine naomh dha féin : éisdidh an Tighearn, an uair a dh' éigheas mi ris.

4 Bitheadh eagal oirbh, agus na peacaichibh : labhraibh r'ur cridhe, air 'ur leabaidh, agus bithibh tosdach.

5 Iobraibh ìobairtean ionracais : agus earb-aibh as an Tighearn.

6 Tha mòran ag ràdh: Cò nochdas dhuinn ni maith?

7 Tog oirne solus do ghnùise: a Thighearna.

8 Chuir thu aoibhneas ann am chridhe: na's mò na 'n uair is pailte an arbhar agus am fion-san.

9 Ann an sìth araon luidhidh mi, agus coidlidh mi: oir is tusa mhàin, a Thighearn', a bheir orm còmhnuidh 'ghabhail gu tèaruinte.

An v. Salm.

Verba mea auribus.

RI m' bhriathraibh éisd, a Thighearna: beachdaich air mo smuaintibh.

2 Thoir an aire do ghuth mo ghlaoidh, mo Rìgh, agus mo Dhia: oir riut-sa ni mi urnuigh.

3 A Thighearn', air maduinn cluinnidh tu mo ghuth: air maduinn deasaichidh mi mi féin a'd' làthair, agus amhaircidh mi suas.

4 Oir cha Dia thusa aig am bheil tlachd ann an aingidheachd: agus cha chòmhnuich an t-aingidh maille riut.

5 Cha seas na h-amadain a'd' làthair: is fuath leat luchd-deanamh an uile.

6 Sgriosaidh tu luchd-labhairt bhreug: is gràin leis an Tighearn an duine fuileachdach agus cealgach.

7 Ach air mo shon-sa, ann an lionmhoireachd do thròcair, thig mi steach do d' thigh: sleuchdaidh mi aig do theampull naomh, ann ad eagal.

8 A Thighearna, tredraich mi ann ad fhir-eantachd; air sgàth mo naimhde: dean do shlighe dìreach romham.

9 Oir cha-n'eil ceart 'n am beul: is fìor aingidheachd e an taobh a stigh dhiubh.

10 Is uaigh fhosgailte an sgornan: ni iad miodal le 'n teangaidh.

11 Sgrìos iad, a Dhé, tuiteadh iad le 'n comhairle féin: air son lionmhoireachd an eucearta tilg a mach iad; oir rinn iad ceannaire a'd' aghaidh.

12 Ach deanadh iadsan uile aoibhneas a chuireas an dòigh annad: gu bràth deanadh iad iolach, a chionn gu'n dìon thu iad; agus deanadh iadsan luathghaire annad, leis an ìonmhuinn d'Ainm;

13 Oir beannaichidh tusa am firean, a Thighearna: le deadh-ghean cuairtichidh tu e, mar le sgéith.

URNUIGH FHEASGAIR.

An vi. Salm.

Domine ne.

A Thighearna, ann ad chorruih na cronuich mi: agus ann ad fheirg na smachdaich mi.

2 Gabh truas dìom, a Thighearn', oir tha mi lag: slànuich mi, a Thighearn', oir tha mo chnàmhan air an cràdh.

3 Agus tha m'anam air a chràdh gu mòr: ach thusa, a Thighearna, cia fhad?

4 Pill, a Thighearna, fuasgail m'anam: saor mi, air sgàth do thròcair.

5 Oir anns a' bhàs cha-n'eil cuimhne ort: anns an uaigh cò bheir dhuit cliu?

6 Tha mi sgèith le m'osnaich, ré na h-oidheche tha mi 'cur mo leabaidh air snàmh: le m'

dheuraibh tha mi 'g uisgeachadh m'uirigh.

7 Caithear le dubhachas mo shùil: fàsaidh i sean air son m' eascairde gu léir.

8 Imichibh uam, sibhse uile, a luchd-deanamh na h-euceirt: oir chual' an Tighearn guth mo chaoidh.

9 Chual' an Tighearn m'athchuinge: gabhaidh an Tighearn ri m' urnuigh.

10 Cuirear gu nàire agus gu mòr amhludh mo naimhde gu léir: pilleadh iad, cuirear gu h-obann gu nàire iad.

An vii. Salm.

Domine, Deus meus.

A Thighearna mo Dhia, annad cuiream mo dhòigh: saor mi uatha-san uile a tha 'an tòir orm, agus teasaig mi;

2 Air eagal mar leòmhan gu'n reub e m'anam, 'g a liodairt: gun neach a shaoras.

3 A Thighearna mo Dhia, ma rinn mi so: ma tha lechd a'm' làmhan;

4 Ma dh'ìoc mi ole do'n fhear a bha ann an sìth rium: no ma rinn mi fòirneart air-san a bha 'n a eascaraid domh gun aobhar;

5 Geur-leanadh an nàmhaid m'anam, agus glacadh se e: agus saltradh e mo bheatha gu làr, agus leagadh e mo chliu 's an duslach.

6 Eirich, a Thighearn', ann ad fheirg, tog suas thu féin, air son corruich mo naimhdean: agus mosgail air mo shon chum na breth a dh'àithn thu.

7 An sin cuartichidh coimhthional an t-sluaigh thu: air an son-san uime sin pill gu ionad àrd.

8 Bheir an Tighearn breth air an t-sluaigh; thoir breth orm, a Thighearn': a réir m'fhìreantachd, agus a réir m'ionracais a tha annam.

9 Thigeadh crìoch air aingidheachd nan aingidh: ach daingnich thusa am firean.

10 Oir dearbhaidh tu na cridheachan agus na h-àirnean: a Dhé chothromaich.

11 Is e Dia mo sgiath: a shaoras iadsan a tha ceart ann an cridhe.

12 Is breitheamh cothromach Dia: agus bithidh Dia ann am feirg ris a' chiontach gach là.

13 Mur pill e, geuraichidh e a chladheamh: chuir e a bhogha air lagh, agus dheasaich se e.

14 Agus dh'ulluich e air a shon innil bàis: dhealbh e a shaighdean an aghaidh luchd-geurleanmhuinn.

15 Feuch, tha e ri saothair le h-euceart: ghin e ole, agus rug e breug.

16 Dh'fhosgail e slochd agus chladhaich se e: agus thuit e féin anns a' chlais a rinn e.

17 Pillidh 'ole air a cheann féin: agus thig 'fhòirneart a nuas air a chlaigionn féin.

18 Molaidh mise an Tighearn a réir a chearta: agus seinnidh mi cliu do Ainm an Tighearn' a's ro àirde.

An viii. Salm.

Domine, Dominus noster.

O Iehobhah ar Tighearna, cia òirdheire d' Ainm air feadh na talmhainn uile: a shocraich do ghldir os ceann nan nèamh.

2 A beul naoidhean agus chlochan dh'orduich thu neart, air son do naimhde: chum gu'n caisgeadh tu an nàmhaid agus an dìoghaltach.

3 'N uair a dh'amhairceas mi air do nèamhan, obair do mheur: air a' ghealaich agus na reult-aibh, a shuidhich thu;

4 Ciod e an duine, gu'm bitheadh tusa cuimhneachail air: agus mac an duine, gu'm fiosraicheadh tu e?

5 Rinn thu e beagan na b'isle na na h-aingil: agus chrùn thu e le glòir agus le urram.

6 Thug thu uachdaranachd dha air oibrìbh do làmh: chuir thu gach ni fo 'chosaibh;

7 Caoraich agus buar uile: agus mar an ceudna ainmhidhean na machrach;

8 Eunlaith nan speur, agus iasg na mara: a shiubhlas air slighibh nan cuan.

9 O Iehobhah, ar Tighearna: cia òirdheire d' Ainm air feadh na talmhainn uile.

URNUIGH MHAIDNE.

An ix. Salm.

Confitebor tibi.

MOlaidh mi thu, a Thighearna, le m' uile chridhe: cuiridh mi 'n céill d'oibre iongantach gu léir.

2 Ni mi aoibhneas agus gairdeachas annad: seinnidh mi cliu do d'ainm, O 'Thi a's airde.

3 'N uair a phillear mo naimhdean air an ais: tuitidh iad agus théid as doibh a'd' fhianuis.

4 Oir sheas thu dhomh mo chòir agus mo chùis: shuidh thu air do rìgh-chaithir a' toirt breith le ceartas.

5 Smachdaich thu na cinnich, sgrios thu na h-aingidh: chuir thu as d'an ainm gu saoghal nan saoghal.

6 Chaidh crìoch air sgrios an nàmhaid am feasd: leag thu sìos am bailte mòra; théid as d'an cuimhne maille riu féin.

7 Ach mairidh an Tighearna gu sìorruidh: dheasaich e a rìgh-chaithir chum breitheanais.

8 Agus bheir esan breth air an t-saoghal ann am fireantachd: ni e breitheanas do 'n t-sluagh ann an ceartas.

9 Agus bithidh an Tighearna 'n a dhaingneach do'n ti a shàruichear: 'n a dhaingneach ann an aimsiribh teanntachd.

10 Agus cuiridh iadsan d'an aithne d'Ainm an dòigh annad: oir cha tréig thusa, a Thighearna, iadsan a dh' iarras thu.

11 Seinnibh cliu do'n Tighearna a chòmhnuaicheas ann an Sion: aithrisibh 'am measg nan cinneach a ghnìomhara.

12 'N uair a ni e rannsachadh air fuil cuimhnichidh e orra: cha dì-chuimhnich e glaodh nam bochd.

13 Dean tràcair orm, a Thighearna, amhaire air m' àmhghar a tha mi 'fulang uatha-san le'm fuathach mi: O thusa a tha 'g am thogail suas o gheatachan a' bhàis.

14 Chum gu foillsich mi do chliu uile ann an geatachan nìghinn Shìoin: ni mi gairdeachas ann ad shlàinte.

15 Thuit na cinnich sìos anns an t-slochd a rinn iad: anns an lion a dh'fholaich iad, chaidh an cos féin 'an sàs.

16 Aithnichear an Tighearna 's a' bhreitheanas a rinn e: ann an gnìomh a làmh féin ribear an t-aingidh.

17 Cuirear na h-aingidh gu ifrinn: na cinn-

ich uile nach cuimhnich Dia.

18 Oir cha dì-chuimhnichear an t-ainnis gu bràth : cha téid as do dhòchas nam bochd gu siorruidh.

19 Eirich, a Thighearna, na buadhaicheadh duine : thugar breth air na cinnich a'd' fhianuis.

20 Cuir, a Thighearn', eagal orra : chum gu'n aithnich na cinnich nach 'eil annta féin ach daoine.

An x. Salm.

Ut quid, Domine?

C'Ar son, a Thighearn', a sheasas tu fad o làimh : a dh'fholaicheas tu thu féin ann an aimsiribh teanntachd ?

2 'N a uabhar geur-leanaidh an t-aingidh am bochd : glacar iad 's na h-innleachdaibh a dhealbh iad.

3 Oir ni an t-aingidh ràiteachas á miann a chridhe : agus molaidh e an duine sanntach, a's beag air Dia.

4 Ann an uabhar a ghnùise cha-n iarr an t-aingidh Dia : cha-n'èil Dia 'n a uile smuaintibh.

5 Tha a shlighean doilgheasach anns gach àm : tha do bhreitheanais àrd as a shealladh ; 'thaobh a naimhdean uile, ni e tarcuise orra.

6 Thubhairt e 'n a chridhe, Cha ghluaisear mi : gu bràth cha bhi mi ann an àmhghar.

7 Tha a bheul làn de mhallachadh, agus de chéilg, agus de mhealltaireachd : fo 'theangaidh tha donas agus dìomhanas.

8 Suidhidh e ann an ionadaibh-folaich nam

bailte beaga : ann an àitibh dìomhair mortaidh e an neò-chiontach ; tha a shùilean ann an uaignidheas a' dearcadh air a' bhochd.

9 Ni e feall-fholach gu dìomhair, mar leòmhan 'n a ghàraidh : ni e feall-fholach chum gu'n glac e an duine bochd.

10 Glacaidh e an duine bochd : 'g a tharruing 'n a lìon.

11 Crùbaidh e, cromaidh e sìos : agus tuitidh am bochd le 'dhaoinibh làidir.

12 Thubhairt e 'n a chridhe, Dhì-chuimhnich Dia : dh'fholaich e a ghnùis, cha léir dha sud am feasd.

13 Eirich, a Thighearna Dhé, tog suas do làmh : na dì-chuimhnich na daoine bochda.

14 C'ar son a rinn an t-aingidh tàir air Dia : a thubhairt e 'n a chridhe. Cha-n iarr thu e ?

15 Chunnaic thu e : oir is léir dhuit ole agus mì-run.

16 Chum an dìoladh le d' làimh : ort-sa fàgaidh an duine bochd e féin ; is tu fear-cuideachaidh an dilleachdain.

16 Bris thusa gairdean an aingidh, agus an droch dhuine : rannsaich a mach 'aingidheachd, gus nach faigh thu i.

18 Tha an Tighearn 'n a Rìgh gu saoghal nan saoghal : sgriosadh na cinnich a mach as a thìr.

19 A Thighearna, chuala tu miann nan daoine bochda : deasaichidh tu an cridhe, agus bheir thu air do chluais éisdeachd :

20 A chumail còir ris an dilleachdan agus ris an truaghan : chum nach dean duine o'n ùir fòirneart na 's mò.

An xi. Salm.

In Domino confido.

AS an Tighearn earbam : c'ar son a their sibh ri m'anam, Teich as mar eun gu d' shliabh ?

2 Oir feuch, chuir na h-aingidh bogha air lagh, ghleus iad an saighead air sreing : chum tilgeadh 's an dorcha orra-san a tha ceart 'n an cridhe.

3 Ma sgriosar na bunaitèan : ciod a ni am firean ?

4 Tha an Tighearn 'n a theampull naomh : tha rìgh-chaitheir an Tighearn' anns na nèamhan.

5 Chi a shùilean : rannsaichidh a rosgan clann nan daoine.

6 Rannsaichidh an Tighearn am firean : ach an t-aingidh, agus esan a thug spéis do fhèirneart, is fuath le 'anam.

7 Frasaidh e air na h-aingidh, ribeachan, teine agus pronnuse, agus doinionn uamhasach : mar chuibhrionn an cupain.

8 Oir is ionmhuinn leis an Tighearn cheart ceartas : amhaireidh a ghnùis air an duine ionraic.

URNUGH FHEASGAIR.

An xii. Salm.

Salvum me fac.

CUaidich leam, a Thighearn', oir cha-n 'eil duine diadhaidh ann : oir theirig na h-ionraic o mheasg chloinn nan daoine.

2 Labhraidh iad dìomhanas gach neach r'a

choimhearsnach : le bilibh mìodalach, le cridhe dùbailte labhraidh iad.

3 Sgathaidh an Tighearn na bilean mìodalach uile : an teangadh a labhras nithe mòra.

4 Iadsan a thubhairt, Le'r teangaidh buaidh-ichidh sinn : is leinn féin ar bilean, cò tha 'n a Thighearn os ar ceann ?

5 Air son fèirneirt nam bochd : air son osnaich nan ainnis,

6 A nis éiridh mi, ars' an Tighearn : cuiridh mi e ann an tèaruinteachd uaithe-san a bhagras 'n a agbaidh.

7 Is briathra fìor-ghlan briathran an Tighearna : mar airgiod air a dhearbhadh ann an àmhuinn chreadha, air a ghlanadh seachd uair-ean.

8 Gleidhidh tusa sinn, a Thighearna : dìonaidh tu sinn o an ghinealach so gu bràth.

9 Gluaisidh na h-aingidh air gach taobh : 'n uair a dh'ardaichear iadsan a's suaraiche de chloinn nan daoine.

An xiii. Salm.

Usque quo, Domine.

CIa fhad, a Thighearn', a dhì-chuimhnicheas tu mi, an ann gu bràth : cia fhad a dh'fholaicheas tu do ghnùis uam ?

2 Cia fhad a ghabhas mi comhairle ann am anam, bròn ann am chridhe gach là : cia fhad a dh'ardaichear mo nàmhaid os mo cheann ?

3 Amhaire orm, éisd rium, a Thighearna mo Dhia : soillsich mo shùilean, air eagal gu'n coidil mi chum bàis.

4 Air eagal gu'n abair mo nàmhaid, Bhuaadh-aich mi 'n a aghaidh : gu'n dean m' eascairdean gairdeachas, an uair a dh'aomar mi.

5 Ach dh'earb mise á do thrècair : ni mo chridhe gairdeachas ann ad shlàinte.

6 Seinnidh mi do an Tighearn, a chionn gu'n do bhuin e rium gu fial : agus seinnidh mi cliù do ainm an Tighearn' a's ro Airde.

An xiv. Salm.

Dixit insipiens.

THubhairt an t-amadan 'n a chridhe: Cha-n eil Dia ann.

2 Tha iad truailidh, rinn iad oibre gràineil : cha-n'eil neach ann a ni maith.

3 Dh'amhairc an Tighearn a nuas o nèamh air cloinn nan daoine: a dh'fheuchainn an robh neach ann a bha glic, a bha 'g iarraidh Dhé.

4 Chlaon iad uile, tha iad gu léir air fàs salach : cha-n'eil neach ann a ni maith, cha-n'eil eadhon aon.

5 Nach 'eil eòlas aca-san uile, a tha 'deanamh na h-eucorach : a tha 'g itheadh suas mo shluaigh, mar a dh'itheadh iad aran, agus nach gairm air an Tighearn ?

6 An sin ghabh iad eagal mòr : a chionn gu bheil Dia ann an ginealach nam firean.

7 Nàirich iad combhairle an duine bho chd : a chionn gur e an Tighearn a thearmunn.

8 O gu'n tigeadh slàinte Israeil a mach á Sion. An uair a bheir an Tighearn air ais braighdeanas a shluaigh : ni Iacob gairdeachas, ni Israel aoibhneas.

URNUIGH MHAIDNE.

An xv. Salm.

Domine, quis habitabit.

A Thighearna, cò dh'fhanas ann ad phàill-iun : cò chòmhnucias air do shliabh naomh ?

2 Esan a ghluaiseas gu h-ionraic : agus a ni ceartas, agus a labhras an fhèrinn 'n a chridhe.

3 Nach dean cùl-chàineadh le 'theangaidh, nach dean ole d'a charaid : agus nach tog droch sgeul air a choimhearsnach.

4 Leis an suarach an droch dhuine : ach a bheir urram dhoibh-san air am bi eagal an Tighearn'.

5 A mhionnaicheas chum a chaldaich féin : agus nach caochail.

6 Nach cuir 'airgiod a mach air ocar : agus nach gabh duais an aghaidh an neò-chiontaich.

7 Esan a ni na nithe sin : cha ghluaisear gu bràth e.

An xvi. Salm.

Conserve me, Domine.

G Leidh mi, a Dhé: oir chuir mi mo dhòigh annad.

2 Thubhairt mi ri Iehobhah: Is tu mo Thighearna, cha ruig mo mhaitheas ort-sa.

3 A thaobh nan naomh a tha air thalamh, agus nam flath : tha mo thlachd uile amta.

4 Meudaichear an doilgheasan dhoibhsan : a ni deifir an déigh dhiathan eile.

5 Cha-n iobair mi an iobairtean-dibhe de fhuil : agus cha luaidh mi air an ainmibh le m' bhilibh.

6 Is e an Tighearn cuibhrionn m' oighreachd, agus mo chupain: is tusa a chumas suas mo chrannchur.

7 Thuit mo roinn dhomh-sa ann an ionadaibh aoibhneach: seadh, tha oighreachd thaitneach agam.

8 Beannaichidh mise an Tighearn, a thug comhairle orm: tha m' àirnean mar an ceudna 'g am theagasg 'an àm na h-oidhche.

9 Chuir mi an Tighearn romham a ghnàth: a chionn gu bheil e air mo dheas làimh, cha ghluaisear mi.

10 Uime sin ni mo chridhe aoibhneas, agus ni mo ghlòir gairdeachas: gabhaidh m' fheòil mar an ceudna fois ann an dòchas.

11 Oir cha-n fhàg thu m' anam anns an uaigh: cha leig thu le d' Aon naomh truailidh-eachd fhaicinn.

12 Feuchaidh tu dhomh slighe na beatha; tha lànachd aoibhneis a' d' làthair-sa: tha mòr shubhachas aig do dheas làimh gu sìorruidh.

An xvii. Salm.

Exaudi, Domine.

EIsd ri ceartas, a Thighearna, thoir aire do m' ghlaodh: cluinn m' urnuigh, a thig a mach cha-n ann o bhilibh cealgach.

2 O d' fhianuis thigeadh mo bhreth: faiceadh do shùilean nithe cothromach.

3 Dhearbh thu mo chridhe, dh' fhiosraich thu mi 's an oidhche; rannsaich thu mi, cha d' fhuair thu a' bheag: is e mo rùn, nach ciontaich mo bheul.

4 A thaobh ghnìomhara dhaoine, le focal do bhilean: sheachainn mi ceuman a' mhillteir.

5 Cum suas mo cheuman ann ad shlighibh: chum nach sleamhnuich mo chosan.

6 Ghairm mi ort, oir éisdidh tu rium, a Dhé: aom do chluas a m' ionnsuidh, cluinn mo chainnt.

7 Taisbein do chaoimhneas iongantach, O thusa a shaoras, le d' dheas làimh, iadsan a dh' earbas asad: uatha-san a dh' éireas suas 'n an aghaidh.

8 Gléidh mi mar chloich na sùla: fo sgàile do sgiathan foluich mi.

9 O ghnùis nan droch dhaoine, a tha ri fòirneart orm: naimhdean m' anama a tha 'g am chuirteachadh air gach taobh.

10 'N an saill tha iad air an druideadh suas: le'm beul labhraidh iad gu h-uaibhreach.

11 'N ar ceum a nis chuairtich iad sinn: shuidhich iad an sùilean, a' cromadh sìos gu làr.

12 Cosmhuil ri leòmhann a tha gionach chum cobhartaich: agus ri leòmhann òg, a' feitheamh ann an ionadaibh dìomhair.

13 Eirich, a Thighearna, cuir roimhe, leag sìos e: saor m' anam o'n aingidh le d' chlaidheamh.

14 O dhaoineibh le d' làimh, a Thighearn', o dhaoineibh an t-saoghail: d' am bheil an cuibhrionn 's a' bheatha so, agus d' an do lion thu am brù le d' ionmhas foluichte.

15 Sàsuichear an clann: agus fàgaidh iad am fuigheall d' an naoidheanaibh.

16 Air mo shon-sa, ann am fireantachd chi mi do ghnùis: sàsuichear mi, 'n uair a dhùisgeas mi, le d' choslas.

URNUIGH FHEASGAIR.

An xviii. Salm.

Diligam te, Domine.

GRadhaichidh mi thu, a Thighearna, mo neart; is e an Tighearn mo charraig, agus mo dhaingneach: agus m'fhear-saoraidh, mo Dhia, mo chreag, anns an cuiream mo dhòchas, mo sgiath, agus adharc mo shlàinte, mo thùr àrd.

2 Gairmidh mi air an Tighearn, a's airidh air cliu: agus o m' naimhdibh saorar mi.

3 Chuairtich piantan a' bhàis mi: agus chuir tuiltean dhroch dhaoine eagal orm.

4 Chuairtich piantan ifrinn mi: ghabh liontan a' bhàis romham.

5 Ann am éigin ghairm mi air an Tighearn: agus ri m' Dhia ghlaodh mi.

6 Chual' e as a theampull mo ghuth: agus thàinig mo ghlaodh 'n a làthair gu a chluasaibh.

7 An sin chrathadh agus chrìochnuich an talamh: agus ghluaiseadh bunaitean nam beann, agus chrathadh iad, a chionn gu'n robh corr-
uich air.

8 Chaidh deatach suas as a shròin: agus dhian-loisg teine as a bheul, lasadh éibhlean leis.

9 Agus lùb e na nèamhan, agus thuirling e nuas: agus bha dorchadas fo a chosaibh.

10 Agus mharcach e air Cerub, agus chaidh e air iteig: agus dh'itealaich e air sgiathaibh na gaoithe.

11 Chuir e dorchadas mar ionad dìomhair mu'n cuairt air: bu phàillium da, duibhre uisgeachan, neoil nan speur.

12 O'n dealradh a bha fa 'chomhair chaidh a neoil thairis: clacha-meallain agus éibhlean teine.

13 Agus rinn an Tighearn tairneanach 's na speuraibh: agus chuir an Ti a's àirde a mach a ghuth.

14 Agus chuir e mach a shaighdean, agus sgap e iad: agus thilg e mòran tein'-athair, agus chlaoidh e iad.

15 Agus chunnacas aigein nan uisgeachan, agus nochdadh bunaitean an domhain, le d' achmhasan-sa, a Thighearna: le séideadh anail d'fheirge.

16 Chuir e nuas o'n àirde, ghlac e mi: tharruing e mi á uisgeachaibh lìonmhor.

17 Shaor e mi o m' nàmhaid làidir, agus uatha-san, a dh'fhuathaich mi: oir bu treise iad na mise.

18 Ghabh iad romham ann an là m' àmhghair: ach bha'n Tighearn 'n a chùl-taice dhomh.

19 Agus thug e mach mi gu ionad farsuinn: shaor e mi, a chionn gu'n do ghabh e tlachd annam.

20 Thug an Tighearn luigheachd dhomh a réir m'ionracais: a réir gloine mo làmh dhìol e dhomh.

21 Oir ghleidh mi slighean an Tighearn': agus cha do chlaon mi gu h-aingidh o m' Dhia.

22 Oir bha a bhreitheanais uile ann am fhianuis: agus a reachdan cha do chuir mi uam.

23 Agus bha mi ionraic 'n a fhianuis: agus ghleidh mi mi féin o m' aingidheachd.

24 Uime sin dhìol an Tighearn dhomh a réir m'ionracais: a réir gloine mo làmh ann an sealladh a shùl.

25 Do'n duine thròcaireach nochdaidh tu thu féin thròcaireach: do'n duine ionraic nochdaidh tu thu féin ionraic.

26 Do'n duine ghlan nochdaidh tu thu féin glan: agus do'n duine reasgach nochdaidh tu thu féin reasgach.

27 Oir saoraidh tu an sluagh, a tha fo àmhghar: ach na sùilean àrda bheir thu nuas.

28 Oir lasaidh tusa mo làchran, a Thighearna: soillsichidh mo Dhia mo dhorchadas.

29 Oir leat-sa ruith mi troimh bhuidhinn: agus le m' Dhia leum mi thar balla.

30 A thaobh Dhé, tha a shlighe iomlan: tha focal an Tighearn' air a dhearbhadh: is sgiath e dhoibhsan uile, a chuireas an dòchas ann.

31 Oir cò is Dia ann, ach an Tighearn: agus cò is carraig ann, ach ar Dia-ne?

32 Is e Dia, a tha 'g am chrioslachadh le neart: agus a' deanamh mo shlighe iomlan.

33 Tha e 'deanamh mo chos mar chosan éilde: agus 'g am shocrachadh air m'àitibh àrda.

34 Tha e 'g ionnsachadh mo làmh gu cath: air chor as gu'm brisear bogha umha le mo ghaird-einibh.

35 Agus thug thu dhomh sgiath do shlàinte: agus chum do dheas làmh suas mi, agus rinn do chaoimhneas mòr mi.

36 Rinn thu mo cheuma farsuinn fodham: air chor as nach do shleamhuich mo chosan.

37 Lean mi mo naimhdean, agus rug mi orra: agus cha do phill mi air m'ais gus an do chuir mi as doibh.

38 Lot mi iad, agus cha bhi e 'an comas doibh éirigh: thuit iad fo m' chosaibh.

39 Oir chrioslaich thu mi le neart chum catha: leag thu sìos fodham iadsan a dh'éirich suas a'm' aghaidh.

40 Agus thug thu dhomh mo naimhdean air mhuineal: iadsan a dh'fhuathaich mi, agus ghearr mi as iad.

41 Ghlaodh iad, ach cha robh fear-saoraidh ann: eadhon air an Tighearn, ach cha do fhreagair e iad.

42 An sin mhìn-phronn mi iad mar dhuslach fa chomhair na gaoithe: mar chlàbar nan sràid bhrùth mi iad.

43 Shaor thu mi o choimhstrì an t-sluaigh: rinn thu mi a'm' cheann air na cinnich.

44 Ni sluagh, nach b'aithne dhomh: seirbhis domh.

45 Co luath 's a chluinneas iad, géillidh iad dhomh: strìochdaidh coigrich dhomh.

46 Seargaidh coigrich as: agus bithidh eagall orra mach as an àitibh-daingne.

47 Is beò an Tighearn, agus gu ma beannaichte mo charraig-sa: agus air àrdachadh gu robh Dia mo shlàinte.

48 Is e Dia a ni dòghaltas air mo shon: agus a chuireas an sluagh fodham.

49 A shaoras mi o m' Naimhdibh, seadh, os an ceann-san a dh'éireas suas a'm' aghaidh togaidh tusa suas mi: o fhear an ainneirt saoraidh tu mi.

50 Uime sin cliùthaichidh mi thu, a Thighearn', 'am measg nan Cinneach: agus seinnidh mi do d'Ainm.

51 Bheir esan saorsa mhòr d'a Rìgh : agus nochdaidh e trècair d'a Aon ungta féin, do Dhaibhidh agus d'a Shliochd gu bràth.

URNUIGH MHAIDNE.

An xix. Salm.

Celi enarrant.

CUIRIDH na Nèamhan 'an céill glòir Dhé : agus nochdaidh na Speura gnìomh a làmh.

2 Tha là a' deanamh sgeòil do là : agus oidhche a' foillseachadh eòlais a dh'oidhche.

3 Cha-n'èil cainnt, cha-n'èil briathran : anns nach cluinnear an guth.

4 Air feadh na talmhainn uile chaidh am fuaim a mach : agus am focail gu iomall an domhain.

5 Do'n Ghréin chuir e pàillion annta : agus tha i mar nuadh Fhear-pòsda a' teachd a mach á 'shèdmar, ni i gairdeachas mar Ghaisgeach a' ruith na réise.

6 Tha a dol a mach o chrìch nan Speur, agus a cuairt gu ruig an crìochan : agus cha-n'èil ni air bith a dh'fhòlaichear o a teas.

7 Is iomlan lagh an Tighearn', ag iompachadh an anama : tha fianuis an Tighearna cinnteach, a' deanamh a' bhaoghalta glic.

8 Tha reachdan an Tighearna ceart, a' deanamh a' chridhe aoibhneach : tha àithne an Tighearna glan, a' soillseachadh nan sùl.

9 Tha eagal an Tighearna fìor-ghlan, a' mair-eachduinn am feasd : is fìrinn breitheanais an Tighearna, tha iad gu h-iomlan cothromach.

10 Na's mòr r'an iarraidh tha iad na'n t-òr,

seadh, na mòran de'n òr fhìor-ghlan : agus na's milse na a' mhil, seadh, na a' mhil a shileas as na cùibh-meala.

11 Os bàrr, tha do Sheirbhiseach a' faotainn rabhaidh uatha : 'n an coimhead tha mòr dhuais.

12 Cò thuigeas a sheacharain : o lochdaibh dìomhair glan thusa mi.

13 Mar an ceudna o pheacaidhean dànadais cum air ais d'òglach, na bitheadh àrd-cheannas aca orm : an sin bithidh mi ionraic, agus bithidh mi neò-chiontach o eusaontas mòr.

14 Bitheadh briathra mo bheoil, agus smuainte mo chridhe : taitneach a'd' làthair,

15 A Thighearna : mo charraig, agus m'fhear-saoraidh.

Am xx. Salm.

Exaudiat te Dominus.

GU'n éisdeadh an Tighearn riut ann an là teanntachd : gu'n cumadh Ainm Dhé Iacoib suas thu.

2 Gu'n cuireadh e cabhair thugad as 'Ionad naomh : agus á Sion gu neartaicheadh e thu.

3 Gu'n cuimhnicheadh e do thabhartais uile : agus gu'n gabhadh e gu taitneach uait d' Iobairt-loisgte.

4 Gu'n tugadh e dhuit a réir do chridhe féin : agus gu'n coimhlionadh e do chomhairle uile.

5 Ni sinne aoibhneas ann ad shlàinte, agus ann an Ainm ar Dé-ne togaidh sinn suas ar bratach : gu'n coimhlionadh Dia d'iarrtuis uile.

6 A nis tha fios agam gu'n saor an Tighearn 'Aon ungta féin, éisdidh e ris o Nèamhan a naomhachd : le neart-saoraidh a dheas làimh.

7 Earbaidh cuid á Carbadaibh, agus cuid á Eachaibh: ach cuimhnichidh sinne Ainm an Tighearn' ar Dé.

8 Dh'islicheadh iadsan, agus thuit iad: ach dh'éirich sinne, agus sheas sinn.

9 Saor an rìgh, a Thighearna, agus éisd ruinn: 's an là 's an gairm sinn.

An xxi. Salm.

Domine, in virtute tua.

ANn ad neart, a Thighearna, ni an Rìgh aoibhneas: agus ann ad shlainte cia mòr an gairdeachas a ni e?

2 Miann a chridhe thug thu dha: agus ath-chuinge a bhilean cha do dhiùlt thu dha.

3 Oir ghabh thu roimhe le beannachadh do mhaitheis: chuir thu m'a cheann coron a dh'òr fìor-ghlan.

4 Dh'iarr e beatha ort, thug thu dha fad làithean: gu saoghal nan saoghal.

5 Is mòr a ghòir trid do shlainte-sa: urram, agus mòralachd chuir thu air.

6 Oir rinn thu e ro bheannaichte gu bràth: rinn thu e ro aoibhneach le d' ghnùis.

7 Oir earbaidh an Rìgh as an Tighearn: agus trid trècair an Ti a's àirde cha ghluais-e ar e.

8 Gheibh do làmh a mach do naimhdean uile: gheibh do dheas làmh a mach iadsan le'm fuath-ach thu.

9 Ni thu iad mar àmhuinn theintich ann an àm d'fheirge: sluididh an Tighearn sìos iad 'n a chorroich, agus caithidh an teine iad.

10 An toradh sgriosaidh tu o'n talamh: agus an sliochd o chloinn nan daoine.

11 Oir dhealbh iad ole a'd' aghaidh: smuainich iad droch smuainte nach b'urrainn iad a choimhlionadh.

12 Uime sin bheir thu orra an cùl a thionndadh: air sreangaibh do bhogha gleusaidh tu do shaighdean 'n an aghaidh.

13 Bi air d'ardachadh, a Thighearn', ann ad neart: seinnidh sinne, agus molaidh sinn do chumhachd.

URNUIGH FHEASGAIR.

An xxii. Salm.

Deus, Deus meus.

MO Dhia, mo Dhia, c'ar son a thréig thu mi: fad o m' ghlaodh, o bhriathraibh mo bhùiridh?

2 O mo Dhia, gairmeam anns an là, ach cha fhreagair thu: agus anns an oidhche, ach cha-n'eil fois agam.

3 Ach tha thusa naomh: ann ad chòmhnuidh far am bheil cliu Israeil.

4 Asad-sa dh'earb ar n-aithrichean: dh'earb iad, agus shaor thu iad.

5 Riut-sa ghlaodh iad, agus theasairgeadh iad: asad-sa dh'earb iad, agus cha robh nàire orra.

6 Ach is enuimh mise, agus cha duine: mas-ladh dhaoine, agus tàir an t-sluaigh.

7 Ni iadsan uile a chi mi, gàire-fanoid rium: casaidh iad am beul, crathaidh iad an ceann, ag ràdh,

8 Chuir e a dhòigh anns an Tighearn, fuasgladh e air: saoradh se e, a chionn gu bheil tlachd aige ann.

9 Ach is tusa an ti, a thug a mach as a' bhroinn mi: bu tu aobhar mo dhòchais, air cìch mo mhàthar.

10 Ort-sa thilgeadh mi o'n bhroinn: o bhroinn mo mhàthair is tusa mo Dhia.

11 Na bi-sa fada uam, oir tha àmhghar dlùth dhomh: agus gun neach ann gu m' chuideachadh.

12 Chuairtich mòran tharbh mi: dh'iadh tairbh làidir Bhàsain umam.

13 Dh'fhosgail iad orm am beul: mar leòmh-an reubach, agus beucach.

14 Mar uisge dh'irteadh a mach mi, agus sgàin mo chnàmhan uile o'chéile: tha mo chridhe mar chéir, air leaghadh ann am meadhon mo chuim.

15 Air tiormachadh mar shoitheach creadha tha mo neart, agus tha mo theangadh a' leant-uinn ri m' ghial: agus gu ùir a' bhàis thug thu mi.

16 Oir chuairtich madraidh mi: dh'iadh coimhthional dhroch dhaoine umam.

17 Lot iad mo làmhan agus mo chosan, feudaidh mi mo chnàmhan uile àireamh: tha iadsan a' sealltuinn, tha iad a' geur-amharc orm.

18 Roinn iad mo thrusgan eatorra: agus air mo bhrat thilg iad crannchur.

19 Ach na bi-sa, a Thighearna, fada uam: O thusa mo neart, greas gu mo chabhair.

20 Teasaig m'anam o'n chlaidheamh: m'aon ghràidh o neart a' mhadaidh.

21 Saor mi o bheul an leòmhain: agus o adharcaibh nam buabhull teasaig mi.

22 Cuiridh mi'n céill d'ainm do m'bhràithribh: ann am meadhon a' choimhthionail molaidh mi thu.

23 Sibhse air am bheil eagal Dhé, molaibh e: sibhse uile, a shìol Iacoib, thugaibh glòir dha, agus bitheadh 'eagal-san oirbh, sibhse uile a shìol Israeil.

24 Oir cha do rinn e tàir air, agus cha do ghabh e gràin de àmhghar an truaghain: agus cha d'fholuich e a ghnùis air, ach an uair a ghlaodh e ris, dh'éisd e.

25 Ort-sa bithidh mo mholadh anns a' mhòr-choimhthional: mo bhàidean iocaidh mi'n an làthair-san, d'an eagal e.

26 Ithidh na daoine macanta, agus sàsuichear iad: molaidh iadsan an Tighearn a dh'iarras e; bithidh an cridhe beò gu bràth.

27 Cuimhnichidh air, agus pillidh a dh'ionnsuidh an Tighearn' uile chrìocha na talmhainn: agus strìochdaidh uile theaghlaichean nan cinneach 'n a làthair.

28 Oir is leis an Tighearn an rìoghachd: agus tha esan 'n a uachdaran air na cinnich.

29 Ithidh daoine reamhra na talmhainn uile: agus ni iad aoradh.

30 'N a làthair-san sleuchdaidh iadsan uile a théid sìos do'n duslach: oir cha chum neach 'anam beò.

31 Ni sliochd seirbhis dha: measar e do an Tighearn mar ghinealach.

32 Thig iad, agus cuiridh iad 'an céill 'fhir-eantachd: do'n àl ri teachd, gu'm b'esan a rinn sud.

An xxiii. Salm.

Dominus regit me.

IS e an Tighearn mo bhuachaille: cha bhi mi ann an dìth.

2 Ann an cluainibh glasa bheir e orm luidhe stòs: làimh ri uisgeachaibh ciùin' tredraichidh e mi.

3 Aisigidh e m'anam: tredraichidh e mi air slighibh na fireantachd air sgàth 'Ainme féin.

4 Seadh, ged shiubhail mi troimh ghleann sgàile a' bhàis, cha bhi eagal uile orm: oir tha thusa maille rium, bheir do shlat, agus do lorg comhfhurtachd dhomh.

5 Deasaichidh tu bòrd fa m' chomhair ann am fianuis mo naimhde: dh'ung thu le olaidh mo cheann, tha mo chupan a' cur thairis.

6 Gu cinnteach leanaidh maith agus tràcair mi uile làithean mo bheatha: agus còmhnuichidh mi ann an tigh an Tighearna fad mo làithean.

URNUIGH MHAIDNE.

An xxiv. Salm.

Domini est terra.

IS leis an Tighearn an talamh, agus a làn: an domhan, agus iadsan a tha 'n an còmhnuidh ann.

2 Oir shuidhich e air na cuantaibh e: agus shocraich e air na sruthaibh e.

3 Cò thèid suas gu sliabh an Tighearn': agus cò sheasas 'n a ionad naomh-san?

4 Esan, aig am bheil làmhnan neò-chiontach, agus cridhe glan: nach do thog 'anam ri

diomhanas, agus nach do mhionnaich chum ceilge.

5 Gheibh esan beannachadh o an Tighearn: agus fireantachd o Dhia a shlàinte.

6 Is i so ginealach na dream a dh' iarras e: a dh' iarras do ghnùis, a Dhia Iacoib.

7 Togaibh, a gheatacha, 'ur cinn, agus bithibh air 'ur togail suas, a dhorsa sìorruidh: agus thig Rìgh na glòire steach.

8 Cò e so Rìgh na glòire: an Tighearn làidir agus treun, an Tighearn treun ann an cath.

9 Togaibh suas 'ur cinn, a gheatacha, agus bithibh air 'ur togail suas, a dhorsa sìorruidh: agus thig Rìgh na glòire steach.

10 Cò e so Rìgh na glòire: Tighearn nan slògh, is esan Rìgh na glòire.

An xxv. Salm.

Ad te, Domine, levavi.

RIut-sa, a Thighearna, togam m'anam a suas, annad-sa, mo Dhia, cuiream mo dhòchas: na nàraichear mi, agus na deanadh mo naimhdean gairdeachas os mo cheann.

2 Seadh, na nàraichear neach sam bith a dh' fheitheas ort-sa: bitheadh nàire orra-san a chiontaicheas gun aobhar.

3 Nochd dhomh do shlighean, a Thighearna: teagaisg dhomh do cheuman.

4 Tredraich mi ann ad fhìrinn, agus teagaisg mi: oir is tusa Dia mo shlàinte; agus ort-sa tha mi 'feitheamh gach là.

5 Cuimhuich do chaomh-thrècairean, a Thighearn': agus do chaoimhneas an gràdhach, oir tha iad ann o chian nan cian.

6 Peacaidhean m' òige, agus m' eusaontais, na cuimhnich thusa: a réir do thròcair bi-sa cuimhneachail orm, air sgàth do mhaitheis, a Thighearna.

7 Is maith, agus is dìreach an Tighearn: uime sin teagaisgidh e peacaich 's an t-slighe.

8 Treòraichidh e na daoine ciùin' ann am breitheanas: agus teagaisgidh e do na daoineibh ciùin' a shlighe.

9 Is tròcair agus firinn uile shlighean an Tighearna: dhoibh-san a ghleidheas a choimh-cheangal, agus a theisteis.

10 Air sgàth d' Ainme, a Thighearna: lagh mo chionta, oir tha e mòr.

11 Cò e am fear air am bheil eagal an Tighearna: seòlaidh e esan 's an t-slighe a rògh-nuichead e.

12 Ni 'anam tàmh ann am maith: agus mealaidh a shliochd an tìr.

13 Tha rùn an Tighearn' aig an dream, d' an eagal e: agus foillsichidh e dhoibh a choimh-cheangal.

14 Tha mo shùilean a ghnàth ris an Tighearn: oir bheir esan mo chosan as an lìon.

15 Amhaire orm, agus gabh truas dìom: oir tha mi a' m' aonar, agus fo àmhghar.

16 Tha teinn mo chridhe a' dol 'am meud: o m' àmhgharaibh saor thusa mi.

17 Amhaire air m' àmhghar, agus air mo phéin: agus lagh mo pheacaidhean gu léir.

18 Amhaire air mo naimhdibh, oir tha iad lionmhor: agus le fuath anabarrach tha iad 'g am fhuathachadh.

19 Gleidh m' anam, agus saor mi: na leig fo nàire mi, oir chuir mi mo dhùigh annad.

20 Dionadh ionracas, agus ceartas mi: oir tha mi 'feitheamh ort-sa.

21 Saor Israeil, a Dhé: as 'àmhgharaibh uile.

An xxvi. Salm.

Judica me, Domine.

THoir breth orm, a Thighearn', oir ghluais mi ann an ionracas: o chuir mi mo dhùigh anns an Tighearn, cha ghluaisear mi.

2 Fidir mi, a Thighearn', agus dearbh mi: rannaich m' àirnean, agus mo chridhe.

3 Oir tha do chaoimhneas gràdhach fa chomhair mo shùl: agus ghluais mi ann ad fhìrinn.

4 Cha do shuidh mi le daoineibh mealltach: agus maille ri luchd-ceilge cha téid mi steach.

5 Is beag orm coimhthional luchd-uile: agus le daoineibh aingidh cha suidh mi.

6 Nìgidh mi mo làmhan ann an neò-chiontas: agus cuairtichidh mi d' altair, a Thighearna.

7 Chum gu foillsich mi le guth molaidh: agus gu'n cuir mi 'an céill d' oibre iongantach gu léir.

8 A Thighearn', is ionmhuinn leam còmh-nuidh do theach-sa: agus ionad pàilliuin do ghèire.

9 Na cruinnich m' anam le peacaich: no mo bheatha le daoineibh fuileachdach;

10 Aig am bheil lochd 'n an làmhan: agus an làmh dheas làn de dhuais bhratha.

11 Ach gluaisidh mise ann an ionracas: saor mi, agus dean tròcair orm.

12 Tha mo chos 'n a seasamh ann an ionad còmhnhard: anns na coimhthionail beannaichidh mi an Tighearn.

URNUIGH FHEASGAIR.

An xxvii. Salm.

Dominus illuminatio.

IS e an Tighearn mo sholus, agus mo shlàinte; cò chuireas eagal orm: is e an Tighearn neart mo bheatha; cò chuireas geilt orm?

2 'N uair thàinig luchd-uile orm a dh'itheadh suas m'fhèda, mo naimhdean, agus m'eascaird-ean: thuslich iad féin, agus thuit iad.

3 Ged champaicheadh feachd a'm'aghaidh, cha bhitheadh eagal air mo chridhe: ged éireadh cogadh a'm'aghaidh, á so ni mi mo bhun.

4 Aon ni ghuidh mi air an Tighearn, sin iarraidh mi: a bhi a'm' chòmhnuidh ann an tigh an Tighearna ré uile làithean mo bheatha, chum gu faicinn maise an Tighearn', agus gu fiosraichinn 'n a theampull.

5 Oir folaichidh e mi 'n a sgàth-thigh ann an là an uile: folaichidh e mi ann an òmhair-eachd a phàilliuin, air carraig togaidh e suas mi.

6 Agus a nis togar suas mo cheann: os ceann mo naimhdean mu 'n cuairt orm.

7 Agus iobraidh mi 'n a phàilliun iobairtean aobhneis: seinnidh mi, agus canaidh mi cliu do an Tighearn.

8 Eisd, a Thighearna, ri m'ghuth, 'n uair a dh'éigheas mi: dean trècair orm, agus freagair mi.

9 'N uair a thubhairt thusa, Iarraibh-se mo ghnùis: thubhairt mo chridhe riut, Do ghnùis, a Thighearn', iarraidh mi.

10 Na folaich do ghnùis uam: na cuir air falbh d'òglach ann am feirg.

11 Bu tusa mo chabhair: na fàg mi, agus na tréig mi, a Dhia mo shlàinte.

12 'N uair a thréigeadh m' Athair agus mo Mhàthair mi: an sin togaidh an Tighearn suas mi.

13 Teagaisg dhomh do shlighe, a Thighearn': agus tredraich mi air slighe dhèrich, air sgàth mo naimhdean.

14 Na tabhair thairis mi do thoil mo naimhdean: oir dh' éirich fianuisean bréige a'm' aghaidh, agus luchd-bagairt fòirneirt.

15 Gidheadh chreid mise: gu faicinn maitheas an Tighearn' ann an tìr nam bèd.

16 Feith air an Tighearn: glac misneach, agus neartaichidh esan do chridhe, feith, tha mi 'g ràdh, air an Tighearn.

An xxviii. Salm.

Ad te, Domine.

RIut-sa, a Thighearn', éigheam, mo charraig: na bi-sa 'n ad thosd a m' thaobh, air eagal ma bhitheas tu 'n ad thosd a m' thaobh, gu fàs mi cosmhuil riu-san a théid sìos do 'n uaigh.

2 Eisd ri guth m' athchuingean, an uair a ghlaodhas mi ruit: an uair a thogas mi mo làmhan chum do ghuth-àite naoimh-sa.

3 Na tarruing mi mach leis na h-aingidh, agus le luchd-deanamh na h-eucorach: a tha

'labhairt sìth' r' an coimhearsnaich, agus ole aca 'n an cridhe.

4 Thoir dhoibh a réir an oibre: agus a réir aingidheachd an gnìomharan.

5 A réir oibre an làmh thoir dhoibh: ioc an luigheachd dhoibh.

6 A chionn nach toir iad an aire do ghnìomh-araibh an Tighearna, no do obair a làmh: sgriosaidh e iad, agus cha tog e suas iad.

7 Beannaichte gu robh an Tighearn: a chionn gu'n d' éisd e ri guth m' athchuinge.

8 Is e an Tighearn mo neart, agus mo sgiath, ann-san chuir mo chridhe a dhòchas, agus chuidicheadh leam: uime sinn rinn mo chridhe gairdeachas, agus le m' laoidh molaidh mi e.

9 Is e an Tighearn neart a shluaigh: agus is esan neart slàinte 'Aoin ungtà féin.

10 Saor do shluagh, agus beannaich d' oighreachd: beathaich iad, agus àrdaich iad gu bràth.

An xxix. Salm.

Afferte Domino.

THugaibh do an Tighearn, a chlann nan cumhachdach: thugaibh do an Tighearn glòir agus neart.

2 Thugaibh do an Tighearn a' ghlòir a's cubhaidh d'a Ainm: sleuchdaibh do an Tighearn ann am maise na naomhachd.

3 Tha guth an Tighearn' os ceann nan uisgeacha: rinn Dia na glòire tairneanach.

4 An Tighearn, os ceann nan Uisgeacha mòra; tha guth an Tighearna cumhachdach: tha guth an Tighearna làn mòralachd.

5 Brisidh guth an Tighearna na Seudair: seadh, brisidh an Tighearn Seudair Lebanoin.

6 Agus bheir e orra leum mar laogh: Lebanon agus Sirion mar bhuabhull òg.

7 Sgoiltidh guth an Tighearna lasraichean an teine, crathaidh guth an Tighearn' am fàsach: crathaidh an Tighearn fàsach Chadeis.

8 Bheir guth an Tighearn' air na h-èildibh an laoigh a thilgeadh, agus lomaidd e na coilltean: agus 'n a theampull cuiridh gach neach 'an céill a ghlòir.

9 Suidhidh an Tighearn air an tuil: agus suidhidh an Tighearn 'n a Rìgh gu sìorruidh.

10 Bheir an Tighearn neart d'a shluagh: beannaichidh an Tighearn a shluagh le sìth.

URNUIGH MHAIDNE.

An xxx. Salm.

Exaltabo te, Domine.

MOlaidh mi thu, a Thighearn', oir thog thu suas mi: agus cha d'thug thu air m' eascairdibh gairdeachas a dheanamh os mo cheann.

2 A Thighearna mo Dhia, ghlaodh mi riut: agus shlànuich thusa mi.

3 A Thighearna, thog thu m'anam a nìos as an uaigh: ghleidh thu beò mi, chum nach rachainn sìos do'n t-slochd.

4 Seinnibh do'n Tighearn, sibhse a naoimhsan: agus thugaibh buidheachas ri cuimhneachadh air a naomhachd.

5 Oir cha-n'eil ach tiota 'n a fheirg, tha beatha 'n a dheadh-ghean: ré oidhche mairidh bròn, ach air maduinn thig gairdeachas.

6 Thubhairt mise ann am shocair, Cha ghluais-ear mi am feasd: a Thighearna, le d' dheadh-ghean thug thu air mo bheinn seasamh gu daingean.

7 Dh'fholuich thu do ghnùis: bha mi fo amhluadh.

8 Ghlaodh mi riut-sa, a Thighearn': agus air an Tighearn dh'asluich mi.

9 Ciod an tairbhe a tha ann am fhuil: 'n uair a théid mi sìos do'n t-slochd?

10 Am mol an ùir thu: an cuir i 'an céill d'fhìrinn?

11 Eisd rium, a Thighearn', agus dean tràcair orm: A Thighearna, bi-sa ann ad fhear-cuid-eachaidh leam.

12 Thionndaidh thu dhomh-sa mo bhròn gu dannsadh: chuir thu dhìom m'eudach-saie, agus chrioslaich thu mi le aoibhneas.

13 Chum gu'n seinneadh mo ghòir cliu dhuit, agus nach bitheadh i 'n a tosd: a Thighearna mo Dhia, gu bràth molaidh mise thu.

An xxxi. Salm.

In te, Domine, speravi.

ANnad-sa, a Thighearn', cuiream mo dhòigh: na nàraichear mi gu bràth, trid d'fhìr-eantachd saor mi.

2 Aom a m' ionnsuidh do chluas: gu grad furtaich orm.

3 Bi-sa ann ad charraig làidir dhomh, ann ad thigh-tèarmuinn: chum mo dhìonadh.

4 Oir is tusa mo charraig, agus mo dhaing-

neach: agus air sgàth d'Ainme, treòraichidh agus stiuraidh tu mi.

5 Bheir thu mi as an lìon a dh'fholuich iad fa m' chomhair: oir is tusa mo neart.

6 Ann ad làimh-sa tiomnam mo spiorad: saor mi, a Thighearna Dhé na fìrinn.

7 Is fuath leat iadsan, a bheir fainear d'ìomh-anais bhreugach: ach anns an Tighearn chuir mise mo dhòchas.

8 Ni mi aoibhneas, agus gairdeachas ann ad thròcair: oir chunnaic thu m'amhghar, b'aithne dhuit m'anam ann an teanntachdaibh.

9 Agus cha do dbruid thu suas mi ann an làimh an nàmhaid: shocraich thu mo chosan ann an àite farsuinn.

10 Gabh truas dìom, a Thighearn', oir tha mi ann an teinn: tha mo shùil, m'anam, agus mo chòm, air seargadh as le doilgheas.

11 Oir chlaoidheadh mo bheatha le bròn: agus mo bhliadhnan le osnaich.

12 Air son m'euceirt thuit mo neart: agus chaitheadh mo chnàmhan.

13 'Am measg mo naimhdean gu léir bha mi a'm' mhasladh, agus gu h-àraidh do m' choimhearsnaich: agus a'm' aobhar eagail do m' luchd èolais; iadsan, a chunnaic mi a muigh, theich iad uam.

14 Dhì-chuimhnicheadh mi, mar dhuine marbh air dol á cuimhne: tha mi mar shoith-each briste.

15 Oir chuala mi cùl-chàineadh mhòran dhaoine: bha eagal air gach taobh, 'n uair a ghabh iad comhairle le 'chéile a'm' aghaidh, a dhealbh iad mo bheatha 'thoirt uam.

16 Ach dh'earb mise asad-sa, a Thighearna: thubhairt mi, Is tu mo Dhia.

17 Ann ad làimh-sa tha m'aimsirean, saor mi á làimh mo naimhdean: agus uatha-san a tha 'an tòir orm.

18 Thoir air do ghnùis dealrachadh air d' òglach: saor mi air sgàth do thròcair.

19 Na nàraichear mi, a Thighearn', oir ghairm mi ort: nàire bitheadh air na h-aingidh, 'n an tosd bitheadh iad 's an uaigh.

20 Deanar balbh na bilean breugach: a labhras an aghaidh an fhìrein gu cruaidh, le uabhar, agus tarcuis.

21 Cia mòr do mhaitheas, a thaisg thu dhoibh-san, do'n eagal thu: a rinn thu dhoibh-san, a dh'earbas asad, 'am fianuis chloinn' nan daoine!

22 Folaichidh tu iad ann an dìomhaireachd do làthaireachd o àilghios dhaoine: folaicidh tu iad ann am pàilliun o strì nan teangadh.

23 Beannaichte gu robh an Tighearn: oir nochd e gu h-iongantach a chaoimhneas dhomh-sa ann am baile daingnichte.

24 Thubhairt mise a'm' dheifir: Ghearradh as mi o fhianuis do shùl.

25 Gidheadh dh'èisd thusa ri guth m'asluchaidh: 'n uair a dh'éigh mi riut.

26 Gràdhaichibh an Tighearn, sibhse uile a naoimh-san: gleidhidh an Tighearn na daoine tréibhdhireach, agus diolaidh e gu pailt dhàsan a nì gu h-uaibhreach.

27 Bithibh-se misneachail, agus neartaichidh esan 'ur cridhe: sibhse uile a chuir 'ur dòchas anns an Tighearn.

URNUIGH FHEASGAIR.

An xxxii. Salm.

Beati, quorum.

IS beannaichte esan, d'an do mhaitheadh 'eusaontas: d'am bheil a pheacadh air 'fholach.

2 Is beannaichte an duine, nach cuir an Tighearn euceart as a leth: agus aig nach 'eil cealg 'n a spiorad.

3 An uair a bha mi ann am thosd: luidh aois air mo chnàmhan le m' bhùireadh fad an là.

4 Oir a là, agus a dh'oidhche bha do làmh trom orm: tha mo bhrìgh air a h-atharraehadh gu tiormachd an t-samhraidh.

5 Dh'aidich mi mo pheacadh dhuit: agus cha do cheil mi m'euceart.

6 Thubhairt mi, Aidichidh mi m'eusaontais do an Tighearn: agus mhaith thusa cionta mo pheacaidh.

7 Air an aobhar sin nì gach duine diadhaidh urnuigh riut-sa, 's an àm anns am faighear thu: gu cinnteach ann an tuil nan uisgeacha mòra cha tig iad am fagus da.

8 Tha thusa ann ad ionad-foluich dhomh, o theinn gleidhidh tu mi: le òranaibh saorsa cuairtichidh tu mi.

9 Fìor-theagaisgidh mi thu, agus nochdaidh mi dhuit an t-slighe, air an tigeachd dhuit triall: seòlaidh mi dhuit le m' shùil.

10 Na bi mar each, no mar mhùileid, aig nach 'eil ciall: d'an cuirear sparrag, agus srian 'n am beul, chum nach tig iad am fagus dhuit.

11 Is lionnhor doilgheasan do'n aingidh : ach cuairtichidh thrècair esan, a dh'earbas as an Tighearn.

12 Bithibh aoibhneach anns an Tighearn, agus deanaibh gairdeachas, sibhse fhìreana : agus deanaibh luathghaire, sibhse uile a tha ceart ann an cridhe.

An xxxiii. Salm.

Exultate, justi.

DEanaibh gairdeachas 's an Tighearn, sibhse fhìreana : do na h-ionraic tha cliu ciatach.

2 Molaibh an Tighearn air clàrsaich : air an t-saltair, inneal-ciùil nan deich teud, seinnibh dha.

3 Canaibh dha òran nuadh : seinnibh fonn gu h-ealanta, le fuaim àrd.

4 Oir tha focal an Tighearna ceart : agus tha 'oibre uile deanta ann am fìrinn.

5 Is ionmhuinn leis ceartas, agus breitheanas : de mhaitheas an Tighearna tha an talamh làn.

6 Le focal an Tighearna rinneadh na nèamhan : agus le anail a bheoil an slòigh uile.

7 Carnaidh e suas mar thorr uisgeacha na fairge : cuiridh e an doimhne suas 'n a thighibh-tasgaidh.

8 Roimh an Tighearn bitheadh eagal air an talamh uile : roimhe-san bitheadh fiamh air uile luchd-àiteachaidh an domhain ;

9 Oir labhair e, agus bha e ann : dh' àithn e, agus sheas e.

10 Rinn an Tighearn comhairle nan cinneach faoin : thug e innleachdan an t-sluaigh gu neo-ni.

11 Seasaidh comhairle an Tighearna gu sìorruidh : smuaintean a chridhe o linn gu linn.

12 Is beannaichte an cinneach sin, aig am bheil an Tighearn 'n a Dhia dhoibh : an sluagh, a ròghnaich e mar oighreachd dha féin.

13 O na nèamhan amhaircidh an Tighearn a nuas, chi e uile chlann nan daoine : o ionad seasmhach a chòmhnuidh beachdaicheadh e air uile luchd-àiteachaidh na talmhainn.

14 Chum esan an cridhe air aon dòigh : bheir e faineas an gnìomharan uile.

15 Cha tèarnar rìgh le meud 'fheachd : cha saorar laoch le meud a' neirt.

16 Is dìomhain an t-each chum tèaruinteachd : agus le meud a neirt cha saor e.

17 Feuch, tha sùil an Tighearn' orra-san d'an eagal e : orra-san, a chuireas an dòchas 'n a thrècair.

18 Chum an anam a theasairginn o'n bhàs : agus an cumail beò anns a' ghorta.

19 Feithidh ar n-anam air an Tighearn : is esan ar cabhair, agus ar sgiath.

20 Oir ann-san ni ar cridhe gairdeachas : a chionn 'n a ainm naomh-san gu'n do chuir sinn ar dòigh.

21 Gu robh do thrècair, a Thighearn', oirnn : a réir mar a chuir sinn ar dòchas annad.

An xxxiv. Salm.

Benedicam Domino.

BEannaichidh mi an Tighearn gach àm : 'an còmhnuidh bithidh a mholadh ann am bheul.

2 Anns an Tighearn ni m'anam uaill: cluinidh na daoine sèimhe, agus ni iad aoibhneas.

3 Molaibh an Tighearn leam-sa: agus àrdaicheamaid 'Ainm le 'chéile.

4 Dh'iarr mi an Tighearn, agus dh'éisd e rium: agus shaor e mi o gach aobhar eagail a bha agam.

5 Dh'amhaire iad air, agus shoillsicheadh iad: agus cha robh nàire air an gnùis.

6 Ghlaodh an duine bochd so, agus dh'éisd an Tighearn ris: agus as a theanntachdaibh gu léir shaor se e.

7 Campaichidh Aingeal an Tighearna mu 'n timchioll-san d'an eagal e: agus teasairgidh e iad.

8 O blaisibh, agus faicibh gur maith an Tighearn: is beannaichte an duine sin, a dh'earbas as.

9 Bitheadh eagal an Tighearn' oirbh, a Naoimh-san: oir cha bhi dìth air a luchd-eagail-san.

10 Bithidh easbhuidh air na leòmhanaibh òga, agus bithidh ocras orra: ach orra-san a dh'iarras an Tighearn, cha bhi maith air bith a dhìth.

11 Thigibh, a chlann, éisdibh rium: teagaisgidh mi dhuibh eagal an Tighearna.

12 Cò e am fear, a mhiannaicheas beatha: a ghràdhaicheas làithean a dh'fhaicinn maith?

13 Gleidh do theangadh o ole: agus do bhilean o labhairt ceilg.

14 Seachainn an t-ole, agus dean am maith: iarr sìochaint agus lean i.

15 Tha sùilean an Tighearn' air na fireanaibh: agus a chluas r'an glaoth.

16 Tha gnùis an Tighearn' an aghaidh luchd-deanamh uile: chum an cuimhne a ghearradh as o'n talamh.

17 Ghlaodh na fireanan, agus dh'éisd an Tighearn: agus as an teanntachdaibh gu léir shaor e iad.

18 Is dlùth an Tighearn dhoibh-san a tha briste 'n an cridhe? agus saoraidh e iadsan a tha brùite 'n an spiorad.

19 Is lionmhor àmhgharan an fhèirein: ach asda air fad saoraidh an Tighearn e.

20 Gleidhidh an Tighearn a chnàmhan uile: cha bhi aon diubh briste.

21 Marbhaidh ole na h-aingidh: agus iadsan, a tha 'toirt fuath do'n fhìrean, lom-sgriosar iad.

22 Saoraidh an Tighearn anam a sheirbhis-each: agus cha sgriosar aon air bith dhiubh-san, a chuireas an dòigh ann.

URNUIGH MHAIDNE.

An xxxv. Salm.

Judica me, Domine.

TAgair, a Thighearna, riu-san, a thagras a'm' aghaidh: cog 'n an aghaidh-san, a chogas a'm' aghaidh.

2 Glac targaid agus sgiath: agus éirich chum mo chuideachaidh.

3 Agus tarruing a mach an t-sleagh, agus druid an t-slighe 'n an aghaidh-san, a tha 'n tòir orm: abair ri m'anam, Is mi do shlàinte.

4 Nàire agus masladh gu robh orra-san, a tha 'g iarraidh m'anama: gu'm pillear iadsan

air an ais, agus gu robh amhludh orra, a tha 'smuaineachadh uile dhomh.

5 Bitheadh iad mar mholl fa chomhair na gaoithe: agus Aingeal an Tighearna 'g an ruagadh.

6 Bitheadh an slighe dorcha, agus sleamhuin: agus Aingeal an Tighearn' 'an tòir orra.

7 Oir gun aobhar dh'fholuich iad air mo shon an lìon: slochd gun aobhar chladhaich iad air son m'anama.

8 Thigeadh sgrios air gun fhios da, agus a lìon a dh'fholuich e, glacadh se e féin: 's an sgrios sin tuiteadh e.

9 Ach ni m'anam-sa gairdeachas anns an Tighearn: ni e aoibhneas 'n a shlàinte.

10 Their mo chnàmhan uile, A Thighearna, cò is cosmhuil riut-sa, a theasairgeas am bochd uaith-san a's treise na e: agus am bochd agus an t-ainnis uaith-san, a chreachadh e.

11 Dh'éirich fianuisean eucorach: chuir iad as mo leth nithean, air nach robh fios agam.

12 Dhìol iad dhomh ole 'an éiric maith: a' cur rompa mo bheatha a thoirt uam.

13 Ach a m' thaobh-sa, 'n uair a bha iadsan gu tinn, b'é eudach-saic mo chulaidh, dh'irioslaich mi m'anam le trasgadh: agus phill m'urnuigh a'm' uhd féin.

14 Mar gu'm bu charaid, no bràthair dhomh a bhitheadh ann, ghluais mi: mar fhear-caoidh a mhàthar, gu dubhach chrom mi sìos.

15 Ach air bhi dhomh-sa ann an àmhghar, bha iadsan ait, agus chruinnich iad le 'chéile: chruinnich daoine suarach nach b'aithne dhomh

le 'chéile a'm' aghaidh, reub iad, agus cha do sguir iad.

16 Le luchd dian-mhagaidh cealgach: chas iad am fiacra rium.

17 Cia fhad, a Thighearn', a dh'amhairceas tu air so: saor m'anam o am milleadh, m'aonghràidh o na leòmhanaibh.

18 Cliùthaichidh mi thu anns a' mhòr-choimhthional: 'am measg sluaigh honmhoir molaidh mi thu.

19 Na deanadh iadsan, a tha 'n an naimhdibh dhomh gu h-eucorach, gairdeachas os mo cheann: iadsan aig am bheil fuath dhomh gun aobhar, na caogadh iad le'n sùil.

20 Oir cha labhair iad sìth: ach an aghaidh dhaoine ciùine na tìre dealbhaidh iad nithe cealgach.

21 Dh'fhosgail iad am beul gu farsuinn a'm' aghaidh; thubhairt iad: Ahà, ahà, chunnaic ar sùil.

22 Chunnaic thusa so, a Thighearna: na bi a'd' thosd, a Thighearna, na bi fada uam.

23 Tog ort agus mosgail chum mo cheirt: chum mo chùise, mo Dhia, agus mo Thighearna.

24 Thoir breth orm a réir do cheartais, a Thighearna mo Dhia: agus na deanadh iad gairdeachas os mo cheann.

25 Na h-abradh iad 'n an cridhe, Ahà, is e sud ar miann: idir na h-abradh iad, Shluig sinn suas e.

26 Nàire agus amhludh gu robh orra-san le 'chéile, a tha 'deanamh gairdeachais ri m'ole: còmhdaichear le nàire agus masladh iadsan, a dh'ardaicheas iad féin a'm' aghaidh.

27 Deanadh iadsan iolach agus bitheadh iad aoi bhneach, a sheasas mo chùir dhomh: agus abradh iad a ghnàth, Mòr chliù gu robh do an Tighearn, aig am bheil tlachd ann an sìth a sheirbhisich.

28 An sin cuiridh mo theangadh 'an céill do cheartas: air feadh an là do chliu.

An xxxvi. Salm.

Dixit iniustus.

'S E 'their an t-aingidh an taobh a stigh d'a chridhe, gu'm peacaich e: cha-n'èil eagal Dhé fa chomhair a shùl.

2 Oir ni e bàigh ris féin 'n a shùilibh féin: agus am faighear a mach a chionta mar aobhar fuatha.

3 Is euceart, agus cealg briathran a bheoil: leig e dheth 'bhi glic, maith a dheanamh.

4 Dealbhaidh e euceart air a leabaidh, suidhichidh se e féin air slighe nach 'eil maith: cha-n oillteil leis an t-olc.

5 A Thighearn', anns na nèamhan tha do thròcair: tha d'fhìrinn gu ruig na neoil.

6 Tha d'fhìreantachd mar na beanntan àrda: do bhreitheanais 'n an doimhne mhòir.

7 Gleidhidh tusa, a Thighearn', duine agus ainmhidh; Cia luachmhor do chaoimhneas gràdhach, a Dhé: uime sin earbaidh clann nan daoine á sgàile do sgiathan.

8 Sàsuichear iad gu mòr le saill do thighe: agus á amhainn do shòlasan bheir thu orra òl.

9 Oir agad-sa tha tobar na beatha: ann ad sholus-sa chi sinne solus.

10 Buanaich do chaoimhneas gràidh dhoibhsan, a chuir eòlas ort: agus d'fhìreantachd dhoibhsan, a tha ionraic 'n an cridhe.

11 Na tigeadh cos an àrdain orm: agus na gluaiseadh làmh nan aingidh mi.

12 An sin thuit luchd-deanamh na h-euceirt a sìos: leagadh sìos iad, agus cha-n urrainn iad éirigh.

URNUIGH FHEASGAIR.

An xxxvii. Salm.

Noli amulari.

NA bitheadh campar ort mu dhaoinibh aingidh: agus na gabh farmad ri luchd-deanamh na h-euceirt.

2 Oir mar am fear gearrar gu grad sìos iad: agus mar an luibh ghlas seargaidh iad.

3 Earb thusa as an Tighearn, agus dean maith: mar sin gabhaidh tu còmhnuidh 's an tìr, agus beathaichear thu gu cinnteach.

4 Mar an ceudna gabh tlachd anns an Tighearn: agus bheir e dhuit iarrtuis do chridhe.

5 Tabhair suas do shlighe do an Tighearn, agus earb as: agus ni se e.

6 Agus bheir e mach d'fhìreantachd mar an solus: agus do bhreitheanas mar am meadhon-là.

7 Bi ann ad thosd 'an làthair an Tighearn', agus feith le foighidin air: na bitheadh campar ort mu'n tì, a shoirbhicheas 'n a shlighe, mu'n fhear, a bheir a dhroch innleachda gu buil.

8 Leig fearg dhìot, agus tréig corruich: na bitheadh campar ort air aon chor chum uile.

9 Oir gearrar as droch dhaoine : ach iadsan, a dh'fheitheas air an Tighearn, buan-mhealaidh iad an talamh.

10 Oir fathast tamull beag, agus cha bhi an t-aingidh ann : seadh, bheir thu fainear 'àite-san, agus cha bhi e ann.

11 Ach mealaidh daoine macanta an talamh : agus gabhaidh iad tlachd ann am meud na sìth'.

12 Tha'n t-aingidh a' cumadh uile do'n ionraic : agus a' casadh 'fhiacal ris.

13 Ni Dia fanoid air : oir is léir dha, gu bheil a là a' teachd.

14 Tharruing na h-aingidh an claidheamh, agus chuir iad am bogha air ghleus : a leagadh sìos a' bhoichd agus an ainnis, a mharbhadh luchd-deadh-bheus.

15 Théid an claidheamh a steach 'n an cridhe féin : agus brisear am bogha.

16 Is fearr beagan aig an duine ionraic : na saibhreas mhòran dhroch dhaoine.

17 Oir brisear gairdeanan dhroch dhaoine : ach cumaidh Dia suas na fireanan.

18 Is fiosrach Dia air làithibh nan daoine ionraic : agus bithidh an oighreachd gu sìorruidh.

19 Cha chuirear gu nàire iad ann an àm an uile : agus ann an làithibh na gorta sàsuichear iad.

20 Ach sgriosar droch dhaoine, agus bithidh naimhdean an Tighearna mar shaill uan : théid as doibh, mar dheataich théid as doibh.

21 Gabhaidh an t-aingidh air iasachd, agus cha dìol e ris : ach tha 'm firean tràcaireach, agus bheir e uaith.

22 Oir iadsan a' bheannaichear leis, mealaidh iad an talamh : agus iadsan a mhallaichear leis, gearrar as iad.

23 Leis an Tighearn tha ceuman duine air an orduchadh : agus gabhaidh e tlachd 'n a shlighe.

24 Ged thuit e, cha tilgear gu tur sìos e : oir cumaidh an Tighearn suas air làimh e.

25 Bha mi òg, agus a nis tha mi sean : gidheadh cha-n fhaca mi am firean air a thréigsinn, agus a shliochd ag iarraidh arain.

26 Tha e ghnàth truacanta, agus coingheallach : agus bithidh a shliochd beannaichte.

27 Seachainn an t-òle, agus dean am maith : agus gabh còmhnuidh gu bràth.

28 Oir is toigh leis an Tighearn breitheanas : agus cha tréig e a naoimh, gu bràth coimhdear iadsan.

29 Ach gearrar as : sliochd nan aingidh.

30 Mealaidh na fireanan an tìr : agus gabhaidh iad còmhnuidh innte gu bràth.

31 Cuiridh beul an fhèin 'an céill gliocas : agus labhraidh a theangadh breitheanas.

32 Tha lagh a Dhé 'n a chridhe : cha sleamhuich a cheuman.

33 Bithidh an droch dhuine ri faire air an fhìrean : agus iarraidh e a mharbhadh.

34 Cha-n fhàg an Tighearn e 'n a làimh : agus cha dìt se e 'n uair a bheirear breth air.

35 Feith air an Tighearn, agus gleidh a shlighe, agus àrdaichidh e thu, chum an tìr a mhealtuinn : 'n uair a ghearrar as droch dhaoine, chi thu e.

36 Chunnaic mi an duine aingidh ann am

mòr-chumhachd : agus e 'g a sgaoileadh féin a mach mar ùr-chraoibh uaine.

37 Ach chaidh e seachad, agus feuch, cha robh e ann : agus dh'iarr mi e, ach cha d'fhuaras e.

38 Thoir fainear an duine foirfe, agus amhaire air an duine ionraic : oir is i sìth a's crìoch do'n duine sin.

39 Ach sgriosar luchd eusaontais faraon : gearrar as crìoch dhroch dhaoine.

40 Tha slàinte nam firean o'n Tighearn : is esan an neart ann an àm teanntachd.

41 Agus cuidichidh an Tighearn leo, agus teasairgidh e iad : teasairgidh e iad o dhroch dhaoimibh, agus saoraidh e iad, a chionn gu'n d'earb iad as.

URNUIGH MHAIDNE.

An xxxviii. Salm.

Domine, ne in furor.

A Thighearna, na cronuich mi ann ad chorruih : agus na smachdaich mi ann an teas d'fheirge.

2 Oir shàthadh do shaighdean annam : agus tha do làmh trom orm.

3 Cha-n'eil fallaineachd ann am fhèidil, air son d'fheirge : cha-n'eil sìth a'm' chnàmhan, air son mo pheacaidh.

4 Oir chaidh m'euceartan thar mo cheann : mar eire thruim, tha iad ro throm air mo shon.

5 Tha mo chreuchdan lobhta, breun : air son m'amaideachd.

6 Tha mi cràiteach, chromadh sìos mi gu mòr : air feadh an là uile tha mi 'g imeachd gu dubhach.

7 Oir tha mo leasraidh làn de ghalar grannda : agus cha-n'eil fallaineachd a'm' fhèidil.

8 Tha mi lag, agus ro bhrùite : tha mi a' bùireadh trid mi-shuaimhneis mo chridhe.

9 A Thighearna, tha mo mhiann uile a'd' làthair : agus cha-n'eil m'osnaich foluichte ort.

10 Tha mo chridhe a' ploscartaich, thréig mo neart mi : a thaobh fradhaire mo shùl, sin mar an ceudna cha-n'eil agam.

11 Tha luchd mo ghaoil, agus mo chairdean a' seasamh fa chomhair mo leoin : agus tha mo dhùlsean a' seasamh fada uam.

12 Agus tha luchd-iarraidh m'anama a' cur ribeacha romham : agus luchd-iarraidh m'uile a' labhairt nithean aimhleasach, agus a' smuaineachadh ceilge air feadh an là uile.

13 Ach mar dhuine bodhar, cha chluinn mise : agus tha mi mar dhuine balbh, nach fosgail a bheul.

14 Tha mi eadhon mar fhear nach cluinn : agus aig nach 'eil achmhasain 'n a bheul.

15 Oir annad-sa, a Thighearna, chuir mi mo dhòchas : éisdidh tusa, a Thighearna mo Dhia.

16 Oir thubhairt mi, Air eagal gu'n dean iad gairdeachas a'm' aghaidh : 'n uair a shleamhuichead mo chos, gu'n àrdaich siad iad féin a'm' aghaidh.

17 Oir tha mi ealamh gu tuisleachadh : agus tha mo dhoilgheas a'm' fhianuis a ghnàth.

18 Oir aidichidh mi m'euceart : bithidh mi doilich air son mo pheacaidh.

19 Ach tha mo naimhdean beothail, tha iad làidir : agus tha iadsan aig am bheil fuath dhomh gu h-eucorach, air fàs lìonmhor.

20 Agus tha iadsan a dhìolas ole air son maith a' cur a'm' aghaidh: a chionn gu bheil mi 'leantuinn a' mhaith.

21 Na tréig mi, a Thighearna mo Dhia: na bi-sa fada uam.

22 Greas chum mo chuideachaidh: a Thighearna mo shlàinte.

An xxxix. Salm.

Dixi, custodiam.

THubhairt mi, Bheir mi 'n aire do m' shlighibh: nach peacaich mi le m' theangaidh.

2 Gleidhidh mi srian air mo bheul: an uair a bhitheas an duine aingidh a'm' fhianuis.

3 Bha mi balbh, tosdach: dh'fhan mi o labhairt maith féin; ach dhùisgeadh mo dhoilgheas.

4 Dh'fhàs mo chridhe teth 'an taobh a stigh dhìom, 'n uair a bha mi a' beachd-smuaineachadh, las an teine: labhair mi le m' theangaidh.

5 Thoir fios dhomh, a Thighearn', air mo chrìch, agus tomhas mo làithean ciod e: chum gu'm bi fios agam cia gearr mo ré.

6 Feuch, mar leud boise rinn thu mo làithean: agus tha m'aois mar neo-ni a'd' fhianuis, gu deimhin is dìomhanas gach duine d'a fheabhias.

7 Gu deimhin tha gach duine a' siubhal ann an samhladh dìomhain, gu deimhin cuirear misuaimhneas orra gu faoin: carnaidh neach suas beartas, gun fhios aige, cò mhealas e.

8 Agus a nis, ciod ris am feitheam, a Thighearna: tha mo dhòchas annad-sa.

9 Saor mi o m'èusaontais uile: na dean ball-maslaidh an àmadain dhìom.

10 Bha mi ann am thosd, cha d'fhosgail mi mo bheul: a chionn gur tusa a rinn e.

11 Tog dhìom do bhuille: le beum do làimhsa chlaoidheadh mi.

12 Le achmhasain air son euceirt 'n uair a chronaicheas tu duine, bheir thu air a shnuadh caitheamh, mar leòmman: gu deimhin is dìomhanas gach duine.

13 Cluinn m'urnuigh, a Thighearn', agus éisd ri m' ghlaodh: ri m' dheoir na bi a'd' thosd.

14 Oir is coigreach mi maille riut: agus fearcuairt mar m'aithrichean uile.

15 O caomhain mi, chum gu'm faigh mi neart: mu'n siubhail mi, agus nach bi mi ann na's mò.

An xl. Salm.

Expectans expectavi.

DH'fheith mi le foighidin ris an Tighearn: agus chrom e thugam, agus chual' e mo ghlaodh.

2 Agus thug e nìos á slochd uamhuinn mi, á clàbar làthaich: agus chuir e mo chosan air carraig, shocraich e mo cheuman.

3 Agus chuir e òran nuadh ann am bheul: òran-molaidh d'ar Dia.

4 Chi mòran e, agus bithidh eagal orra: agus earbaidh iad as an Tighearn.

5 Is beannaichte an duine sin, a chuireas a dhòchas anns an Tighearn: agus nach seall an déigh nan uaibhreach, no 'n an déigh-san a chlaonas chum bréige.

6 Is lionmhor, a Thighearna mo Dhia, na nithean a rinn thu, d'oibre iongantach, agus do smuainte d'ar taobh-ne : cha-n'eil e 'an comas a chur sìos ann an ordugh dhuit.

7 Nochdainn agus chuirinn 'an céill iad : ach tha iad na's lionmhoire na gu'n gabh iad àireamh.

8 Ann an ìobairt, agus ann an tabhartas cha do ghabh thu tlachd : dh'fhosgail thu mo chluasan.

9 Ìobairt-loisgte agus ìobairt-pheacaidh cha d'iarr thu : an sin thubhairt mi, Feuch, tha mi 'teachd.

10 Ann an rola an leabhair tha e sgrìobhta orm-sa, is e mo thlachd do thoil a dheanamh, a Dhé : seadh, tha do lagh 'an taobh a stigh de m' chridhe.

11 Rinn mi sgeul air d'fhìreantachd 's a' choimhthional mhòr : feuch, cha do choisg mi mo bhilean, a Thighearn', is aithne dhuit.

12 Cha d'fholuich mi d'fhìreantachd ann am meadhon mo chridhe : chuir mi 'n céill d'fhirinn agus do shlàinte.

13 Cha do cheil mi do chaoimhneas gràdhach, agus d'fhirinn : o'n choimhthional mhòr.

14 A Thighearna, na cum-sa do chaomh-thrèairean uam : gleidheadh do chaoimhneas gràdhach, agus d'fhirinn a ghnàth mi.

15 Oir dh'iadh uile gun àireamh mu'n cuairt orm, ghlac m'eucaarta mi, agus cha-n'eil e 'n comas dhomh sealltuinn suas : na's lionmhoire tha iad na falt mo chinn, agus thréig mo chridhe mi.

16 Gu ma toil leat, a Thighearna, mo theas-airginn : greas, a Thighearna, chum mo chuid-eachaidh.

17 Nàire agus amhluadh gu robh orra-san le 'chéile, a tha 'g iarraidh m'anama g'a sgrìos : ruaigear air an àis, agus nàraichear iadsan, a tha 'guidhe uile dhomh.

18 Aonaranach gu robh iadsan, mar thuar-asdal an nàire : a their rium-sa, Ahà, Ahà.

19 Deanadh iadsan uile, a dh'iarras thusa, gairdeachas agus aoibhneas annad : abradh iadsan 'an còmhnuidh, a ghràdhaicheas do shlàinte, Mòr mholadh gu robh do'n Tighearn.

20 Tha mise bochd agus uireasbhuidheach : ach smuainichidh an Tighearn orm.

21 Is tusa m'fhear-cabhair, agus m'fhear-saoraidh : a Dhé, na dean moille.

URNUIGH FHEASGAIR.

An xli. Salm.

Beatus, qui intelligit.

IS beannaichte esan a bheir an aire do'n duine bhochd : ann an là an uile saoraidh an Tighearn e.

2 Gleidhidh an Tighearn e, agus cumaidh e beò e, agus bithidh e beannaichte air thalamh : na tabhair thusa e do thoil a naimhdean.

3 Bheir an Tighearn neart dha air leabaidh a thinneis iarganaich : a leabadh uile ni thusa dha 'n a euslàinte.

4 Thubhairt mi, A Thighearna, dean tròcair orm : leighis m'anam, oir pheacaich mi a' d'aghaidh.

5 Tha mo naimhdean a' labhairt uile orm, ag ràdh: C'uin a gheibh e bàs, agus a sgriosar 'ainm?

6 Agus ma thig neach g'am shealltuinn, labhraidh e dìomhanas: carnaidh a chridhe euceart dha féin, théid e mach, agus labhraidh se e.

7 Tha iadsan uile aig am bheil fuath dhomh a' cogarsaich le 'chéile a'm' aghaidh: tha iad a' dealbh uile a'm' aghaidh.

8 Tha droch ni, ars' iadsan, air teachd air: agus esan a tha nis 'n a luidhe, cha-n éirich e na's mò.

9 Eadhon fear mo shìth', as an d' earb mi: esan a dh'ith de m'aran, thog e a shàil a'm' aghaidh.

10 Ach dean-sa, a Thighearna, tràcair orm: agus tog suas mi, agus bheir mi luigheachd dhoibh.

11 Le so tha fios agam gu bheil tlachd agad-sa annam: a chionn nach 'eil mo nàmhaid a' deanamh caithreim os mo cheann.

12 Ach air mo shon-sa, cumaidh tu suas mi ann am ionracas: agus suidhichidh tu mi a'd' fhianuis gu bràth.

13 Beannaichte gu robh an Tighearna Dia Israeil: o shìdrruidheachd gu sìdrruidheachd. Amen agus Amen.

An xlii. Salm.

Quemadmodum.

MAr a thogras am fiadh chum nan sruth uisge: mar sin tha m'anam a' togairt a d' ionnsuidh-sa, a Dhé.

2 Tha tart air m'anam as déigh Dhé, as déigh an Dé bhed: C'uin a thig mi, agus a nochdar mi 'am fianuis Dhé?

3 Is iad mo dheoir a's biadh dhomh a là agus a dh'oidheche: 'n uair a theirear rium gach là, C'àit am bheil do Dhia?

4 Na nithe so is cuimhne leam, agus tha mi 'dòrtadh a mach m'anama leam féin: oir ghabh mi thairis leis a' mhòr-chuideachd, chaidh mi leo gu tigh Dhé;

5 Le fuaim gairdeachais agus molaidh: leis a' chuideachd a bha 'cumail là féille.

6 C'ar son a tha thu air do leagadh sìos, O m'anam: agus c'ar son a tha thu fo bhuaireas 'an taobh a stigh dhìom?

7 Earb thusa á Dia: oir fathast molaidh mise e, slàinte mo ghnùise, agus mo Dhia.

8 Leagadh sìos m'anam 'an taobh a stigh dhìom: uime sin cuimhnichidh mi ort-sa, mo Dhia, o thìr Iordain, agus o Hermon, o shliabh Mhairsair.

9 Tha doimhne a' gairm air doimhne le fuaim d'fheadan uisge: chaidh do stuidhean agus do thonnan uile tharum.

10 Anns an là àithnidh an Tighearna a thrèd-air: agus 's an oidheche bithidh a laoidh maille rium, agus m'urnuigh ri Dia mo bheatha.

11 Their mi ri Dia mo charraig, C'ar son a dhì-chuimhnich thu mi: c'ar son a tha mi a' triall gu dubhach, air son fòirneirt an eascaraid?

12 Mar chlaidheamh a'm' chnàmhan: tha mo naimhdean a' toirt maslaidh dhomh;

13 'N uair a their iad rium gach là: C'àit am bheil do Dhia?

14 C'ar son a tha thu air do leagadh sìos, O m'anam : agus c'ar son a tha thu fo bhuaireas 'an taobh a stigh dhìom ?

15 Earb thusa á Dia : oir fathast molaidh mise e, slàinte mo ghnùise, agus mo Dhia.

An xliii. Salm.

Judica me, Deus.

THoir breth orm, a Dhé, agus tagair mo chùis o chinneach an-ìochdmhor : o fhear na ceilge agus na h-euceirt, saor thusa mi.

2 Oir is tusa Dia mo neirt, c'ar son a chuir thu mi fada uait : c'ar son a tha mi a' triall gu dubhach, air son fòirneirt an eascaraid ?

3 O cuir a mach do sholus agus d'fhìrinn, seòladh iadsan mi : thugadh iad mi chum do shléibh naoimh-sa, agus chum do phàilliunan.

4 An sin théid mi dh'ionnsuidh altair Dhé, a dh'ionnsuidh Dhé m'aoibhneis ro mhòir : agus molaidh mi thu air a chlàrsaich, a Dhia, mo Dhia.

5 C'ar son a tha thu air do leagadh sìos, O m'anam : agus c'ar son a tha thu fo bhuaireas 'an taobh a stigh dhìom ?

6 Earb thusa á Dia : oir fathast molaidh mise e, slàinte mo ghnùise, agus mo Dhia.

URNUIGH MHAIDNE.

An xliv. Salm.

Deus, auribus.

ADhe, le'r cluasaibh chuala sinn, dh'innis ar n-aithriche dhuinn : an obair a rinn thu 'n an làithibh-san, anns na làithibh o shean.

2 Le d'làimh thilg thu mach na cinnich, ach shuidhich thu iadsan : chlaoidh thu na slòigh, ach thug thu orra-san soirbheachadh.

3 Oir cha-n ann le'n claidheamh féin a fhuair iad sealbh 's an tìr : agus cha-n e an gairdean féin a shaor iad.

4 Ach do dheas làmh, agus do ghairdean-sa, agus solus do ghnùise : a chionn gu robh deadh-ghean agad doibh.

5 Is tu féin mo Rìgh, a Dhé : àithn thusa saorsa do Iacob.

6 Tromhad-sa buailidh sinn ar naimhdean : trèd d'Ainme-sa saltraidh sinn orra-san, a dh'éireas 'n ar n-aghaidh.

7 Oir as mo bhogha cha-n earb mi : agus cha saor mo chlaidheamh mi.

8 Ach shaor thusa sinn o ar naimhdibh : agus nàraich thu iadsan aig an robh fuath dhuinn.

9 A Dia ni sinne uail air feadh an là : agus d'Ainm-sa molaidh sinn gu sìorruidh.

10 Ach a nis thilg thu uait sinn, agus nàraich thu sinn : agus cha-n'èil thu 'dol a mach le'r n-armailtibh.

11 Thug thu oirnn tionndadh air ar n-ais o'n nàmhaid : agus tha iadsan le'm fuathach sinn 'g ar creachadh.

12 Thug thu sinn mar chaoraich air son bidh : agus 'am measg nan cinneach sgap thu sinn.

13 Reic thu do shluagh gun luach : agus cha do mheudaich thu do mhaoin le'm prìs.

14 Rinn thu sinn 'n ar masladh d'ar coimhearsnaich : 'n ar ball-fanoid, agus magaidh dhòibh-san a tha mu'n cuairt oirnn.

15 Rinn thu gnàth-fhocal dhinn 'am measg nan cinneach: aobhar crathaidheinn 'am measg an t-sluaigh.

16 Fad an là tha m'amhluidh a'm' fhianuis: agus chòmhdaich nàire mo ghnùis' mi.

17 Air son guth' an fhir a bheir masladh, agus toibheum: air son fianuis an nàmhaid, agus an dìoghaltaich.

18 Thàinig so uile oirnn, gidheadh cha do dhì-chuimhnich sinn thu: agus cha d'rinn sinn cealg ann ad choimhcheangal.

19 Cha do thionndaidh ar cridhe air ais: agus cha do chlaon ar cos o d' shlighe;

20 Ged a mhìn-phronn thu sinn ann an ionad dhràgon: agus ged a chòmhdaich thu sinn le sgàil' a' bhàis.

21 Ma dhì-chuimhnich sinn Ainm ar Dé, no ma shìn sinn ar làmhann gu dia coimheach: nach rannsaich Dia so a mach? oir tha fios aige-san air nithibh dìomhair a' chridhe.

22 Ach air do shon-sa mharbhadh sinn ré an là gu léir: mheasadh sinn mar chaoraich chum casgraidh.

23 Mosgail, c'ar son a choidleas tu, a Thigh-earna: dùisg, na tilg sinn uait gu bràth.

24 C'ar son a dh'fholaicheas tu do ghnùis: a dhì-chuimhnicheas tu ar n-àmhghar, agus ar fòirneart?

25 Oir chromadh sìos ar n-anam do'n ùir: dhlùth-lean ar com ris an talamh.

26 Eirich, cuidich leinn: agus saor sinn air sgàth do thròcair.

An xlv. Salm.

Eruclavit cor meum.

THa mo chridhe a' deachdadh deadh ni: cuiridh mi 'an céill na nithean a rinn mi do'n Rìgh.

2 Bithidh mo theangadh mar pheann: fir-sgrìobhaidh dheis.

3 Is maisiche thu na clann nan daoine: dhòirteadh gràs ann ad bhilibh, uime sin bheannaich Dia thu gu bràth.

4 Crioslaich do chlaideamh air do leis, O 'ghaisgich: le d' ghlòir, agus le d' mhòralachd.

5 Marcaich air d'aghaidh gu buadhach: air sgàth na firinn, agus na macantachd, agus na fireantachd, agus teagaisgidh do dheas làmh dhuit nithean uamhasach.

6 Is geur do shaighdean, tuitidh na slòigh fodhad: is geur iad ann an cridhe naimhdean an rìgh.

7 Tha do rìgh-chaithir, a Dhé, gu saoghal nan saoghal: is slat cheartais slat-shuaicheantais do rìoghachd-sa.

8 Ghràdhaich thusa fireantachd, agus thug thu fuath do aingidheachd: uime sin dh'ung Dia, do Dhia-sa, thu le h-olaidh aoibhneis os ceann do chompanach.

9 De Mhìrr, agus de Alos, agus de Chasia, théid fàile o d' thrusgan uile: a mach á lùch-airtibh de fhiacalbh elephant, leis an do chuireadh aoibhneas ort.

10 Tha nigheana rìghrean 'am measg do bhan urramach: seasaidh do Bhan-rìghinn air do dheas làimh, ann an òr na h-Ophir.

11 Eisd, a nighean, agus amhaire, agus aom do chluas : agus dì-chuimhnich do shluagh féin, agus tigh d'athar.

12 An sin gabhaidh an Rìgh mòr-thlachd ann ad àilleachd : a chionn gur esan do Thighearn, thoir-sa urram dha.

13 Thig eadhon nighean Thìoruis le tiodhlac : asluichidh daoine saobhir an t-sluaigh do dheadh-ghean.

14 Uile glòrmhor tha nighean an rìgh a stigh : air 'oibreachadh le òr tha a h-eideadh.

15 Ann an trusgan a dh' obair ghréis bheirear i chum an Rìgh : bheirear na maighdeana 'n a déigh, a bana-chompanaich, a steach thugad.

16 Bheirear iad le aoibhneas, agus le gairdeachas : théid iad a steach do lùchairt an Rìgh.

17 'An àite d'aithriche bithidh do mhic : ni thu iad 'n an uachdarain air an talamh uile.

18 Bheir mi air d'Ainm a bhi air chuimhne anns gach linn a thig : uime sin molaidh an sluagh thu, gu saoghal nan saoghal.

An xlv. *Salm.*

Deus noster refugium.

IS e Dia ar tearmunn agus ar neart : ar cabhair ro dheas ann an teanntachdaibh.

2 Air an aobhar sin cha bhi eagal oirnn ged ghluaisear an talamh : agus ged atharruichear na beannta gu meadhon na fairge.

3 Ged bheuc a h-uisgeachan, agus ged chuirear thar a chéile iad : ged chrìochnuich na beannta le a h-ataireachd,

4 Tha amhainn ann, agus ni a sruithean caithir Dhé ait : naomh-ionad phàilliu an Tì a's àirde.

5 Tha Dia 'n a meadhon, cha ghluaisear i : cuidichidh Dia leatha gu moch air mhaduinn.

6 Ghabh na cinnich boile, ghluaiseadh na rìoghachdan : chuir e mach a ghuth, leagh an talamh.

7 Tha Dia nan slògh leinn : is e Dia Iacoib a's dèdan duinn.

8 Thigibh, faicibh oibre an Tighearna : gach léir-sgrìos a rinn e air thalamh.

9 Coisgidh e an cogadh gu ionnall na talmhainn : brisidh e am bogha, agus gearraidh e an t-sleagh, na carbadan-cogaidh loisgidh e le teime.

10 Bithibh sàmhach, agus tuigibh gur mise Dia : àrdaichear mi 'am measg nan cinneach, àrdaichear mi air thalamh.

11 Tha Dia nan slògh leinn : is e Dia Iacoib a's dèdan duinn.

URNUIGH FHEASGAIR.

An xlvii. *Salm.*

Omnes gentes, plaudite.

BUailibh 'ur basan, uile shlòigh : togaibh Ìolach do Dhia le guth gairdeachais.

2 Oir tha an Tighearn, an Tì a's àirde, 'n a aobhar eagail : is Rìgh mòr e os ceann na talmhainn uile.

3 Cuiridh e na slòigh fo ar smachd : agus na cinnich fo ar cosaibh.

4 Taghaidh e ar n-oighreachd dhuinn : òir-dheirceas Iacoib, a ghràdhaich e.

5 Chaidh Dia suas le caithream : an Tighearn le fuaim trompaid.

6 Seinnibh moladh do Dhia, seinnibh : seinnibh moladh d'ar Rìgh, seinnibh.

7 Oir is e Dia Rìgh na talmhainn uile : seinnibh moladh gu h-eòlach.

8 Tha Dia 'n a Rìgh os ceann nan cinneach : tha Dia 'n a shuidhe air rìgh-chaitheir a naomhachd.

9 Chruinnicheadh uachdarain nan sluagh le 'chéile, sluagh Dhé Abraham : oir is le Dia sgiathan na talmhainn, tha e air 'àrdachadh gu mòr.

An xlviii. Salm.

Magnus Dominus.

IS mòr an Tighearn, agus is ro airidh air cliu e : ann am baile ar Dé, ann an sliabh a naomhachd.

2 Tha sliabh Shioin sgiamhach 'n a shuidheachadh, is e aoibhneas na talmhainn uile : air an taobh mu thuath tha baile an Rìgh mhòir ; aithnichear Dia 'n a lùchairtibh mar thearmunn.

3 Oir feuch, chruinnicheadh na rìghrean : ghabh iad thairis le 'chéile.

4 Chunnaic iad, agus b'ìoghnadh leo : bha uamhas orra, ghreas iad orra.

5 Ghlac geilt-chrith iad an sin : pian mar phéin mnatha ri saothair.

6 Le gaoith an ear : mion-bhrisidh tu longa Tharsis.

7 Mar a chuala sinn, is amhuil a chunnaic sinn ann am baile Tighearna nan slògh ; ann am baile ar Dé : daingnichidh se e gu bràth.

8 Smuainich sinn air do chaoimhneas gràidh, a Dhé : ann am meadhon do theampuill.

9 Mar d'Ainm, a Dhé, mar sin tha do chliu gu crìochaibh na talmhainn : tha do dheas làmh làn de fhìreantachd.

10 Deanadh sliabh Shioin aoibhneas, deanadh nigheanan Iudah gairdeachas : air son do bhreitheanas.

11 Cuairtichibh Sion, agus rachaibh m'a timchioll : àirmhibh a tùir.

12 Thugaibh an aire d'a balla làidir, comharaichibh a lùchairtean : chum gu'n cuir sibh 'an céill e do'n àl ri teachd.

13 Oir is e an Dia so ar Dia-ne gu saoghal nan saoghal : stiùraidh e sinn gu ruig am bàs.

An xlix. Salm.

Audite hæc, omnes.

CLuinnibh so, a shlòigh uile : éisdibh, sibhse uile luchd-àiteachaidh an domhain.

2 Araon a dhaoine ìosal agus àrd, beartach agus bochd : le 'chéile.

3 Labhraidh mo bheul gliocas : agus smuainichidh mo chridhe air tuigse.

4 Aomaidh mi gu cosamhlachd mo chluas : nochdaidh mi air a' chlàrsaich mo ràdh dorcha.

5 C'ar son a bhitheadh eagal orm ann an làithibh an uile : 'n uair a chuairticheas aingidheachd m'èascairdean mi,

6 A dh'earbas as an saobhreas : agus a ni uail á pailteas am beartais ?

7 Cha-n urrainn duine air chor sam bith a bhràthair a shaoradh : no éiric a thabhairt do Dhia air a shon ;

8 Oir tha saorsa an anama luachmhor : agus sguiridh e am feasd ;

9 Gu maireadh e beò gu storruidh : agus nach faiceadh e truaillidheachd.

10 Oir chi e gu faigh na daoine glìce bàs, gu'n sgrìosar le 'chéile an t-amadan agus an t-ùmaidh : agus gu fàg iad am beartas aig daoibh eile.

11 Is iad smuaintean an cridhe gu mair an tìghean gu bràth : an ionada-còmhnuidh o linn gu linn ; bheir iad ainm air am fearann, a réir an ainme féin.

12 Ach, ged robh an duine ann an urram, cha mhair e : is cosmhuil e ris na h-ainmhidhean, a ghearrar as ; is i so an slighe.

13 Eadhon an amaideachd : gidheadh gabhaidh an sliochd tlachd 'n an cainnt.

14 Mar chaoraich cuirear iad 's an uaigh, ithidh am bàs iad, agus bithidh uachdaranachd aig na fireanaibh os an ceann anns a' mhaduinn : seargaidh an dreach as anns an uaigh, an ionad-còmhnuidh.

15 Ach saoraidh Dia m'anam-sa o chumhachd na h-uaighe : oir gabhaidh e mi d'a ionnsuidh.

16 Na gabh thusa eagal an uair a dh'fhàsas duine beartach : 'n uair a mheudaichear glòir a thighe ;

17 Oir 'n uair a gheibh e bàs, cha toir e ni air bith leis : cha téid a ghlòir sìos 'n a dhéigh.

18 Ged bheannaich e 'anam féin, an uair a tha e beò : agus molar thusa, 'n uair a ni thu maith dhuit féin.

19 Théid e gu àl a shinnsear : gu bràth cha-n fhaic iadsan solus.

20 Tha an duine a tha ann an urram, agus a tha gun tuigse : cosmhuil ris na h-ainmhidhean a ghearrar as.

URNUIGH MHAIDNE.

An l. Salm.

Deus deorum.

L Abhair Dia nan dia, Iehobhah : agus ghairm e an talamh o éirigh gu ruig luidhe gréine.

2 A mach á Sion, iomlaine na maise : dhealruich Dia.

3 Thig ar Dia-ne, agus cha bhi e 'n a thosd : roimh a ghnùis lasaidh teine millteach, agus mu'n cuairt air bithidh doinionn mhòr.

4 Gairmidh e air na nèamhan o'n àirde : agus air an talamh, chum breth a thoirt air a shluagh.

5 Cruinnichibh mo naoimh a m' ionnsuidh : iadsan a rinn coimhcheangal rium le 'obairt.

6 Agus cuiridh na nèamhan 'an céill a cheartas : oir is e Dia féin a's Breitheamh ann.

7 Eisdibh, O mo shluagh, agus labhraidh mi : O Israeil, agus ni mi fianuis a'd' aghaidh ; is mise Dia, do Dhia-sa.

8 Air son d' 'obairtean cha-n agair mi thu : oir tha d' 'obairtean-loisgte a ghnàth ann am fhianuis.

9 Cha ghabh mi tarbh òg as do thigh : no gabhair fhìrionn as do mhanniribh.

10 Oir is leam-sa uile bheathaiche na coille : an spréidh air mìle sliabh.

11 Is aithne dhomh-sa uile eunlaith nam beann : agus is leam-sa fiadh-bheathaiche na macharach.

12 Nam bithinn ocrach, cha-n innsinn duit-sa : oir is leam-sa an domhan, agus a làn.

13 An e gu'n ithinn feòil tharbh : agus an òlainn fuil ghabhar ?

14 Iobair iobairt-bhuidheachais do Dhia : agus ioc do bhòidean do an Ti a's àirde.

15 Agus gairm orm ann an là teanntachd : saoraidh mise thu, agus bheir thusa glòir dhomh-sa.

16 Ach ris an droch dhuine their Dia : Ciod e do ghnothuch-sa mo reachdan a chur 'an céill, no gu'n gabhadh tu mo choimhcheangal ann ad bheul ;

17 'N uair tha fuath agad air fòghlum : agus a thilg thu mo bhriathran air do chùl ?

18 Ma chunnaic thu gaduiche, dh'ontaich thu leis : agus maille ri luchd-adhaltranais bha do chuibrionn.

19 Chuir thu do bheul chum uile : agus dhealbhadh do theangadh cealg.

20 Shuidh thu, agus an aghaidh do bhràthar labhair thu : agus do mhac do mhàthar thug thu beum.

21 Na nithe so rinn thu, agus dh'fhan mise ann am thosd ; shaoil thu, gu'n robh mi gu tur mar thu féin : cronaichidh mi thu, agus cuiridh mi gach ni 'an ordugh fa chomhair do shùl.

22 Smuainichibh a nis air so, sibhse nach cuimhnich Dia : air eagal gu'n reub mi as a chéile, gun neach ann a theasairgeas.

23 Esan a dh'obras moladh, bheir e glòir dhomh-sa : agus dhà-san a dh'orduicheas a shlighe, nochdaidh mi slàinte Dhé.

An li. Salm.

Miserere mei, Deus.

DEan tròcair orm, a Dhé, a réir do chaoimhneis-gràidh : a réir lìonmhoireachd do chaomh-thròcairean dubh as m'eusaontas.

2 Gu h-iomlan ionnail mi o m' lochd : agus glan mi o m' pheacadh.

3 Oir tha mi ag aideachadh m'eusaontais : agus tha mo pheacadh a'm' làthair a ghnàth.

4 A'd'aghaidh, a'd'aghaidh féin a mhàin pheac-aich mi, agus rinn mi olc a'd' shealladh : air chor as gu fireanaichear thusa 'n uair a labhras tu, gu'm bi thu glan, 'n uair a bheir thu breth.

5 Feuch, ann an euceart dhealbhadh mi : agus ann am peacadh ghabh mo mhàthair mi 'n a broinn.

6 Feuch, is ionmhuinn leat an fhèrinn 's an taobh a stigh : agus anns an ionad fholuichte bheir thu orm gliocas a thuigsinn.

7 Glan mi le hìosop, agus bithidh mi glan : ionnail mi, agus bithidh mi na's gile na sneachda.

8 Thoir orm guth subhachais, agus aoibhneis a chluinntinn : agus ni na enàmhan, a bhris thu, gairdeachas.

9 Folaich do ghnùis o mo pheacaidhean : agus dubh as m'eucearta gu léir.

10 Cruthaich annam cridhe glan, a Dhé : agus ath-nuadhaich spiorad ceart 'an taobh a stigh dhìom.

11 Na tilg mi o d' shealladh : agus na toir do Spiorad naomh uam.

12 Aisig dhomh gairdeachas do shlàinte: agus le d' Spiorad saor cum a suas mi.

13 Teagaisgidh mi do luchd-eusaontais do shlighean: agus iompaichear peacaich a d' ionnsuidh.

14 Saor mi o chionta fola, a Dhé, a Dhé mo shlàinte: àrd-mholaidh mo theangadh d'fhìr-eantachd.

15 A Thighearna, fosgail mo bhilean: agus cuiridh mo bheul 'an céill do chliu.

16 Oir cha-n iarr thu ìobairt, no bheirinn dhuit i: ann an ìobairt-loisgte cha-n'eil tlachd agad.

17 Is iad ìobairtean Dhé spiorad briste: air cridhe briste agus brùite, a Dhé, cha dean thusa tàir.

18 Dean maith, ann ad dheadh-ghean, do Shion: tog suas ballachan Ierusalem.

19 An sin taitnidh ìobairtean ionracais riut, ìobairtean-loisgte agus làn ìobairtean-loisgte: an sin ìobraidh iad tairbh òga air d'altair.

An lii. Salm.

Quid gloriaris?

C'Ar son a ni thu uail ann an olc: O 'ghaisgich?

2 Mairidh maitheas Dhé: do ghnàth.

3 Dealbhaidh do theangadh aimhleas: mar ealtuinn ghéir, ag oibreachadh ceilge.

4 Is annsa leat an t-olc na maith: a' bhreug na briathran a' cheartais.

5 Is ionmhuinn leat gach focal millteach: a theangadh chealgaich.

6 Uime sin sgriosaidh Dia thu gu bràth: bheir e air falbh thu, agus tairngidh e as do phàilliun thu, agus spionaidh e do fhreumhan á tìr nam beò.

7 Agus chi na fireanan, agus bithidh eagal orra: agus ni iad gàire uime, ag ràdh,

8 Feuch, so am fear, nach d'rinn a neart de Dhia: ach a dh'earb á pailteas a bheartais, agus a neartaich e féin 'n a aingidheachd.

9 Ach bithidh mise mar chrann-olaidh uaine ann an tigh Dhé: earbaidh mi á tràcair Dhé gu saoghal nan saoghal.

10 Molaidh mise thu gu sìorruidh, a chionn gu'n d'rinn thu e: agus feithidh mi air d'Ainm-sa, oir tha e maith 'an làthair do naomh.

URNUIGH FHEASGAIR.

An liii. Salm.

Dicit insipiens.

T Hubhairt an t-amadan 'n a chridhe: Cha-n 'eil Dia ann.

2 Tha iad truailidh, agus rinn iad aingidh-eachd ghràineil: cha-n'eil neach ann a ni maith.

3 Dh'amhaire Dia a nuas o nèamh air cloinn nan daoine: a dh'fheuchainn an robh neach ann a bha glic, a bha 'g iarraidh Dhé.

4 Chaidh gach aon diubh air ais, tha iad gu léir air fàs salach: cha-n'eil neach ann a ni maith, cha-n'eil eadhon aon.

5 Nach 'eil eòlas aca-san a tha 'deanamh na h-eucorach: a tha 'g itheadh suas mo shluaigh, mar a dh'itheadh iad aran, agus nach gairm air Dia?

6 An sin ghabh iad cagal mòr, an uair nach robh aobhar eagail ann : sgaoil Dia a chnàmhasan o 'chéile, a champaich a'd' aghaidh; nàraich thu iad, a chionn gu'n d'rinn Dia tàir orra.

7 O gu'n tigeadh slàinte Israeil a mach á Sion : An uair a bheir Dia air ais braighdeanas a shluaigh,

8 Ni Iacob gairdeachas : ni Israel aoibhneas.

An liv. Salm.

Deus, in nomine.

A Ir sgàth d'Ainme, a Dhé, saor thusa mi : agus le d' chumhachd cum cothrom rium.

2 Cluinn m'urnuigh, a Dhé : éisd ri briathraibh mo bheoil.

3 Oir dh'éirich coigrich a'm' aghaidh : agus dh'iarr luchd-fòirneirt mo bheatha, cha do chuir iad Dia fa'n comhair.

4 Feuch, is e Dia m'fhear-cuideachaidh : tha'n Tighearn dhiubh-san a chumas suas mo bheatha.

5 Diolaidh e ole do m' naimhdibh : a'd' fhèrrinn gearr as iad.

6 Le saor thoil bheir mi ìobairt dhuit, molaidh mi d'Ainm, a Thighearn' : oir tha e maith.

7 Oir shaor thu mi as gach teinn : agus chunnaic mo shùil momhiann air mo naimhdibh.

An lv. Salm.

Exaudi, Deus.

E Isd a Dhé, ri m'urnuigh : agus na folaich thu féin o m'asluchadh.

2 Thoir aire dhomh, agus éisd rium : tha mi àrd ann am ghearan, agus ri bhìreadh.

3 Air son gutha m'eascaraid, air son fòirneirt an duine aingidh : oir tha iad a' tilgeadh euceirt orm, agus ann am feirg tha iad a' toirt fuatha dhomh.

4 Tha mo chridhe air a chràdh 'an taobh a stigh dhìom : agus thuit uamhasan a' bhàis orm.

5 Thàinig eagal agus crith orm : agus chòmhdaich uamhunn mi.

6 Agus thubhairt mi, Och, nach robh agam sgiathan : mar choluman theichinn as air iteig agus gheibhinn fois.

7 Feuch, shiùbhlainn fad as : chòmhnuichinn anns an fhàsach.

8 Dheanainn deifir gu dol as : o ghaoith làidir agus o'n doinninn.

9 Sgrìos, a Thighearn', agus roinn an teangadh : oir chunnaic mi fòirneart, agus connsachadh 's a' bhaile.

10 A là agus a dh'oidhche tha iad a' dol mu'n cuairt air, air a bhallachaibh : agus tha euceart agus aimhleas 'n a mheadhon.

11 Tha aingidheachd 'n a mheadhon : agus cha dealaich foill, agus cealg r'a shràidibh.

12 Oir cha bu nàmhaid a thug masladh dhomh : no dh'fhuilginn e.

13 Cha b'e fear le'm b'fhuathach mi, a dh'àrdaich e féin a'm' aghaidh : no dh'fholaichinn mi féin uaith.

14 Ach thusa, fear a bu choimpire dhomh féin : fear m'iùil, agus fear m'edlais.

15 Le 'cheile ghabh sinn comhairle bhlasda : gu tigh Dhé dh'imich sinn cuideachd.

16 Gabhadh am bàs sealbh orra, rachadh iad sìos beò do'n uaigh: oir tha uile 'n an àite-còmhnuidh, 'n am meadhon.

17 Glaodhaidh mise ri Dia: agus saoraidh Iehobhah mi.

18 Air feasgar, air maduinn, agus aig meadhon-là ni mi urnuigh, agus glaodhaidh mi gu h-àrd: agus éisdidh esan ri m' ghuth.

19 Saoraidh e m'anam ann an sìth, o'n chòmhrag a'm' aghaidh: oir is lionmhor iad a tha 'strì rium.

20 Eisdidh Dia, agus bheir e nuas iad, eadhon esan a tha ann o chian: oir cha-n'èil atharrachadh orra, agus cha-n'èil eagal Dhé orra.

21 Shìn e mach a làmh 'n an aghaidh-san a bha ann an sìth ris: bhris e a choimhcheangal.

22 Bu mhèine na ìm focail a bheoil, ach bha cogadh 'n a chridhe: bu bhuige a bhriathra na oladh, ach bu chlaidhean rùisgte iad.

23 Tilg air an Tighearn do chùram, agus cumaidh esan suas thu: cha leig e am feasd do'n fhìrean a bhi air a ghluasad.

24 Ach tilgidh tusa, a Dhé, sìos iad: gu slochd an sgrios.

25 Cha mhair daoine fuileachdach, agus cealgach leth an làithean: ach cuiridh mise mo dhòigh annad-sa.

URNUIGH MHAIDNE.

An lvi. Salm.

Miserere mei, Deus.

DEan iochd orm, a Dhé, oir b'àill le duine mo shlugadh suas: tha e 'g am shàrachadh gach là, le cogadh.

2 B'àill le m'easeairdibh mo shlugadh suas gach là: oir is lionmhor iad a tha 'cogadh rium o ionad àrd.

3 'S an là air am bi eagal orm: earbaidh mi asad-sa.

4 Ann an Dia molaidh mi 'fhocal: ann an Dia chuir mi mo dhòigh, cha-n eagal leam ciod a dh'fheudas fèil a dheanamh orm.

5 Gach là tha iad a' fiaradh mo bhriathar: tha an smuaintean uile a'm' aghaidh chum uile.

6 Tha iad a' cruinneachadh le 'chéile, tha iad 'g am folach féin: tha iad a' toirt fainear mo cheuman, 'n uair a tha iad a' feitheamh air son m'anama.

7 Le eucoir an téid iad as: ann ad fheirg tilg sìos na slòigh, a Dhé.

8 Rinn thu mo sheacharain àireamh, cuir mo dheoir ann ad shearraig: nach 'eil iad ann ad leabhar?

9 An sin pillear mo naimhdean air an ais, 's an là a ghairmeas mi ort: air so tha fios agam; oir tha Dia leam.

10 Ann an Dia molaidh mi 'fhocal: anns an Tighearn molaidh mi 'fhocal.

11 Ann an Dia chuir mi mo dhòigh: cha-n eagal leam ciod a dh'fheudas duine a dheanamh orm.

12 Orm-sa, a Dhé, tha do bhòidean: locaidh mi cliu dhuit.

13 Oir shaor thu m'anam o'n bhàs, agus mar an ceudna mo chosan o thuisleadh: chum gu'n gluaisinn ann ad fhianuis, a Dhé, ann an solus nam beò.

An lvii. Salm.

Miserere mei, Deus.

DEan tràcair orm, a Dhé, dean tràcair orm, oir annad-sa tha m'anam a' cur a dhòigh: agus fo sgàile do sgiathan gabhaidh mi mo thearmunn, gus an téid na h-uile so uile thairis.

2 Eighidh mi ris an Dia a's àirde: ri Dia a choimhlionas nithean air mo shon.

3 Cuiridh e neart o nèamh: agus saoraidh e mi, bheir e masladh do'n fhear le'm b'àill mo shlugadh suas.

4 Cuiridh Dia á mach a thrècair agus 'fhèrinn: tha m'anam 'am measg leòmhan.

5 Tha mi a'm' luidhe 'am measg dream air lasadh: daoine aig am bheil am fiacra 'n an sleaghan, agus 'n an saighdean, agus an teangadh 'n a claidheamh geur.

6 Ardaich thu féin os ceann nan nèamh, a Dhé: do ghlòir os ceann na talmhainn uile.

7 Dheasaich iad lion fa chomhair mo cheum, chrom iad m'anam a sìos: chladhaich iad slochd romham, thuit iad féin 'n a mheadhon.

8 Tha mo chridhe deas, a Dhé, tha mo chridhe deas: seinnidh mi, agus molaidh mi.

9 Mosgail, mo ghlòir; mosgail, a shaltair, agus a chlàrsach: mosglaidh mi féin moch air mhaduinn.

10 Molaidh mi thu 'am measg nan sluagh, a Thighearna: seinnidh mi dhuit 'am measg nan cinneach.

11 Oir is mòr do thrècair gu ruig na nèamhan: agus d'fhèrinn gu ruig na neula.

12 Ardaich thu féin os ceann nan nèamh, a Dhé: do ghlòir os ceann na talmhainn uile.

An lviii. Salm.

Si vere utique.

AN labhair sibh, a choimhthionail, da rìreadh 'an ceartas: an toir sibh breth gu cothromach, a chlann nan daoine?

2 Seadh, 'n 'ur cridhe tha sibh a' dealbh aingidheachd: air talamh tha sibh a' tomhas fòirneirt 'ur làmh.

3 Tha na h-aingidh a' claonadh o'n bhroinn: tha iad a' dol air seacharan o'm breith, a' labhairt bhreug.

4 Tha an nimh mar nimh nathrach: tha iad mar nathair bhodhar, a dhruideas a cluas;

5 Nach éisd ri guth nan druidh: a tha ro sheòlta 'n an druidheachd.

6 Bris am fiacra, a Dhé, 'n am beul, pronn gu tur tuisg nan leòmhan òga, a Thighearna: leaghadh iad, mar uisgeachan a ruitheas gu saor, cuireadh Dia a shaighdean 'n an aghaidh, agus gearrar as iad.

7 Mar sheilcheig a bhitheas a' leaghadh as, rachadh iad as, mar thorraicheas anabuich mnatha: na faiceadh iad a' ghrian.

8 Mu'm mothaich 'ur coireacha teas o'n droighnich: bheir e air falbh iad mar le iomaghaoith, araon beò, agus 'n a chorruich.

9 Bithidh aobhneas air an fhèan an uair a chi e an dioghaltas: nighidh e a chosan ann am fuil an duine aingidh.

10 An sin their duine, Gu deimhin tha duais ann do'n fhèan: gu cinnteach tha Dia ann a tha 'toirt breth air an talamh.

URNUGH FHEASGAIR.

An lix. Salm.

Eripe me de inimicis.

TEasaing mi o m' naimhdibh, O mo Dhia : dhon mi uatha-san a tha 'g éirigh a'm' aghaidh.

2 Teasaing mi o luchd-deanamh na h-euceirt : agus o dhaoinibh fuileachdach saor mi.

3 Oir feuch, tha iad a' feitheamh nam fàth an aghaidh m'anama : tha daoine cumhachdach air cruinneachadh a'm' aghaidh, cha-n ann air son mo lochd-sa, no air son mo pheacaidh, a Thighearna.

4 Gun choire agam-sa ruithidh iad agus ulluichidh siad iad féin : mosgail thusa a chuid-eachadh leam, agus amhaire.

5 O thusa, a Thighearna, a Dhé nan sluagh, a Dhé Israeil, mosgail a dh'fhiosrachadh nan cinneach uile : na dean iochd air luchd-eusaontais ciontach sam bith.

6 Pillidh iad 's an fheasgar : ni iad donnalach mar choin, agus théid iad mu'n cuairt air a' bhaile.

7 Feuch, brùchdaidh iad a mach le'm beul, tha claidhean 'n am bilibh : oir cò, ars' iadsan, a chluinneas ?

8 Ach ni thusa, a Thighearna, gàire umpa : ni thu fanoid air na cinnich uile.

9 O thusa mo neart, feithidh mi ort : oir is e Dia mo dhaingneach.

10 Mo Dhia, gabhaidh a thrècair romham : bheir Dia dhomh gu faic mi mo mhiann air m'eascairdibh.

11 Na marbh iad, air eagal gu'n dì-chuimh-nich mo shluagh : sgaoil iad le do neart, agus leag gu h-ìosal iad, a Thighearna' ar sgiath.

12 Air son peacaidh am beoil, air son bhriathar am bilean glàcar iad 'n an àrdan : eadhon air son nam mallachd agus nam breug a labhras iad.

13 Sgrios iad ann am feirg, sgrios iad, agus na bitheadh iad ann : agus bitheadh fios aig daoine gu bheil Dia 'n a uachdaran ann an Iacob, gu ruig crìocha na talmhainn.

14 Pillidh iad 's an fheasgar : ni iad donna-laich mar choin, agus théid iad mu'n cuairt air a' bhaile.

15 Gabhaidh iad a null agus a nall air son bidh : agus mur sàsuichear iad, ni iad gearan.

16 Ach seinnidh mise mu d' neart, agus àrd-mholaidh mi 's a' mhaduinn do thrècair : oir bu tusa mo dhaingneach, agus mo dhìdean, ann an là mo theanntachd.

17 O thusa, mo neart, seinnidh mi dhuit : oir is e Dia mo dhaingneach, mo Dhia-sa, mo thrècair.

An lx. Salm.

Deus, repulisti nos.

ADhé, thilg thu uait sinn, sgap thu sinn : bha fearg ort, O pill thusa ruinn.

2 Chuir thu an talamh air chrith, bhris thu e : slànùich a bhriseadh, oir tha e air a luasgadh.

3 Nochd thu do d' shluagh nithe cruaidhe : thug thu oirn fion a' bhuaireis òl.

4 Thug thu bratach dhoibh-san d'an eagal thu : gu bhi air a togail suas air sgàth na firinn.

5 Chum gu'n teasairgear iadsan a's ionmhuinn leat: saor thusa le d'dheas làimh, agus éisd rium.

6 Labhair Dia 'n a naomhachd, ni mi aoibhneas, roinnidh mi Sechem: agus tomhaisidh mi gleann Shucoit.

7 Is leam-sa Gilead, agus is leam Manaseh: agus is e Ephraim neart mo chinn; Iudah fear-tabhairt mo lagha,

8 Is e Moab mo shoitheach-ionnlaid, os ceann Edoim tilgidh mi mo bhròg: thar Phalestin ni mi caithream.

9 Cò bheir mi do'n bhaile dhaingnichte: cò threòraicheas mi gu EDOM?

10 Nach tusa, a Dhé, thusa a thilg uait sinn: agus nach deachaidh a mach, a Dhé, maille r'ar n-armailtibh?

11 Thoir còmhnaidh dhuinn ann an teinn: oir is dòmhain furtachd duine.

12 Trìd Dhé ni sinn treuntas: oir saltraidh esan sìos ar naimhdean.

An lxi. Salm.

Exaudi, Deus.

EIsd a Dhé, ri m' ghlaodh: thoir an aire do m' urnuigh.

2 O iomall na talmhainn éighidh mi riut: an uair a bhitheas mo chridhe lag.

3 Chum na carraig' a's àirde na mi féin, tredraich thusa mi: oir bha thusa a'd' thearmunn dhomh, a'd' thùr làidir an aghaidh an nàmhaid.

4 Gabhaidh mi còmhnuidh ann ad phàilliu gu bràth: cuiridh mi mo dhòigh ann an sgàil do sgiathan.

5 Oir chuala tusa, a Dhé, mo bhòidean: thug thu oighreachd dhoibh-san air am bheil eagal d'Ainme.

6 Cuir thusa làithean ri làithibh an Rìgh: bitheadh a bhliadhnan mar linn agus linn.

7 Maireadh e gu bràth 'am fianuis Dhé: gleidheadh tròcair agus firinn e.

8 Mar sin seinnidh mi cliu do d'Ainm gu bràth: chum gu'n dìol mi mo bhòidean o là gu là.

URNUIGH MHAIDNE.

An lxii. Salm.

Nonne Deo.

AIr Dia a mhàin tha m'anam a' feitheamh: uaithe-san thig mo shlàinte.

2 Is esan a mhàin mo charraig agus mo shlàinte: is e mo dhèan, cha ghluaisear gu mòr mi.

3 Cia fhad a dhealbhas sibh aimhleas an aghaidh duine: marbhar sibh uile; mar bhalla ag aomadh, mar ghàradh air chrith bithidh sibh.

4 A mhàin chum a thilgeadh sìos o 'àirde tha iad a' gabhail comhairle le 'chéile: is miann leo breugan, le'm beul beannaichidh iad, ach 'n an cridhe mallaichidh iad.

5 A mhàin air Dia feith, O m'anam: oir is ann uaithe-san a tha mo dhòchas.

6 Is esan a mhàin mo charraig, agus mo shlàintè: is e mo dhèan, cha ghluaisear mi.

7 Ann an Dia tha mo shlàinte agus mo ghòir: carraig mo neirt, mo thearmunn is e Dia.

8 Cuiribh air gach àm 'ur dòigh ann, O a shluagh: dòirtibh a mach 'ur cridhe 'n a fhianuis, tha Dia 'n a thearmunn duinn.

9 Gu cinnteach tha clann Adhaimh 'n an dìomhanas, clann an duine 'n am bréig: air meidh ma chuirear iad, is eutruime iad gu léir na dìomhanas.

10 Na h-earbaibh á fòirneirt, agus á reubainn na deanaibh uaill: an uair a dh'fhàsas saoihb-reas, na cuiribh 'ur cridhe air.

11 Aon uair labhair Dia, dà uair chuala mi so: Gur le Dia cumhachd.

12 Mar an ceudna dhuit-sa, a Thighearna, buinidh tròcair: oir bheir thu luigheachd do dhuine a réir 'oibre.

An lxiii. *Salm.*

Deus, Deus meus.

A Dhia is tu mo Dhia-sa: gu moch iarraidh mi thu.

2 Tha tart air m'anam a'd' dhéigh, tha m'fhèdìl a' togradh a d'ionnsuidh: ann an tìr thioraim agus thartmhoir as eugmhais uisge.

3 Chum, mar a chunnaic mi thu ann ad ionad naomh: gu faicinn do chumhachd agus do ghldir.

4 Do bhrìgh gur fearr do chaoimhneas-gràidh na beatha: bheir mo bhilean cliu dhuit.

5 Mar sin beannaichidh mi thu an cian is bèd mi: ann ad Ainm togaidh mi mo làmhan.

6 Mar le smior agus le saill sàsuichear m'anam: agus le bilibh aoibhneach molaidh mo bheul thu;

7 'N uair a chumhnicheas mi ort air mo leabaidh: a bheachd-smuainicheas mi ort ann am fairibh na h-oidheche.

8 A chionn gu robh thu a'd' chabhair agam: uime sin fo sgàile do sgiathan ni mi gairdeachas.

9 Tha m'anam a' dlùth-leantuinn riut: cumaidh do dheas làmh suas mi.

10 Ach iadsan a dh'iarras m'anam a chum a sgrios: thèid iad do ionadaibh ìochdarach na talmhainn.

11 Tuitidh iad le faobhar a' chlaidheimh: mar chuibrionn do na sionnachaibh bithidh iad.

12 Ach bithidh an Rìgh aoibhneach ann an Dia; ni gach neach a mhionnaicheas air-san, uaill: an uair a dhruidear beul na dream, a labhras breug.

An lxiv. *Salm.*

Esaudi Deus.

E Isd, a Dhé, ri m' ghuth, ann am asluchadh: o eagal an nàmhaid gléidh mo bheatha.

2 Folaich mi o chomhairle dhìomhair dhroch dhaoine: o chomhehrinneachadh luchd-deanamh na h-euceirt.

3 A gheuraich mar chlaidheamh an teangadh: a dheasaich an saighdean, cadhon briathra searba.

4 Chum an tilgeadh ann an ionadaibh dìomhair air air an duine ionraic: gu h-obann tilgidh iad air, agus cha bhi eagal orra.

5 Gabhaidh iad misneach dhoibh féin ann an droch-bheirt: labhraidh iad le 'chéile mu

leagadh ribeacha gu dìomhair, 's e a their iad,
Cò chi sinn ?

6 Rannsaichidh iad a mach eucearta, coimh-
lionaidh iad mìn-rannsachadh : agus sin 'an
taobh a stigh de dhuine, eadhon 's a' chridhe
dhomhain.

7 Ach tilgidh Dia saighead orra-san : gu
h-obann bithidh iad air an lotadh.

8 Agus bheir iad air an teangaidh féin tuiteam
orra féin : teichidh gach neach a chi iad.

9 Agus bithidh eagal air gach duine, agus
cuiridh iad 'an céill obair Dhé : oir tuigidh iad
a ghnìomh-san.

10 Ni am firean aoibhneas anns an Tighearn,
agus cuiridh e a dhòchas ann : agus ni iadsan
uile a tha ceart 'n an cridhe gairdeachas.

URNUIGH FHEASGAIR.

An lxv. Salm.

Te decet hymnus.

ORt-sa, O Dhé, tha moladh a' feitheamh ann
an Sion : agus dhuit-sa diolar a' bhòid.

2 O thusa a dh' éisdeas ri urnuigh : thugad-
sa thig gach fèil.

3 Thug eucearta buaidh oirnn . ar n-eus-
aontais glanaidh tusa uainn.

4 Is beannaichte esan, a thaghas tusa, agus a
bheir thu am fagus duit : gheibh e còmhnuidh
a'd' chùirtibh, sàsuichear sinne le maithreas do
thighe, do theampull naoimh.

5 Le nithibh uamhasach ann an ceartas bheir
thu freagradh dhuinn, a Dhé ar slàinte : dòchas
uile chrìocha na talmhainn, agus na fairge
fada uainn.

6 A tha 'socrachadh nam beann le do chumh-
achd : air do chrìoslachadh le neart.

7 A chaisgeas fuaim fhairgeachan : fuaim an
tonn, agus buaireas nan cinneach.

8 Gabhaidh eadhon luchd-àiteachaidh nan
crìoch fada mach eagal roimh do chomharaidh-
ean : bheir thusa air dol a mach na maidne agus
an fheasgair gairdeachas a dheanamh.

9 Tha thu a' fiosrachadh na talmhainn, agus
'g a uisgeachadh : ni thu ro bheartach e.

10 Oir tha amhainn Dhé làn a dh' uisge :
deasaichidh tu arbhar, 'n uair a dh' ulluich thu
e mar so.

11 Tha thu gu pailt ag uisgeachadh 'iomair-
ean, tha thu a' leagadh sìos a sgrìoban : le
frasaibh ni thu tais e, beannaichidh tu 'fhàs.

12 Crùnaidh tu a' bhliadhna le d' mhaithreas :
agus silidh do cheuman saill.

13 Silidh iad air cluainibh an fhàsaich : agus
ni na cnuic gairdeachas air gach taobh.

14 Tha na cluainean air an sgeadachadh le
trudaibh : agus tha na glinn air an còmhdach-
adh le arbhar, ni iad iolach ait, seadh seinnidh
iad.

An lxvi. Salm.

Jubilate Deo.

TOgaibh iolach ait do Dhia, a thìrean uile :
seinnibh glòir 'Ainme, deanaibh a chliu
glòrmhor.

2 Abraibh ri Dia, Cia uamhasach d'oibre : tríd meud do neirt strìochdaidh do naimhdean dhuit.

3 Sleuchdaidh gach tìr dhuit : agus scinnidh iad dhuit, seinnidh iad do d'Ainm.

4 Thigibh, agus faicibh oibre Dhé : uamhasach tha e 'n a ghniomharaibh air cloinn nan daoine.

5 Thionndaidh e a' mhuir gu talamh tioram : troimh an t-sruth ghabh iad thairis d'an cois ; an sin rinn sinn gairdeachas ann.

6 Le 'thrèun neart riaghlaidh e gu bràth, amhaircidh a shùilean air na cinnich : na h-àrdaicheadh luchd-ceannaire iad féin.

7 Beannaichibh, O a shlàigh, ar Dia-ne : agus thugaibh air fuaim a mholaidh 'bhi air a cluinntinn ;

8 Neach a chumas ar n-anam beò : agus nach leig le 'r cois caruchadh.

9 Oir dhearbh thu sinn, a Dhé : ghlan thu sinn anns an teine, mar a ghlanar airgid.

10 Thug thu steach 's an lìon sinn : chuir thu teinn air ar leasraidh.

11 Thug thu air daoineibh marcachd thar ar cinn : chaidh sinn troimh theine agus troimh uisge, ach thug thu mach sinn gu ionad saobhair.

12 Théid mi do d'thìgh le ìobairtibh-loisgte : coimhionaidd mi dhuit mo bhèidhean, leis an d'fhosgladh mo bhilean, agus a labhair mo bheul, an uair a bha mi ann an éigin.

13 Iobairtean-loisgte dh' fheudail reamhar iobraidh mi dhuit, maille ri tùis reitheacha bheir mi suas buar maille ri gabhraibh,

14 Thigibh, éisdibh, sibhse uile, air am bheil eagal Dhé : agus cuiridh mi 'n céill na rinn e air son m'anama.

15 Ghlaodh mi ris le m' bheul : agus dh'àrd-aicheadh e le m' theangaidh.

16 Ma bheir mi spéis do euceart a'm' chridhe : cha-n éisd an Tighearn rium.

17 Gu dearbh dh'éisd Dia : thug e an aire do ghuth m'urnuigh.

18 Beannaichte gu robh Dia, nach do thionndaidh m'urnuigh uaithe-san : agus a thrò-cair uam-sa.

An lxvii. Salm.

Deus misereatur.

GU'n deanadh Dia tròcair oirn, agus gu'm beannaicheadh e sinn : agus gu'n tugadh e air a ghnùis dealrachadh oirn ;

2 Chum gu'n aithnichear do shlighe air an talamh : do shlàinte 'am measg nan uile chinn-each.

3 Moladh na slòigh thu, a Dhé : moladh na slòigh uile thu.

4 Bitheadh na Cinnich aoibhneach, agus deanadh iad luathghaire : oir bheir thusa breth air na slòigh ann an ceartas, agus riaghlaidh tu na cinnich air an talamh.

5 Moladh na slòigh thu, a Dhé : moladh na slòigh uile thu.

6 Bheir an talamh a thoradh : gu'm beannaicheadh Dia, ar Dia-ne, sinn.

7 Gu'm beannaicheadh Dia sinn : agus gu'n robh 'eagal-san air uile chrìochaibh na talmh-ainn.

URNUIGH MHAIDNE.

An lxviii. Salm.

Exurgat Deus.

Eireadh Dia, bitheadh a naimhdean air an sgapadh : agus teicheadh iadsan aig am bheil fuath dha, o 'ghnùis.

2 Mar a dh'fhuadaichear deatach, fuadaichear iad : mar a leaghar céir fa chomhair an teine, sgriosar droch dhaoine 'am fianuis Dhé.

3 Ach bitheadh na fireanan aoibhneach, deanadh iad gairdeachas 'am fianuis Dhé : agus bitheadh iad suilbhir le luathghaire.

4 Seinnibh do Dhia, molaibh 'Ainm : àrdaichibh esan a tha 'marcachd air na nèamhan le 'Ainm Iah, agus deanaibh gairdeachas 'n a fhianuis.

5 Athair nan dilleachdan, agus breitheamh nam bantrach : is e Dia ann an ionad-còmhnuidh a naomhachd.

6 Suidhichidh Dia na daoine aonaranach ann an teaghlach, bheir e mach iadsan a tha ceangailte le cuibhreachaibh : ach gabhaidh na ceannaircich còmhnuidh ann an tìr thartmhoir.

7 A Dhé, 'n uair a chaidh thu mach roimh do shluagh : 'n uair a dh' imich thu anns an fhàsach,

8 Chriothnaich an talamh, shil mar an ceudna na nèamhan : leagh na beanntan o làthair Dhé, Sinai sin féin o làthair an Tighearna Dhé Israeil.

9 Shil thu nuas uisge gu pailt, a Dhé, air d' oighreachd : agus i sgèth, dh' fhurtaich thu.

10 Chòmhnuich do choimhthional innte : dheasaich thu, a Dhé, de d' mhaitheas do 'n bhochd.

11 Chuir an Tighearn a ghuth a mach : bu lionmhoir cuideachd na muinntir a dh' fhoillsich e.

12 Theich, theich rìghrean nan armailtean : agus roinn ise a dh' fhan aig an tigh a chreach.

13 Ged luidh sibh 'am measg choireacha, bithibh sibh mar sgiathaibh columain : air an còmhdach le h-airgiod, agus 'iteagan le òr buidhe.

14 'N uair a sgaoil an t-Uile-chumbachdach rìghrean innte : bha i geal mar shneachd air Salmon.

15 Tha beinn Dhé mar bheinn Bhàsain : 'n a beinn àrd mar bheinn Bhàsain.

16 C'ar son a leumas sibh, a bheanntan àrda ? is i so a' bheinn anns am miann le Dia còmhnuidh a ghabhail : seadh, còmhnuichidh an Tighearn innte gu bràth.

17 Tha carbaid Dhé 'n am fichead mìle, le mìltean de mhiltibh Aingeal : tha an Tighearn 'n am measg, mar ann an Sinai, 's an ionad naomh.

18 Chaidh thu suas air ionad àrd, thug thu bruid ann am braighdeanas, thug thu tiodhlac an do dhaoineibh : seadh, eadhon do dhaoineibh ceannairceach, chum gu'n gabhadh an Tighearn Dia còmhnuidh 'n am measg.

19 Beannaichte gu robh an Tighearn : a tha gach là 'g ar cumail suas, Dia ar slàinte.

20 Is e ar Dia-ne, Dia na slàinte : agus do 'n Tighearn Dia buinidh an t-slighe o'n bhàs.

21 Ach brisidh Dia ceann a naimhde : claignonn greannach an fhir a dh' imicheas 'n a pheacaidhean.

22 Thubhairt an Tighearn, Mar o Bhàsan, bheir mi mo shluagh air an ais: bheir mi air an ais iad, mar o dhoimhneachdaibh na fairge.

23 Chum gu'n tumar do chos ann am fuil do naimhde: teangadh do mhadraidh anns an ni cheudna.

24 Chunnaic iad do thriall, a Dhé: triall mo Dhé, mo Rìgh, anns an ionad naomh.

25 Dh' imich an luchd-seinn air thoiseach, an luchd-ciuil 'n an déigh: ann am meadhon mhaighdean a' bualadh thiompan.

26 Anns na coimhthionail beannaichibh Dia: an Tighearn o thobar Israeil.

27 An sin tha Benjamin beag 'n a uachdaran orra, ceannardan Iudah an luchd-comhairle: ceannardan Shebuluin, ceannardan Naphtali.

28 Dh' àithn do Dhia dhuit do neart: neartaich, a Dhé, an ni so a rinn thu air ar son;

29 Air son do theampuill ann an Ierusalem: bheir rìghrean tiodhlac dhuit.

30 Smachdaich luchd nan sleagh, mòr-chuideachd nan tarbh, le laoigh an t-sluaigh, gus an strìochd iad le mìribh airgid: sgap thusa na slòigh a ghabh tlachd de'n chogadh;

31 Thig àrd uaislean as an Eiphit: sinidh Etiopia a làmh an mach gu luath ri Dia.

32 A rìoghachda na talmhainn, seinnibh do Dhia: seinnibh moladh do 'n Tighearn.

33 Dhà-san a tha 'marcachd air nèamhan nan nèamh o chian: feuch, tha e a' cur a mach a ghutha, guth a neirt.

34 Thugaibh-se neart do Dhia: thar Israel tha a ghloir, agus tha a neart anns na neul-aibh.

35 Is uamhasach thusa, a Dhé, o d' ionadaibh naomha: is e Dia Israeil a bheir neart agus treòir d'a shluagh; gu ma beannaichte Dia.

URNUIGH FHEASGAIR.

An lxi. Salm.

Salvum me fac.

TEasaig mi, a Dhé: oir thàinig na h-uisgeacha steach gu ruig m' anam.

2 Tha mi a' dol fodha ann an làthaich dhomhain, gun àite gu seasamh: tha mi air teachd gu doimhneachdaibh nan uisgeachan, agus tha 'n sruth a' dol tharum.

3 Tha mi sgìth le 'm ghlaodhaich, tha mo sgornan air tiormachadh: tha mo shùilean air fàilneachadh le feitheamh air mo Dhia.

4 Is lionmhoire na falt mo chinn iadsan, aig am bheil fuath dhomh gun aobhar: tha iadsan air fàs làidir, le 'm b'àill mo mhilleadh, a tha 'n an naimhdibh dhomh gu h-eucorach.

5 An ni sin nach d' thug mi leam, an sin is éigin domh 'aiseag: tha fios agad-sa, a Dhé, air m' amaideachd, agus cha-n'eil mo lochdan folaichte ort-sa.

6 Na bitheadh nàire air mo sgàth-sa orra-san, a dh' fheitheas ort-sa, a Thighearna Dhé nan slògh: na bitheadh air mo sgàth-sa amhludh orra-san, a dh' iarras thusa, a Dhé Israeil.

7 Oir air do sgàth-sa dh' fhuiling mi masladh: chòmhdach amhludh mo ghnùis.

8 Is coigreach mi do m' bhràithribh: agus coimheach do chloinn mo mhàthar.

9 Oir dh'ith eud do thighe suas mi : agus orm-sa thuit toibheum na muinntir sin a thug toibheum dhuit-sa.

10 Agus an uair a dh'irioslaich mi m'anam le trasgadh : bha e 'n a mhasladh dhomh.

11 Agus rinn mi mo chulaidh de shac-eudach : agus bha mi a' m'leth-fhocal aca.

12 Tha iadsan a tha 'n an suidhe anns a' gheata, a' labhairt ann am aghaidh : agus tha mi ann am òran aca-san a tha 'g òl dibhe làidir.

13 Ach air mo shon-sa, tha m'urnuigh riut-sa, a Thighearna : ann an àm taitneach.

14 A Dhé, ann an lionmhoireachd do thròcair éisd rium : ann am firinn do shlàinte.

15 Saor mi o'n làthaich, agus na racham sìos : teasairgear mi uatha-san le 'm fuathach mi, agus o na h-uisgeachaibh domhain.

16 Na rachadh tuil nan uisge tharum, agus na sluigeadh an doimhneachd mi : agus na druideadh an slochd a bheul orm.

17 Eisd rium, a Thighearn', oir is maith do chaoimhneas gràdhach : a réir lionmhoireachd do chaomh-thròcairean pill rium.

18 Agus na folaich do ghnùis o d'òglach, oir tha mi ann an aire : éisd rium gu grad.

19 Druid ri m'anam, saor e : a bhrìgh m'eascairdean teasairg mi.

20 Is aithne dhuit mo mhasladh, agus mo nàire, agus mo mhi-chliu : a' d'fhianuis tha mo naimbdean uile.

21 Bhris masladh mo chridhe, agus tha mi iarganach : agus dh'amhaire mi air son neach a ghabhadh truas, ach cha robh e ann, agus air son luchd-comhfhurtachd, ach cha d'fhuair mi iad.

22 Agus thug iad dhomh mar mo bhìadh domblas : agus ann am òtadh, thug iad dhomh fion-geur r'a òl.

23 Bitheadh am bòrd fa 'n comhair mar ribe : agus an soirbheachadh mar cheap-tuislidh dhoibh.

24 Dorchaichear an sùilean, chum nach faic iad : agus thoir air an leasraidh a ghnàth bhi air chrith.

25 Dòirt d'fhearg orra : agus glacadh do chorruich gheur iad.

26 Bitheadh an àite-tàimh fàs : 'n am pàill-iunaibh na gabhadh neach còmhnuidh.

27 Oir gheur-lean iad an ti a bhuail thusa : agus labhair iad chum doilgheis dhoibh-san a lot thu.

28 Cuir euceart r'an euceart : agus na tigeadh iad a steach a' d'fhèantachd-sa.

29 Dubh a mach iad á leabhar nam beò : agus maille ris na fireanaibh na sgrìobhar iad.

30 Ach mise, tha bochd agus brònach : togadh do shlàinte, a Dhé, an àird mi.

31 Molaidh mise ainm Dhé le òran : agus àrdaichidh mi e le breith-buidheachais.

32 Agus is fearr leis an Tighearn so na damh : na tarbh òg a tha adharcach, crobhanach.

33 Chi na daoine sèimhe so, agus bithidh aoibhneas orra : sibhse a dh'iarras an Tighearn, bithidh 'ur cridhe beò.

34 Oir éisdidh an Tighearn ris na bochdaibh : agus cha dean e tàir air a phrìosanaich.

35 Moladh na nèamhan agus an talamh e : na cuaintean, agus gach ni a ghluaiseas annta.

36 Oir saoraidh Dia Sion, agus togaidh e

bailtean Iudah : agus gabhaidh iad còmhnuidh an sin, agus mealaidh iad i.

37 Sealbhaichidh sliochd a sheirbhiseach i : agus gabhaidh iadsan, a ghràdhaicheas 'ainmsan, còmhnuidh innte.

An lxx. Salm.

Deus in adiutorium.

A Dhé, chum mo theasairginn : a Thighearna, chum mo chuideachaidh dean deifir.

2 Bitheadh nàire agus amhludh orra-san, a tha 'g iarraidh m' anama : piller air an ais iad, agus mòr-amhludh gu robh orra-san, a tha 'miannachadh uile dhomh.

3 Gu'm piller iadsan air an ais mar thuarasdal d'an nàire : a their rium, Ahà, ahà.

4 Deanadh iadsan uile, a tha 'g ad iarraidh, aoibhneas agus gairdeachas annad : agus abradh iadsan a ghnàth, le 'n ionmhuinn do shlàinte, Mòr-mholadh gu robh do Dhia.

5 Ach tha mise bochd agus uireasbhuidheach : a Dhé, greas a m' ionnsuidh.

6 Is tusa mo chabhair agus m' Fhear-saoraidh : a Thighearna, na dean moille.

URNUIGH MHAIDNE.

An lxxi. Salm

In te Domine, speravi.

A Nnad-sa, a Thighearna, cuiream mo dhòigh, nàire na bitheadh orm am feasd : a' d' cheartas teasairg mi, agus thoir orm dol as : aom do chluas rium agus saor mi.

2 Bi-sa a' d' charraig làidir dhomh, chum an rachainn a ghnàth : dh' àithn thu mi 'bhi air mo shaoradh, oir is tu mo charraig agus mo dhaingneach.

3 O mo Dhia, thoir fuasgladh dhomh á làimh an aingidh : á làimh an duine eucoraieb agus an-iochdmhoir.

4 Oir is tusa mo dhòchas, a Thighearna Dhé : mo dhòigh, o m' dìge.

5 Leat-sa chumadh mise suas o'n bhroinn : á innibh mo mhàthar bhuin thu mi, ort-sa bithidh mo mholadh an còmhnuidh.

6 Mar aobhar iongantais tha mi aig mòran : ach is tusa mo thearmunn làidir.

7 Lìonar mo bheul le d' mholadh : le d' urram-sa gach là.

8 Na tilg uait mi 'an àm sean aoise : 'n uair a dh' fhàilnicheas mo neart na tréig mi.

9 Oir labhair mo naimhdean a' m' aghaidh, agus ghabh iadsan, a tha 'feitheamh nam fàth air m' anam, comhairle le 'chéile, ag ràdh : Thréig Dia e, leanaibh e gu teann, agus glae-aibh e, oir cha-n'eil neach ann a shaoras e.

10 A Dhé na bi-sa fada uam : O mo Dhia, greas gu m' chabhair.

11 Bitheadh nàire, bitheadh claoidh air eascairdibh m' anama : còmhdaichear le masladh agus le mi-chliu iadsan, a tha 'g iarraidh m' uile.

12 Ach sìor-carbaidh mise : agus cuiridh mi ri d' chliu uile.

13 Aithrisidh mo bheul d' fhìreantachd, air feadh an là do shlàinte : ged nach aithne dhomh an àireamh.

14 Thèid mi air m' aghaidh ann an neart an

Tighearna Dhé : ni mi sgeul air d' fhìreantachd, d' fhìreantachd féin a mhàin.

15 O 'Dhé, theagaisg thu mi o m' òige : agus gu ruige so chuir mi d' oibre iongantach 'an céill.

16 Agus a nis an uair a tha mi sean agus liath, a Dhé na tréig mi : gus an cuir mi 'an céill do neart do 'n àl so, do gach àl ri teachd do chumhachd.

17 Agus tha d' fhìreantachd-sa, a Dhé, ro àrd : O thusa a rinn nithe mòra ; a Dhé, cò is cosmhail riut ?

18 A nochd dhomh teanntachdan mòra agus cruaidh', a bheothaicheas mi a rìs : agus o dhoimhneachdaibh na talmhainn a bheir a nìs mi a rìs.

19 Meudaichidh tu mo mhòrachd : agus air gach taobh bheir thu sòlas dhomh.

20 Uime sin molaidh mise thu air an t-saltair, seadh d' fhìrinn-sa, mo Dhia : seinnidh mi dhuit air a' chlàrsaich, O aoin naoimh Israeil.

21 Ni mo bhilean mòr-ghairdeachas an uair a sheinneas mi dhuit : agus m' anam a shaor thu.

22 Labhraidh mar an ceudna mo theangadh air d' fhìreantachd air feadh an là : oir chuireadh amhladh, oir chuireadh nàire orra-san, a tha 'g iarraidh m' aimhleis.

An lxxii. Salm.

Deus, Judicium.

A Dhé, thoir do bhreitheanais do 'n Rìgh : agus d' fhìreantachd do mhac an Rìgh.

2 Bheir esan breth air do shluagh le fireantachd : agus air do bhoehdaibh le ceartas.

3 Bheir na beannta sìth do 'n t-sluagh : agus na tulaichean.

4 Le ceartas bheir e breth air bochdaibh an t-sluaigh : saoraidh e clann nan ainnis, ach mùn-bhrisidh e fear an fhòirneirt.

5 Bithidh d' eagal orra am feadh a mhaireas a' ghrian agus a' ghealach : o linn gu linn.

6 Thig e nuas mar uisge air an fhaiche bhuinte : mar fhraisaibh a dh' uisgicheas an talamh.

7 'N a làthaibh-san soirbhichidh leis an fhìrean : agus bithidh pailteas sìth' ann, gus nach bi a' ghealach ann na's mò.

8 Agus bithidh uachdaranachd aige o fhairge gu fairge : agus o'n amhainn gu ruig crìochaibh na talmhainn.

9 'N a fhianuis sleuchdaidh sìos luchd-còmhnuidh an fhàsaich : agus imlichidh a naimhdean an ùir.

10 Bheir rìghrean Tharsis agus nan Eilean tiodhlacan uatha : bheir rìghrean Sheba agus Shaba tabhartais dha.

11 Agus sleuchdaidh na h-uile rìghrean sìos dha : ni na cinnich uile seirbhis dha.

12 Oir saoraidh e an t-ainnis an uair a dh' éigheas e : agus an truaghan, aig nach 'eil fear-cuideachaidh.

13 Caomhnaidh e am bochd agus am feumach : agus tèarnaidh e anama nam feumach.

14 O fhoill agus o fhòirneart saoraidh e an anam : agus bithidh am fuil luachmhor 'na shùilibh.

15 Agus bithidh e bed, agus bheirear dha a dh' òr Sheba : agus nithear urnuigh air a shon a ghnàth, gach là beannaichear e.

16 Bithidh dorlach sìl 's an talamh air mullach nam beann : crathaidh mar Lebanon a thoradh, agus thig muinntir a' bhaile fo bhlàth mar luibh na talmhainn.

17 Bithidh 'ainm-san buan gu sìorruidh ; comh-mhairionn ris a' ghréin bithidh 'ainm-san : agus ann-san beannaichear na sìdigh uile, agus beannaichidh iadsan e.

18 Beannaichte gu robh an Tighearn Dia, Dia Israeil : an ti a mhàin a ni nithean iongantach ;

19 Agus beannaichte gu robh 'ainm glòr-mhor-san gu sìorruidh : agus ònar an talamh uile le 'Ghlòir. Amen, agus Amen.

URNUIGH FHEASGAIR.

An lxxiii Salm.

Quam bonus Israel.

GU deimhin tha Dia maith do Israel : dhoibh-san a tha glan 'n an cridhe.

2 Ach air mo shon-sa, is beag nach d'aom mo chosan : cha mhòr nach do shleamhnuich mo cheuman uam.

3 Oir ghabh mi tnu ri amadain : ri faicinn soirbheachaidh dhaoine aingidh.

4 Oir cha-n'eil cuibhrichean 'n am bàs : ach tha an neart làidir.

5 Ann an docair mar dhaoineibh eile cha-n'eil iad : agus mar dhaoineibh eile cha-n'eil iad air an sàruchadh.

6 Uime sin mar shlabhraidh chuairtich àrdan iad : mar thrusgan chòmhdhaich fòirneart iad.

7 Sheas an sùil a mach le saill : fhuair iad thar miann an cridhe.

8 Tha iad truailidh, agus labhraidh iad gu h-aingidh air fòirneart : gu h-àrd labhraidh iad.

9 Chuir iad am beul an aghaidh nan nèamh : agus ghluais an teangadh air feadh na talmhainn.

10 Air an aobhar sin pillidh a shluagh an so : agus fàisgear uisgeacha cupain làn a mach dhoibh.

11 Agus their iad, Cionnus is aithne do Dhia : agus am bheil eòlas aig an Ti a's àirde ?

12 Feuch, is iad sin na daoine aingidh, a tha soirbheachadh 's an t-saoghal, tha iad a' carnadh suas beartais : da rìreadh ghlan mise mo chridhe gu dìomhain, agus nigh mi mo làmh an neò-chiontas.

13 Oir bhuaileadh mi air feadh an là : agus smachdaicheadh mi gach maduinn.

14 Nan abrainn, Labhraidh mi mar so : feuch, air ginealach do chloinne dheanainn eucoir.

15 'N uair a smuainich mi air so a thuigsinn : bu chruaidh an gnothuch e ann am shùilibh,

16 Gus an deachaidh mi steach do naomh-ionad Dhé : an sin thuig mi an crìoch-san ;

17 Gu deimhin ann an àitibh sleamhna chuir thu iad : thilg thu sìos iad gu sgrios.

18 Cionnus a thugadh iad gu sgrios, mar ann an tiota : a chuireadh as doibh gu tur le uamhasaibh !

19 Mar aisling an uair a dhùisgeas neach : a Thighearn', anns a' bhaile ni thu tarcuais air an dealbh.

20 Ach bha mo chridhe goirt : agus bha goimh ann am airnibh.

21 Agus bha mi baoth, agus aineolach : mar ainmhidh bha mi a' d' làthair.

22 Gidheadh, tha mi a ghnàth maille riut : chum thu suas mi air mo dheas làimh.

23 Le d' chomhairle stiùraidh tu mi : agus fa-dhèidh gabhaidh tu mi chum glòire.

24 Cò th' agam anns na nèamhan ach thusa : agus 'an coimhneas riut cha-n'eil neach air thalamh air am bheil mo dhéigh.

25 Tha m' fheòil, agus mo chridhe air fàil-neachadh : is e Dia neart mo chridhe, agus mo chuibhrionn gu sìorruidh.

26 Oir feuch, sgriosar iadsan a théid fada uait : ghearr thu as gach neach a chaidh le stròpachas uait.

27 Ach is maith dhomh-sa teachd dlùth do Dhia, anns an Tighearn Dia chuir mi mo dhoigh : chum gu foillsichinn d'oibre uile.

An lxxiv. Salm.

Ut quid, Deus ?

C'Ar son, a Dhé, a thilg thu uait sinn gu bràth : a lasas d'fhearg ri caoraich d'ionaltraidh ?

2 Cuimhnich do choimhthional : a cheannaich thu o chian, a shaor thu.

3 Slat d' oighreachd : beinn Shioin so, anns an do ghabh thu còmhnuidh.

4 Tog do chosa chum nam fàsach sìorruidh : chum nan uile ole a rinn an nàmhaid ann ad ionad naomh.

5 Bheuc do naimhdean 'am measg do choimhthionail : chuir iad suas am brataichean mar chomharaidhean.

6 Bha neach ainmeil : mar a thogadh e a thuagh gu h-àrd air coille thiugh.

7 A nis mar an ceudna bhris iad sìos 'obair ghearrta le 'chéile : le tuaghan agus le uird.

8 Chuir iad ri theine d'ionad naomh gu ruig an làr : thruaill iad pàilliu d' Ainme-sa.

9 Thubhairt iad 'n an cridhe, Sgriosamaid iad le 'chéile : loisg iad uile ionada-cruinneachaidh Dhé 's an tìr.

10 Ar comharaidhean cha-n fhaicsinn, cha-n'eil fàidh ann na's mò : agus cha-n'eil neach 'n ar measg, aig am bheil fhios cia fad.

11 Cia fad, a Dhé, a bheir an t-eascaraid beum : an dean an nàmhaid tarcuais air d'Ainm gu bràth ?

12 C'ar son a philleas tu do làmh, do dheas làmh féin air a h-ais : buin a mach o d' bhroilleach i.

13 Oir is e Dia mo Rìgh o chian : ag oibreachadh slàinte 'am meadhon na talmhainn.

14 Sgaoil thusa an fhairge le d'neart : bhris thu cinn nan dràgon air na h-uisgeachaibh.

15 Phronn thu cinn Lebhiatain : thug thu e mar bhiaidh do 'n t-sluagh anns an fhàsach.

16 Sgoilt thu an tobar, agus an sruth : thiormaich thu aimhniche mòra.

17 Is leat-sa an là, mar an ceudna is leat-sa an oidheche : is tu 'dheasaich solus agus grian.

18 Shuidhich thu uile chrìocha na talmhainn : rinn thu an samhradh agus an geamhradh.

19 Cuimhnich so, thug an t-eascaraid beum, a Thighearna : agus rinn sluagh amaideach tarcuais air d' Ainm.

20 Na toir suas do 'n fhiadh-bheathach anam do cholumain : anaman do dhaoine truagha na dì-chuimhnich gu bràth.

21 Thoir an aire do 'n choimhcheangal : oir tha àitean dorcha na tìre làn a dh' ionadaibh-còmhnuidh an fhòirneirt.

22 Na pillear air ais le nàire an ti a shàruich-ear : moladh am bochd agus am feumach d' Ainm.

23 Eirich, a Dhé, tagair do chùis féin : cuimhnich mar a tha 'n t-amadan a' toirt toibheim dhuit gach là.

24 Na dì-chuimhnich guth do naimhdean : toirm na muinntir a dh' éirich a' d' aghaidh, a tha 'dol suas an còmhnuidh.

ERNUIGH MHAIDHNE.

An lxxv. Salm.

Confitebimur tibi.

BHeir sinn moladh dhuit, a Dhé : bheir sinn moladh.

2 Oir gu bheil d' Ainm am fagus : cuiridh d' oibre iongantach 'an céill.

3 'N uair a ghlacas mi an t-àm suidhichte : bheir mi breth le ceartas.

4 Sgaoileadh an tìr agus a luchd-àiteachaidh gu léir : cumaidh mise suas a puist.

5 Thubhairt mi ris na h-amadain, Na bithibh amaideach : agus ris na h-aingidh, Na togaibh suas 'ur n-adhare.

6 Na togaibh suas 'ur n-adhare gu h-àrd : na labhraibh le muineal cruaidh.

7 Oir cha-n ann o'n ear, no o'n iar : no o dheas a thig àrdachadh.

8 Ach is e Dia am breitheamh : leagaidh e sìos am fear so, agus àrdaichidh e am fear sin.

9 Oir tha cupan ann an làimh an Tighearn', agus tha am fion dearg : làn coimeisg tha e, agus dèirtidh e cuid as.

10 Ach a dheasgainean : fàisgidh agus òlaidh uile dhaoine aingidh na talmhainn.

11 Ach ni mise gairdeachas gu bràth : seinnidh mi moladh do Dhia Iacoib.

12 Agus sgathaidh mi sìos uile adharca nan aingidh : àrdaichear adharcan an fhìrein.

An lxxvi. Salm.

Notus in Iudæa.

AIthnichear Dia ann an Iudah : ann an Israel tha 'Ainm mòr.

2 Agus ann an Salem tha a phàilliun : agus 'ionad-còmhnuidh ann an Sion.

3 An sin bhris e saighdean a' bhogha : an sgiath, agus an claidheamh, agus an cath.

4 Is urramach thusa, is glòrmhor thu : os ceann bheann na creiche.

5 Chreachadh iadsan a bha misneachail ann an cridhe, choidil iad an codal : agus cha d' fhuair na daoine treuna gu léir an làmhan.

6 Le d' achmhasan, a Dhé Iacoib : chuireadh araon am marcach agus an t-each 'n an suain.

7 Is cùis eagail thusa, eachdon thusa : agus cò sheasas a' d' làthair, an uair a bhitheas fearg ort ?

8 Thug thusa air breitheanas gu'n cualadh

o nèamh e : bha eagal air an talamh, agus bha e 'n a thàmh,

9 An uair a dh' éirich Dia chum breitheanais : a shaoradh uile dhaoine cùine na talmhainn.

10 Gu cinnteach bheir fearg duine moladh dhuit : fuigheall na feirge coisgidh tu.

11 Bòidichibh, agus ìocaibh do an Tighearn 'ur Dia : thugadh iadsan uile a tha m' a thimchioll tiodhlacan dhà-san a's aobhar eagail ann.

12 Sgathaidh e sìos spiorad Uachdarana : is cùis eagail e do rìghribh na talmhainn.

An lxxvii. Salm.

Voce mea ad Dominum.

LE m' ghuth dh' éigh mi ri Dia : le m' ghuth dh' éigh mi ri Dia, agus dh' èisd e rium.

2 Ann an là mo theinn dh' iarr mi an Tighearn : shìneadh mo làmh a mach 's an oidhche gun sgar ; dhiùlt m' anam sòlas a ghabhail.

3 Chuimhnich mi air Dia, agus bha mi fo bhuaireas : rinn mi gearan, agus chlaoidheadh mo spiorad.

4 Chum thu mo shùilean 'n am faireachadh : tha mi iarganach, agus cha-n urrainn mi labhairt.

5 Smuainich mi air na làithibh o shean : air bliadhnaibh na h-aimsir chéin.

6 Chuimhnich mi mo cheòl 's an oidhche : rinn mi cainnt ri m' ebridhe féin, agus rannsaich mo spiorad gu gear.

7 An tilg an Tighearn uaith gu bràth : agus nach nochd e a dheadh-ghean na's mò ?

8 An do sguir a chaoimhneas am feasd : an d' fhàilnich 'fhocal o linn gu linn ?

9 An do dhearmaid Dia a bhi gràsmhor : an do dhruid e 'n a chorruich a chaomh-thròcairean ?

10 An sin thubhairt mise, Is e so m' an-mhuinneachd : is e caochladh deas làimhe an Ti a's àirde a th' ann.

11 Cuimhnichidh mi oibre an Tighearna : gu deimhin cuimhnichidh mi d' iongantais o'n aimsir chéin.

12 Agus beachd-smuainichidh mi air d' oibrigh gu léir : agus air do ghnìomharaibh labhraidh mi.

13 Tha do shlighe, a Dhé, 's an ionad naomh : cò tha 'n a Dhia mòr mar ar Dia-ne ?

14 Is tusa an Dia a tha 'deanamh nithean iongantach : thaisbein thu 'am measg nan sluagh do neart.

15 Shaor thu le d' ghairdean do shluagh : mic Iacoib agus Ioseiph.

16 Chunnaic na h-uisgeachan thu, a Dhé, chunnaic na h-uisgeachan thu, bha eagal orra : seadh, ghluaisleadh na doimhneachda.

17 Dhòirt na neoil a nuas uisge, thug na speura fuaim : mar an ceudna chaidh do shaighdean a mach.

18 Bha guth do thairneanaich 's an speur : shoillsich do dhealanaich an saoghal, ghluaisleadh agus chrìothnaich an talamh.

19 'S an fhairge bha do shlighe, agus do cheuman anns na h-uisgeachaibh mòra : agus cha d' aithnicheadh luirg do chos.

20 Thrèdraich thu mar threud do shluagh : le làimh Mhaois agus Aaroin.

URNUIGH FHEASGAIR.

An lxxviii. Salm.

Attendite, popule.

E Isdibh, O mo shluagh, ri m' reachd :
aomaibh 'ur eluas chum bhriathar mo
bheoil.

2 Fosgailidh mi mo bheul ann an cosamh-
lachd : cuiridh mi sean-fhocail dhorcha 'an
céill ;

3 A chuala sinn agus a b' aithne dhuinn :
agus a dh' innis ar n-aithriche dhuinn ;

4 Cha cheil sinn air an cloinn iad : a' foill-
seachadh cliu an Tighearna do 'n àl a tha ri
teachd, agus a neart, agus 'oibre iongantach a
rinn e.

5 Oir chuir e suas teistean ann an Iacob, agus
shuidhich e lagh ann an Israel : a dh' àithn e
d'ar n-aithrichibh gu'n deanadh iad aithnichte
d'an cloinn ;

6 Chum gu'm bitheadh fios aig an àl ri teachd
orra : gu'n éireadh a' chlan a bheirtheadh.

7 Agus gu'n cuireadh iad 'an céill iad : d'an
cloinn féin ;

8 Agus gu'n cuireadh iad an dòchas ann an
Dia : agus nach dì-chuimhnicheadh iad oibre
Dhé, ach gu'n gleidheadh iad 'àitheantan ;

9 Agus nach bitheadh iad mar an aithriche,
'n an ginealach reasgach agus ceannairceach :
ginealach nach do shuidhich an cridhe gu ceart,
agus nach robh an spiorad tairis do Dhia.

10 Ged bha clann Ephraim fo'n armaibh :
agus ged thilg iad le bogha, phill iad air an
ais ann an là catha.

11 Cha do ghléidh iad coimheangal Dhé :
agus dhiùlt iad imeachd 'n a reachd.

12 Agus dhì-chuimhnich iad 'oibre : agus
'iongantais a nochd e dhoibh.

13 'An làthair an aithriche rinn e nithean
iongantach, ann an tìr na h-Eiphit: ann am
machair Shoain.

14 Sgoilt e an fhairge, agus thug e iadsan
thairis : agus thug e air na h-uisgeachaibh seas-
amh mar thòrr.

15 Agus stiùir e iad le neul 's an là : agus air
feadh na h-oidhche le solus teine.

16 Sgoilt e na creagan 's an fhàsach : agus
thug e deoch dhoibh, mar á doimhneachdaibh
mòra.

17 Agus thug e sruthan a mach as a' charraig :
agus thug e air uisgeachaibh ruith sìos mar
aimhnicheibh.

18 Gidheadh pheacaich iad fathast na's mò
'n a aghaidh : a' brosnachadh an Ti a's àirde 's an
fhàsach.

19 Agus bhuair iad Dia 'n an cridhe : ag
iarraidh bidh d'am miann.

20 Seadh, labhair iad an aghaidh Dhé, thubh-
airt iad : An urrainn Dia bòrd a dheasachadh
's an fhàsach ?

21 Feuch, bhuaile e a' chreag, agus bhrùchd
uisgeachan a mach, agus dh' éirich na tuiltean :
an urrainn e mar an ceudna aran a thabhairt,
an deasaich e feòil d'a shluagh ?

22 Uime sin chual' an Tighearn, agus bha
corruich air : agus las teine an aghaidh Iacoib,
agus mar an ceudna dh' éirich fearg an aghaidh
Israeil ;

23 A chionn nach do chreid iad ann an Dia : agus nach d' earb iad as a shlàinte ;

24 Ged dh' àithn e do na neulaibh o'n àirde : agus ged dh' fhosgail e dorsa nan nèamh.

25 Agus ged a fhras e nuas Mana orra r'a itheadh : agus ged thug e dhoibh coirce nan nèamh.

26 Dh' ith daoine biadh nan Aingeal : thug e dhoibh an sàth de lòn.

27 Thug e air gaoith an ear imeachd 's na nèamhan : agus le a neart thug e stigh a' ghaoth á deas.

28 Agus fhras e nuas fèdil orra mar dhuslach : agus eunlaith iteagach mar ghaineamh na fairge.

29 Agus thug e orra tuiteam 'am meadhon an cainp : mu thimchioll an àitean-còmhnuidh.

30 Agus dh' ith iad, agus làn-shàsuicheadh iad, oir thug e dhoibh am miann féin : cha robh iad air an sgarachduinn o am miann.

31 Fathast bha am biadh 'n am beul ; an sin thàinig fearg Dhé orra, agus mharbh e iadsan a bu shultmhoire dhiubh : agus leag e sìos daoine taghta Israeil.

32 An déigh so gu léir pheacaich iad fathast : agus cha do chreid iad air son 'oibre iongantachsan.

33 Uime sin chaith e an làithean ann an dìomhanas : agus am bliadhnachan ann an uamhas.

34 'N uair a mharbh e iad, an sin dh' iarr iad e : agus phill iad, agus bha iad gu moch ag iarraidh Dhé.

35 Agus chuimhnich iad gu'm b' e Dia an carraig : agus an Dia a's àirde am Fear-saoraidh.

36 Ach rinn iad miodal ris le'm beul : agus rinn iad breug dha le'n teangaidh.

37 Oir cha robh an cridhe ceart maille ris : agus cha robh iad dìleas 'n a choimh-cheangal.

38 Gidheadh gu h-ìochdmhor mhaith esan an lochd : agus cha do sgrìos e iad.

39 Seadh, iomadh uair thionndaidh e 'fhearg uaith : agus cha do dhùisg e a chorruich uile ;

40 Oir chuimhnich e nach robh annta ach fèdil : osag gaoithe a shiubhlas, agus nach pill a rìs.

41 Cia tric a bhrosnuich iad e anns an fhàsach : a chuir iad campar air anns an ionad uaigneach.

42 Seadh, phill iad air an ais, agus bhuir iad Dia : agus chuir iad tomhas air Aon naomh Israeil.

43 Cha do chuimhnich iad a làmh : no'n là air an do shaor e iad o'n nàmhaid ;

44 Mar a nochd e a chomharaidhean anns an Eiphit : agus 'oibre iongantach ann am machair Shoain.

45 Agus a thionndaidh e an uisgeachan gu fuil : agus an sruthan, air chor as nach feudtadh òl diubh.

46 A chuir e 'n am measg iomadh gnè chuil-eag, a dh' ith suas iad : agus losgair a sgrìos iad.

47 A thug e an toradh do'n bhurruis : agus an saothair do'n locust.

48 A mhill e an croinn-fhìona le cloich-mheallain : agus an croinn-fhìge le reodhadh.

49 Agus a thug e thairis am feudail do'n chloich-mheallain : agus an treudan do'n teinathair.

50 A thilg e orra teas 'fheirge, boile, agus corruich, agus teinn : le aingil ole a chur 'n am measg.

51 A rinn e slighe d'a fheirg, nach do chaomhain e an anam o'n bhàs : ach a thug e thairis am beatha do'n phlàigh.

52 Agus a bhuaile e gach ceud-ghin 's an Eiphit : toiseach an neirt ann am pàilliunaibh Ham.

53 Ach a thug e mach mar chaoraich a shluagh féin : agus a thredraich e iad mar thred anns an fhàsach.

54 Agus a stiùir e iad gu tèaruinte, air chor as nach robh eagal orra : ach a chòmhaich an fhairge an naimhdean.

55 Agus a thug e iad gu crìch 'ionaid naoimhsan : do'n t-sliabh so a choisinn a dheas làmh.

56 Agus a thilg e mach na cinnich rompa : agus a roinn e oighreachd dhoibh le crannchur, agus a thug e air treubhan Israeil còmhnuidh a ghabhail 'n am pàilliunaibh-san.

57 Gidheadh bhuaire agus bhrosnuich iad an Dia a's àirde : agus cha do ghléidh iad a theisteis ;

58 Ach phill iad, agus ghluais iad gu fealltach mar an aithrichean : chaidh iad a thaobh, mar bhogha fiar.

59 Agus bhrosnuich iad e le'n ionadaibh àrda : agus le'n dealbhan gearrta dhùisg iad e gu eud.

60 Chuala Dia, agus bha fearg air : agus ghabh e gràin mhòr de Israel ;

61 Agus thréig e pàilliun Shiloh : am bùth a shuidhich e 'am measg dhaoine.

62 Agus thug e suas a neart gu braighdeanas : agus a ghlòir do làmh an nàmhaid.

63 Agus thug e thairis a shluagh do'n chlaidheamh : agus ghabh e fearg r'a oighreachd.

64 Loisg an teine an òigridh : agus cha d'fhuair an òighean pòsadh.

65 Thuit an sagartan leis a' chlaidheamh : agus cha d'rinn am bantraichean bròn.

66 An sin mhosgail an Tighearn mar neach a bha 'n a chodal : mar churaidh a ni iolach an déigh dha fion òl.

67 Agus bhuaile a naimhdean 'n an deireadh : thug e masladh bithbhuan dhoibh.

68 Agus dhiùlt e pàilliun Ioseph : agus cha do thagh e treubh Ephraim ;

69 Ach thagh e treubh Iudah : sliabh Shioin a ghràdhaich e.

70 Agus thog e 'ionad naomh féin mar lùchairt àrd : mar an talamh a shuidhich e gu bràth.

71 Agus thagh e Daibhidh 'òglach : agus thug se e o chrò nan caorach.

72 O bhi 'an déigh nan caorach a bha trom le àl, thug se e : a bheathachadh Iacoib a shluaigh, agus Israeil 'oighreachd.

73 Agus bheathaich e iad a réir ionracais a chridhe : agus le seòltachd a làmh stiùir e iad.

URNUIGH MHAIDNE.

An lxxix. Salm.

Deus, venerunt.

A Dhé, thàinig na cinnich a steach do d' oighreachd : thruaill iad do theampull naomh, dh' fhàg iad Ierusalem 'n a càrnaibh.

2 Thug iad cuirp do sheirbhiseach mar bhiadh do eunlaith nan speur : feòil do naomh do fhiadh-bheathaichibh na talmhainn.

3 Dhèirt iad am fuil mar uisge timchioll Ierusalem: agus cha robh neach gu an adhlacadh.

4 Tha sinn 'n ar masladh d'ar coimhearsnaich : 'n ar n-aobhar fanoid agus magaidh dhoibh-san a tha mu'n cuairt oirnn.

5 Cia fhad, a Thighearn', a bhitheas fearg ort : gu bràth an las d'eud mar theine ?

6 Dèirt do chorruich air na cinnich aig nach 'eil eòlas ort : agus air na rìoghachdaibh nach gairm air d' Ainm.

7 Oir chuir iad as do Iacob : agus rinn iad 'àite-còmhnuidh 'n a fhàsach.

8 Na cuimhnich thusa 'n ar n-aghaidh ar n-eucearta roimhe so, gu luath gabhadh do thrècairean romhainn : oir thugadh gu ro ìosal sinn.

9 Cuidich leinn, a Dhé ar slàinte, air sgàth glòire d' Ainme : agus teasairg sinn, agus glan ar peacaidh uainn air son d' Ainme féin.

10 C'ar son a theireadh na cinnich : C'ait am bheil an Dia ?

11 Aithnichear 'am measg nan cinneach fa chomhair ar sùl : dìoghaltas fola do sheirbhis-each, a dhèirteadh.

12 Thigeadh osnaich a' phrìosanaich ann ad làthair, a réir meud do neirt : saor thusa iadsan a dh' orduicheadh chum bàis.

13 Agus dìol d'ar coimhearsnaich a sheachd uiread 'n am broilleach : am masladh leis an do mhaslaich iad thusa, a Thighearna.

14 Agus molaidh sinne, do shluagh agus

caoraich d' ionaltraidh, thusa gu bràth : o linn gu linn cuiridh sinn 'an céill do chliu.

An lxxx. Salm.

Qui regis Israel.

O Aodhair Israeil, éisd, thusa a stiùreas Ioseph mar threud : thusa a tha ann ad chòmhnuidh eadar nan Ceruban, dealraich a mach.

2 'An làthair Ephraim, agus Bheniamin agus Mhanaseh : dùisg do chumhachd, agus thig, gu 'r saoradh.

3 Pill sinn, a Dhé : agus thoir air do ghnùis dealrachadh, agus saorar sinn.

4 A Thighearna Dhé nan slògh : cia fhad a bhitheas fearg ort ri urnuigh do shluaigh ?

5 Thug thu dhoibh aran nan deur r'a itheadh : agus thug thu dhoibh deoir r'an òl ann am pailteas.

6 Rinn thu sinn 'n ar n-aobhar-strì d'ar coimhearsnaich : agus ni ar n-eascairdean gàire-fanoid umainn.

7 A Dhé nan slògh, pill sinn : agus thoir air do ghnùis dealrachadh, agus saorar sinn.

8 Thug thu fionain as an Eiphit : thilg thu mach na cinnich agus shuidhich thu i.

9 Réitich thu àite fa 'comhair : agus thug thu oirre freumhachadh gu daingean, agus lìon i an tìr.

10 Chòmhdaiheadh beannta le a sgàile : agus le a geugaibh seudair àrda.

11 Chuir i mach a meoir gu ruig a' mhuir : agus a meanglain gu ruig an amhainn.

12 C'ar son a bhris thu sìos a ballacha-dìonaidh : ar chor as gu bheil uile luchd-gabhail na slighe 'g a spìonadh ?

13 Tha an torc as a' choille 'g a fàsachadh : agus tha fiadh-bheathach na macharach 'g a h-itheadh suas.

14 A Dhé nan slògh, pill, guidheamaid ort, amhaire a nuas o nèamh : agus faic, agus fiosraich an fhìonain so ;

15 Agus am fion-lios a shuidhich do dheas-làmh : agus am meanglan a neartaich thu dhuit féin.

16 Loisgeadh i le teine, ghearradh sìos i : le achmhasan do ghnùise sgriosar iad.

17 Bitheadh do làmh air fear do làimhe deise : air mac an duine, a neartaich thu dhuit féin.

18 An sin cha phill sinn air ar n-ais uait : beothaich sinn, agus gairmidh sinn air d' Ainm.

19 A Thighearna Dhé nan slògh, pill sinn : thoir air do ghnùis dealrachadh, agus saorar sinn.

An lxxxii. Salm.

Exultate Deo.

SEinnibh gu h-ait do Dhia ar neart : togaibh ìolach do Dhia Iacoib.

2 Glacaibh salm, agus thugaibh tiompan leibh : a' chlàrsach bhinn maille ris an t-saltair.

3 Anns a' ghealaich nuaidh séidibh an trompaid : anns an àm shuidhichte, air là ar féille.

4 Oir bu reachd so do Israel : riaghailt le Dia Iacoib.

5 Mar fhianuis shuidhich se e ann an Ioseph : an uair a thàinig e mach á tir na h-Eiphit, far an cual' e cainnt nach do thuig e.

6 O'n eallaich thug mi as a ghuala : o na poitean shaoradh a làmhan.

7 Ann an teinn ghairm thu, agus shaor mi thu : fhreagair mi thu ann an ionad dìomhair an tairneanaich.

8 Dhearbh mi thu : làimh ri uisgeachaibh Mheribah.

9 Eisd, O mo shluagh, agus bheir mi fianuis dhuit : O Israeil, ma dh' éisdeas tu rium,

10 Cha bhi dia coigreach annad : agus cha chrom thu sìos do dhia coimheach.

11 Is mise an Tighearn do Dhia, a thug a nìos thu á tir na h-Eiphit : fosgail do bheul gu farsuinn, agus lìonaidh mise e.

12 Gidheadh cha d' éisd mo shluagh ri m' ghuth : agus cha do ghabh Israel rium.

13 Uime sin thug mi thairis iad do ana-miann an cridhe féin : dh'imich iad 'n an comhairle féin.

14 O nach éisdeadh mo shluagh rium : nach imicheadh Israel ann am shlighibh.

15 Gu luath leagann sìos an eascairdean : agus thionndaidhinn mo làmh an aghaidh an naimhdean.

16 Bheireadh luchd-fuath an Tighearn' ùmh-lachd dha : ach mhaireadh an aimsir-san gu bràth.

17 Agus bheathaicheadh e iad le smior a' chruithneachd : agus le mil o'n charraig shàs uichinn thu.

URNUIGH FHEASGAIR.

An lxxxii. Salm.

Deus stetit.

THa Dia 'n a sheasamh ann an coimhthional nan cumhachdach: 'am measg nan diathan a bheir e breth.

2 Cia fhad a bheir sibh breth gu h-eucorach; agus a ghabhas sibh ri gnùis dhaoine aingidh?

3 Deanaibh ceartas do'n bhochd agus do'n dilleachdan: cumaibh còir ris an truaghan agus ris an fheumach.

4 Teasairgibh am bochd agus an t-ainnis: á làimh nan aingidh saoraibh iad.

5 Cha-n'èil eòlas no tuigse aca, ann an dorchadas gluaisidh iad: tha uile bhunaitean na talmhainn air chrith.

6 Thubhairt mi, Is diathan sibh: agus is mic sibh uile do'n Ti a's àirde.

7 Ach gheibh sibh bàs mar dhaoine: agus tuitidh sibh mar aon de na h-uachdarain.

8 Eirich, a Dhé, thoir breth air an talamh: oir sealbhaichidh tu na h-uile chinnich mar oighreachd.

An lxxxiii. Salm.

Deus, quis similis?

A Dhé, na bi a'd' thosd, na bi sàmhach: agus na bi a'd' thàmh, a Dhé.

2 Oir feuch, tha do naimhdean ri buaireas: agus thog iadsan le'm fuathach thu, suas an cinn.

3 An aghaidh do shluaigh gu cuilbheartach

dhealbh iad ole: agus ghabh iad comhairle le 'chéile an aghaidh do mhuintir dhòmhair.

4 Thubhairt iad, Thigibh, agus gearramaid as iad, o bhi 'n an cinneach: chum nach cuimhnichear ainm Israeil na's mò.

5 Oir le aon inntinn ghabh iad comhairle le 'chéile: a'd' aghaidh-sa rinn iad coimhcheangal;

6 Pàilliunan Edoim agus na h-Ismaelich: Moab agus na Hagaraich;

7 Gebal, agus Amon, agus Amalec: na Philistich maille ri luchd-àiteachaidh Thìoruis.

8 Mar an ceudna dhlùth-lean Asur riu: bu chòmhnadh iad do chloinn Lot.

9 Dean orra mar air Midian: mar air Sisera, mar air Iabin, aig sruth Chisoin;

10 A sgriosadh aig Endor: a rinneadh mar aolach do'n talamh.

11 Dean an àrd uaislean mar Oreb agus mar Sheeb: agus an uachdarain gu léir mar Sheba agus mar Shalmuna;

12 A thubhairt, glacamaid dhuinn féin: mar oighreachd àiteacha-còmhnuidh Dhé.

13 O mo Dhia, dean iad mar roth: mar asbhuaireas roimh 'n ghaoith;

14 Mar a loisgeas teine a' choille: agus mar a chuireas lasair na beannta ri theine.

15 Mar sin dean thusa tòrachd orra le d' dhoininn: agus le d' ioma-ghaoith cuir uamhunn orra.

16 Lìon an eudan le masladh: chum gu'n iarr iad d'Ainm, a Thighearna.

17 Bitheadh amhludh agus buaireas orra gu bràth: seadh, glacadh nàire iad agus sgriosar iad.

10 Chum gu'm bi fhios aig daoineibh gur tusa mhàin d'an Ainm Iehobhah : an Ti a's àirde os ceann na talmhainn uile.

An lxxxiv. *Salm.*

Quam dilecta !

CIa so-ghràdhach do phàilliuhan : a Thighearna nan slògh !

2 Tha m' anam a' miannachadh, seadh, eadhon a' fannachadh le déigh air cùirtibh an Tighearna: tha mo chridhe agus m' fhèidil ag éigheach gu h-àrd air son an Dé bhed.

3 Fhuair eadhon an gealbhonn tigh, agus an gobhlan-gaoithe nead dhi féin, anns an cuireadh i a h-àlach : d'altairean-sa, a Thighearna nan slògh, mo Dhia, agus mo Rìgh.

4 Is beannaichte iadsan a tha 'n an còmhnuidh a'd' thigh-sa : molaidh iad thu a ghnàth.

5 Is beannaichte an duine sin aig am bheil a neart annad-sa : agus iadsan aig am bheil do shlighean 'n an cridhe.

6 A' dol troimh ghleann Baca, ni iad sin tobar ann : lònaidh mar an ceudna an t-uisge na linntean.

7 Imichidh iad o neart gu neart : nochdar gach aon diubh 'an làthair Dhé ann an Sion.

8 A Thighearna Dhé nan slògh, cluinn m' urnuigh : éisd, a Dhé Iacoib.

9 A Dhé ar sgiath, faic : agus amhaire air gnùis d' aoin ungta.

10 Oir is fearr là a'd' chùirtibh : na mìle.

11 B'fhearr leam a bhi ri dorsaireachd ann an tigh mo Dhé : na 'bhi 'm còmhnuidh ann am pàilliuhaibh aingidheachd.

12 Oir is grian agus is sgiath an Tighearna Dia : agus bheir an Tighearna gràs agus glòir, cha chum e maith air bith uatha-san a ghluais-eas gu h-ionraic.

13 A Thighearna nan slògh : is beannaichte an duine a chuireas a dhùigh annad-sa.

An lxxxv. *Salm.*

Benedixisti, Domine.

BHa thusa bàigheil, a Thighearna, ri d' thìr : thug thu air ais braighdeanas Iacoib.

2 Mhaith thu cionta do shluaigh : dh' fholaich thu am peacadh uile.

3 Choisg thu do chorruich uile : thionndaidh thu o fhraoch d'fheirge.

4 Pill sinn, a Dhé ar slàinte : agus tog d'fhearg dhinn.

5 Gu bràth am bi corruich ort ruinn : an sin thu d'fhearg o linn gu linn ?

6 Nach ath-bheothaich thu sinn : chum gu'n dean do shluagh gairdeachas annad ?

7 Nochd dhuinn, a Thighearna, do thròcair : agus dednuich dhuinn do shlàinte.

8 Cluinnidh mi ciod a their Dia an Tighearna : oir labhraidh e sìth r'a shluagh, agus r'a naoimh, ach na pilleadh iad chum amaideachd.

9 Gu dearbh tha a shlàinte dlùth dhoibh-san d'an eagal e : chum gu'n còmhnuich glòir 'n ar tìr.

10 Tha tròcair agus firinn air còmhlaichadh a chéile : tha ceartas agus sìth air pògadh a chéile.

11 Fàsaidh firinn a nios as an talamh : agus seallaidh ceartas a nuas o na nèamhan,

12 Seadh, bheir an Tighearn maith dhuinn : agus bheir ar fearann uaith a thoradh.

13 Imichidh ceartas roimhe : agus stiùraidh e a cheuman 's an t-slighe.

URNUIGH MHAIDNE.

An lxxxvi. Salm.

Inclina, Domine.

A Om, a Thighearna, do chluas, éisd rium : oir tha mi bochd agus uireasbhuidheach.

2 Gléidh m'anam, oir tha mi diadhaidh : O thusa mo Dhia, saor d'òglach a dh' earbas asad.

3 Dean trècair orm, a Thighearn' : oir tha mi a' glaodhaich riut gach là.

4 Dean anam d'òglach féin aoibhinn : oir riut-sa, a Thighearna, togaidh mi m' anam.

5 Oir tha thusa, a Thighearna, maith agus iochdmhor : agus pailt ann an trècair dhoibh-san uile a ghairmeas ort.

6 Eisd, a Thighearna, ri m' urnuigh : agus thoir fainear guh m' athchuinge.

7 Ann an là mo theinn gairmidh mi ort : oir freagairidh tu mi.

8 Cha-n'eil do shamhuil-sa 'am measg nan diathan, a Thighearn' : agus cha-n'eil oibre ann, cosmhuil ri d' oibrìbh-sa.

9 Thig na cinnich uile a rinn thu agus sleuchdaidh iad a'd' làthair, a Thighearn' : agus bheir iad glòir do d'Ainm.

10 Oir is mòr thusa, agus tha thu a' deanamh nithean iongantach : is tusa Dia, thu féin a mhàin.

11 Teagaisg dhomh, a Thighearna, do shlighe, gluaisidh mi ann ad fhèrinn: coimh-cheangail mo chridhe chum eagal d' Ainme 'bhi orm.

12 Molaidh mi thu, a Thighearna mo Dhia, le m' uile chridhe : agus bheir mi glòir do d' Ainm gu bràth.

13 Oir is mòr do thrècair dhomh-sa : agus shaor thu m' anam o'n t-slochd a's iochdaraiche.

14 **A** Dhé, dh' éirich na h-uaibhrich a' m' aghaidh : agus dh' iarr coimhthional luchd-fòirneirt m' anam, agus cha do chuir iad thusa fa 'n comhair.

15 Ach tha thusa, a Thighearn', a' d' Dhia iochdmhor agus gràsmhor : mall chum feirge, agus pailt ann an trècair agus ann am fèrinn.

16 Amhaire orm, agus dean trècair orm : thoir neart do d' òglach, agus saor mac do bhanoglaich.

17 Thoir dhomh comharadh air mhaith, chum gu faic iadsan e aig am bheil fuath dhomh agus gu'n ghabh iad nàire : a chionn, a Thighearna, gu'n do chuidich thusa leam agus gu'n d' thug thu comhfhurtachd dhomh.

An lxxxvii. Salm.

Fundamenta ejus.

THa a bhunait anns na beanntaibh naomha : is ionmhuinn leis an Tighearn geatachan Shioin, thar uile ionada-còmhnuidh Iacobh.

2 Innsear nithe glòrmhor ort-sa : a chaithir Dhé.

3 Cuimhnichidh mi Rahab agus Babel : dhoibh-san d'an aithne mi.

4 Feuch, Palestin : agus Thorus, maille ri h-Etiopia, rugadh am fear so an sin.

5 Ach mu Shion theirear, Rugadh am fear so agus am fear ud innte : agus daingnichidh an Tì a's àirde i.

6 Comharaichidh an Tighearn 'n uair a sgrìobhas e sìos na fineachan : gu'n d'rugadh am fear so an sud.

7 Bithidh araon luchd-seinn agus luchd-ciuil an sin : tha mo thobair uile annad-sa.

An lxxxviii. Salm.

Domine Deus.

A Thighearn' a Dhé mo shlàinte, a là agus a dh'oidheche ghlaodh mi ann ad fhianuis : thigeadh m' urnuigh ann ad làthair, aom do chluas ri m' ghlaodh.

2 Oir tha m'anam làn truaighe : agus tha mo bheatha dlùth do'n uaigh.

3 Mheasadh mi mar iadsan a théid sìos do'n t-slochd : tha mi mar dhuine gun neart.

4 Saor 'am measg nam marbh, mar iadsan a mharbhadh, a tha 'n an luidhe 's an uaigh : air nach 'eil cuimhne agad na's mò, oir o d' làimh ghearradh as iad.

5 Chuir thu mi 's an t-slochd a's isle : ann an dorchadas anns na doimhneachdaibh.

6 Luidh d'fhearg orm gu teann : agus le d' thonnaibh uile chlaoidh thu mi.

7 Chuir thu mo luchd-eòlais fada uam : rinn thu mi a'm' ghràineileachd dhoibh.

8 Druidte suas tha mi : agus cha-n urrainn mi teachd a mach.

9 Tha mo shùil a' fàilneachadh a bhrìgh m' àmhghair : ghairm mi ort, a Thighearna, gach là, shìn mi mo làmhan riut.

10 Do na mairbh an nochd thu iongantais : an éirich na mairbh, agus am mol iad thu ?

11 An cuirear 'an céill do chaoimhneas caomh 's an uaigh : d' fhìrinn ann an sgrios ?

12 An aithnichear d'iongantais anns an dorchadas : agus d' fhìreantachd ann an talamh na dì-chuimhne ?

13 Ach riut-sa, a Thighearna, ghlaodh mise : agus anns a' mhaduinn thig m' urnuigh a'd làthair.

14 C'ar son, a Thighearn', a thilgeas tu m'anam uait : a dh'fholaicheas tu do ghnùis uam ?

15 Tha mise air mo chràdh, agus dlùth do'n bhàs o m'òige : dh'fhuiling mi d'uamhasan, tha mi ann an imeist.

16 Dh'imich d'fhearg gheur tharum : chlaoidh d'uamhasan mi.

17 Chaidh iad timchioll orm mar uisge gach là : chuairtich iad mi le 'chéile.

18 Chuir thu fear mo ghaoil agus mo charaid fada uam : tha luchd m' eòlais ann an dorchadas.

URNUIGH FHEASGAIR.

An lxxxix. Salm.

Misericordias Domini.

A Ir tràcairibh an Tighearna gu bràth seinnidh mi : o linn gu linn foillsichidh mi d' fhìrinn le m' bheul.

2 Oir thubhairt mi, Gu bràth togar suas tròcair: anns na nèamhan daingnichidh tu d'fhìrinn, ag ràdh,

3 Rinn mi coimhcheangal ri m'aon taghta: mhionnaich mi do Dhaibhidh m'òglach.

4 Gu bràth daingnichidh mi do shliochd: agus togaidh mi suas do rìgh-chaitheir o linn gu linn.

5 Molaidh na nèamhan d'ìongantais, a Thighearna: mar an ceudna d'fhirinn ann an coimhthional nan naomh.

6 Oir cò ann am flaitheanas: a choimh-measar ris an Tighearn?

7 Cò 'am measg mhac nan cumhachdach: a shamhluchear ris an Tighearn?

8 Is aobhar eagail Dia gu mòr ann an coimhthional nan naomh: agus is còir urram a thabhairt da os an ceann-san uile a tha mu'n cuairt da.

9 A Thighearna Dhé nan slògh, cò tha cosmhuil riut: treun a ta thu, a Thighearn', agus tha d'fhìrinn mu'n cuairt duit.

10 Riaghlaidh tusa onfha na fairge: 'n uair a dh'èireas a tonnan coisgidh tu iad.

11 Mhìn-phronn thu Rahab mar dhuine leònta: le gairdean do neirt sgap thu do naimhdean.

12 Is leat-sa na nèamha, mar an ceudna is leat an talamh: shuidhich thusa an cruinne-cé, agus a làn.

13 Chruthaich thusa an àirde tuath, agus an àirde deas: ni Tabor agus Hermon gairdeachas ann ad Ainm.

14 Agad-sa tha gairdean neartmhor: is làidir do làmh, is àrd do dheas làmh.

15 Is iad ceartas agus breitheanas àite-tàimh do rìgh-chaitheach: théid tròcair agus fìrinn roimh do ghnùis.

16 Is beannaichte an sluagh d'an aithne an fhuaim aoibhneach: imichidh iad, a Thighearn', ann an solus do ghnùise.

17 Ann ad Ainm-sa ni iad gairdeachas air feadh an là: agus ann ad fhìreantachd àrdaichear iad.

18 Oir is tusa glòir an neirt: agus ann ad dheadh-ghean àrdaichear ar n-adharc.

19 Oir is e an Tighearn ar sgiath: agus Aon naomh Israeil ar Rìgh.

20 An sin labhair thu ann an taisbeanadh ri d'Aon naomh, agus thubhairt thu: Chuir mise cuideachadh air aon a tha cumhachdach, dh'àrdaich mi aon taghta as an t-sluagh.

21 Fhuair mi Daibhidh m'òglach: le m'olaidh naomh dh'ung mi e.

22 Le'm bi mo làmh gu daingean: mar an ceudna neartaichidh mo ghairdean e.

23 Cha tog an nàmhaid eis dheth: agus cha chlaoidh mac an uile e.

24 Agus pronnaidh mi a naimhdean roimhe: agus buailidh mi iadsan le'm fuathach e.

25 Agus bithidh m'fhìrinn agus mo thròcair maille ris: agus ann am Ainm-sa àrdaichear 'adharc-san.

26 Agus cuiridh mi a làmh anns an fhairge: agus a dheas làmh anns na h-aimhnichibh.

27 Glaodhaidh e rium, is tu m'athair: mo Dhia, agus carraig mo shlàinte.

28 Mar an ceudna ni mi mo cheud-ghin dheth: àrd os ceann rìghrean na talmhainn.

29 Gu bràth gleidhidh mi mo thròcair dha : agus bithidh mo choimhcheangal seasmhach leis.

30 Agus suidhichidh mi gu bràth a shliochd : agus a rìgh-chaithir mar làithibh nan nèamh.

31 Ma thréigeas a chlann mo lagh : agus nach gluais iad ann am bhreitheanais ;

32 Ma mhi-naomhaicheas iad mo reachdan, agus nach gléidh iad m'aitheantan : an sin fiosraichidh mi le slait an eusaontas, agus le builibh an euceart.

33 Gidheadh, cha bhuin mi gu tur mo chaoimhneas-gràidh uaith : agus cha bhreug-naich mi mo ghealladh.

34 Cha bhris mi mo choimhcheangal, agus an ni a thàinig á m' bhilibh cha-n atharraich mi : aon uair mhionnaich mi air mo naomhachd, nach dean mi breug do Dhaibhidh.

35 Mairidh a shliochd gu bràth : agus a rìgh-chaithir mar a' ghrian a'm' làthair.

36 Mar a' ghealach daingnichear e gu bràth : agus mar fhianuis dhìleas ann an nèamh.

37 Ach thilg thu uait, agus ghabh thu gràin : bha fearg ort ri d' Aon ungtà.

38 Sgaoil thu coimhcheangal d'òglaich : thruaill thu a choron, 'g a thilgeadh gu làr.

39 Bhris thu a bhallacha-dìonaidd uile : rinn thu a dhaingneacha 'n an sgrìos.

40 Creachaidh iadsan uile, a ghabhas an t-slighe e : tha e 'n a mhasladh d'a choimh-earsnaich.

41 Thog thu suas deas làmh a naimhdean : rinn thu 'eascairdean uile ait.

42 Mar an ceudna phill thu faobhar a

chlaidheimh : agus cha d'thug thu air seasamh anns a' chath.

43 Chuir thu as d'a ghòir : agus thilg thu sìos a rìgh-chaithir gu làr.

44 Ghiorraich thu làithean 'dige : chòmhdaich thu e le nàire.

45 Cia fhad, a Thighearn', a dh'fholaicheas tu thu féin gu tur : a loisgeas mar theine do chorruich ?

46 Cuimhnich cia gearr m' aimsir : c'ar son a chruthaich thu gu dìomhain clann nan daoine uile ?

47 Cò e an duine a tha beò, agus nach faic am bàs : no 'theasairgeas 'anam féin o làimh na h-uaighe ?

48 C'ait am bheil do chaoimhneas-gràidh roimhe so, a Thighearn' : a mhionnaich thu do Dhaibhidh air d'fhèrrinn ?

49 Cuimhnich, a Thighearna masladh do sheirbhiseach : gu'n do ghiùlain mise ann am uchd uile mhasladh sluaigh mhòir ;

50 Leis an do mhaslaich do naimhdean, a Thighearna, leis an do mhaslaich iad ceuman d' Aoin ungtà : beannaichte gu robh an Tighearn gu sìorruiddh. Amen, agus Amen.

URNUIGH MHAIDNE.

An xc. Salm.

Domine, refugium.

A Thighearna, bha thusa a' d' ionad-còmh-nuidh dhuinn : o linn gu linn.

2 Mu'n do ghineadh na beanntan, agus mu'n

do dhealbh thu an talamh agus an cruinne-cé : eadhon o bhith-bhuantachd gu bith-bhuantachd, is tusa Dia.

3 Tionndaidhidh tu an duine gu sgrios : agus their thu, Pillibh, a chlann nan daoine.

4 Oir tha mìle bliadhna ann ad shealladhsa, mar an là 'n dé 'n uair a théid e seachad : agus mar fhaire anns an oidhche.

5 Dh'fhuadaich thu iad, mar le sruth, mar chodal tha iad : anns a' mhaduinn tha iad mar fheur a dh'fhàsas suas.

6 Air maduinn thig e fo bhlàth, agus fàsaidh e suas : air feasgar gearrar sìos e, agus seargaidh e.

7 Oir tha sinn air ar caitheamh le d' fheirg : agus le d' chorruich tha sinn air ar claoidh.

8 Chuir thu ar n-euceartan a'd' fhianuis : ar peacaidhean dìomhair ann an solus do ghnùise.

9 Oir tha ar làithean air teireachduinn ann ad fheirg : chaith sinn ar bliadhnacha, mar sgeul a dh'innseadh.

10 Tha làithean ar bliadhnacha 'n an tri fichead bliadhna agus a deich, agus le tuilleadh neirt ma bhitheas ceithir fichead ann : is saothair agus doilgheas an spionnadh ; oir gearrar as e gu grad, agus siubhlaidh sinn.

11 Cò d'an aithne neart d' fheirge : agus a réir d'eagail, do chorruich ?

12 Teagaisg dhuinn mar so ar làithean àireamh : chum gu'n socraich sinn ar cridhe air gliocas.

13 Pill, a Tighearna, cia fhad : agus gabh aithreachas a thaobh do sheirbhiseach.

14 Sàsuich sinn gu moch le d' thròcair : a

chum gu'n dean sinn gairdeachas agus aoibhneas rè ar làithean uile.

15 Dean aoibhneach sinn a réir nan là air an do chràidh thu sinn : nam bliadhna anns am faca sinn olc.

16 Faicear d' obair le d' sheirbhisich : agus do ghldir le 'n cloinn.

17 Agus bitheadh Maise an Tighearn' ar Dé oirnn : agus daingnich thusa obair ar làmh dhuinn, seadh, daingnich obair ar làmh.

An xci. Salm.

Qui habitat.

G Abhaidh esan a tha 'n a chòmhnuidh ann an ionad dìomhair an Ti a's àirde : tàmh fo sgàile an Uile-chumhachdaich.

2 Their mi mu thimchioll an Tighearna, Is e mo thearmunn, agus mo dhaingneach : mo Dhia, anns an cuir mi mo dhòigh.

3 Gu dearbh saoraidh e thu o rib an eunadair : o'n phlàigh mhilltich.

4 Le 'iteagaibh còmhdachidh e thu, agus fo a sgiathaibh bithidh d' earbsa : bithidh fhìrinn 'n a sgéith agus 'n a targaid dhuit.

5 Cha bhi eagal ort a thaobh an uamhais anns an oidhche : no na saighde a ruitheas 's an là ;

6 No na plàigh' a ghluaiseas ann an dorchadas : no an sgrios a mhilleas mu mheadhon-là.

7 Tuitidh mìle ri d' thaobh, agus deich mìle air do làimh dheis : ach cha tig e am fagus duit.

8 A mhàin le d' shuilibh seallaidh tu : agus chi thu dìol nan aingidh.

9 A chionn gu'n d'rinn thu an Tighearn 'n a

thearmunn : an Ti a's àirde 'n a ionad-còmhnuidh dhuit ;

10 Cha-n éirich ole air bith dhuit : agus cha tig plàigh am fagus do d' fhàrdùich.

11 Oir bheir e àithne d'a ainglibh mu d' thimchioll : chum do ghleidheadh ann ad shlighibh uile.

12 'N an làmhan togaidh iad suas thu : air eagal gu'm buail thu do chos air cloich.

13 Air an leòmhan agus air an nathair-nimhe saltraidh tu : pronnaidh tu fo d' chois an leòmhan òg agus an dràgon.

14 A chionn gu bheil gràdh aige dhomh, saoraidh mi e : àrdaichidh mi e, a chionn gur aithne dha m' Ainm.

15 Gairmidh e orm, agus éisdidh mi ris : bithidh mi maille ris ann an teinn ; teasairgidh mi e, agus bheir mi urram dha.

16 Le fad làithean sàsuichidh mi e : agus nochdaidh mi dha mo shlàinte.

An xcii. Salm.

Bonum est confiteri.

IS maith an ni buidheachas a thabhairt do an Tighearn : agus cliu a thabhairt do d' Ainm-sa, O 'Thi a's àirde ;

2 Do chaoimhneas-gràidh a chur 'an céill anns a' mhaduinn : agus d' fhìrinn gach oidhebe,

3 Air inneal-ciuil nan deich teud, agus air an t-saltair : air a' chlàrsaich, le fuaim fhonnmhoir àird.

4 Oir rinn thu mi aoibhinn, a Thighearna, trid d' oibre-sa : ann an gnìomharaibh do làmh ni mi gairdeachas.

5 Cia mòr do ghnìomhara-sa, a Thighearna : ro dhomhain tha do smuaintean.

6 Cha-n eòl do'n amblair e : agus cha tuig an t-amadan so.

7 An uair a chinneas na h-aingidh mar fheur, agus a thig uile luchd-deanamh na h-euceirt fo bhlàth : bithidh iad air an sgrios am feasd ; ach tha thusa ro àrd gu storruidh, a Thighearna.

8 Oir feuch, do naimhdean, a 'Thighearn', oir feuch, do naimhdean, sgriosar iad : sgapar uile luchd-deanamh na h-euceirt.

9 Ach mar adharc buabhuill àrdaichidh tu m' adharc-sa : ungar mi le olaidh ùir.

10 Agus amhaircidh mo shùil air m' eascairdibh : mu na droch dhaoinibh a dh' éireas suas a' m' aghaidh cluinnidh mo chluasan.

11 Mar chrann-pailme thig am firean fo bhlàth : mar Sheudair air Lebanon, fàsaidh e suas.

12 Iadsan a shuidhichear ann an tigh an Tighearn' : ann an cùirtibh ar Dé-ne thig iad fo bhlàth.

13 Fathast 'n an sean aois bheir iad a mach toradh : sultmhor agus ùr bithidh iad.

14 A chum gu nochd iad gu bheil an Tighearn mo charraig, cothromach : agus nach 'eil euceart ann.

URNUIGH FHEASGAIR.

An xciii. Salm.

Dominus regnavit.

THa an Tighearn a' ròghachadh, tha e air a sgeadachadh le mòralachd : tha an Tigh-

earn air a sgeadachadh le neart, agus chrioslaich se e féin.

2 Tha 'n saoghal mar an ceudna air a dhaingneachadh : chum nach gluaisear e.

3 Dhaingnicheadh do rìgh-chaitheir o chian : o shìorruidheachd tha thusa ann.

4 Thog na tuiltean suas, a Thighearna, thog na tuiltean suas an guth : togaidh na tuiltean suas an tonnan.

5 Os ceann toirme uisgeacha lìonmhor, os ceann thonn neartmhor na mara : is neartmhor anns na h-àrdaibh an Tighearna.

6 Tha do theisteis ro fhìor : do d' thigh-sa is iomchuidh naomhachd, a Thighearna, gu bràth.

An xciv. Salm.

Deus ultionum.

A Dhé an dòghaltais : a Thighearna Dhé an dòghaltais, dealraich a mach.

2 Ardaich thu féin, a Bhreitheimh na talmhainn : ìoc luigheachd do na h-uuibhrich.

3 Cia fhad a ni na h-aingidh, a Thighearna : cia fhad a ni na h-aingidh caithream ?

4 Cia fhad a bhrùchdas iad briathran, a labhras iad nithe cruaidhe : a bhitheas uile luchd-deanamh an uile ri ràiteachas ?

5 A bhruthas iad do shluagh, a Thighearna : agus a chlaoidheas iad d' oighreachd ?

6 A mharbhas iad a' bhantrach agus an coigreach : agus a mbortas iad na dìlleachdain ?

7 Agus a their iad, Cha-n fhaic an Tighearna : agus cha toir Dia Iacoib fairear e.

8 Tuigibh, sibhse amhlairan 'am measg an

t-sluaigh : agus amadana, c' uin a bhitheas sibh glic ?

9 An ti a shuidhich a' chluas, nach cluinn e : an ti a dhealbh an t-sùil, nach faic e ?

10 An ti a smachdaicheas na fineacha, nach cronaich e : an ti a theagaisgeas eòlas do'n duine, nach 'eil eòlas aige ?

11 Is fiosrach an Tighearna air smuaintibh dhaoine : gur dìomhanas iad.

12 Is beannaichte an duine a smachdaicheas tusa, a Thighearna : agus a theagaisgeas tu as do lagh.

13 Chum fois a thabhairt da o làithibh an uile : gus an cladhaichear slochd do'n aingidh.

14 Oir cha tilg Dia dheth a shluagh : agus cha tréig e 'oighreachd féin ;

15 Ach pillidh breitheanas ri ceartas : agus leanaidh iadsan uile a tha ionraic 'n an cridhe e.

16 Cò dh' éireas leam an aghaidh luchd-deanamh an uile : cò sheasas air mo shon an aghaidh luchd-deanamh na h-aingidheachd ?

17 Mur bitheadh an Tighearna 'g am chuideachadh : is beag nach robh m' anam 'n a thàmh gu tosdach.

18 'Nuair a thubhairt mi, Tha mo chos air sleamhnachadh uam : chum do thròcair, a Thighearna, suas mi.

19 Ann an lìonmhoireachd mo smuaintean an taobh a stigh dhòm : thug do chomhfhurtachd-sa sòlas do m' anam.

20 Am bi comunn riut-sa aig rìgh-chaitheir na h-euceirt : a dhealbhas aimhleas le reachd ?

21 Cruinnichidh iad le 'chéile an aghaidh anama an fhèirein : agus dìtidh iad fuil neò-chiontach.

22 Ach is e an Tighearn mo dhaingneach : agus is e mo Dhia carraig mo dhòchais.

23 Agus diolaidh e orra féin an euceart, agus 'n an aingidheachd féin gearraidh e as iad : gearraidh an Tighearn ar Dia as iad.

URNUIGH MHAIDNE.

An xcv. Salm.

Venite, exultemus.

O Thigibh, seinneamaid do'n Tighearn : togamaid iolach do charraig ar slàinte.

2 Thigeamaid 'n a fhianuis le buidheachas : agus le salmaibh togamaid ceòl dha gu suilbhreach.

3 Oir is Dia mòr an Tighearn : agus is Rìgh mòr e os ceann nan uile dhia.

4 'N a làimh-san tha doimhneachda na talmhainn : agus is leis àirde nam beann.

5 Is leis an fhairge, oir is e a rinn i : agus dhealbh a làmhan an talamh tioram.

6 O thigibh, sleuchdamaid, agus cromamaid sìos : tuiteamaid air ar glùinibh 'am fianuis an Tighearn' a rinn sinn.

7 Oir is esan ar Dia : agus is sinne sluagh 'ionaltraidh-san, agus caoraich a làimhe.

8 An diugh ma dh' éisdeas sibh r'a ghuth, na cruaidhichibh 'ur cridhe : mar anns a' chonnsachadh, mar ann an là a' bhuaireadh anns an fhàsach ;

9 'N uair a bhuaireadh 'ur n-aithrichean mi : a dhearbhadh iad mi, agus a chunnaic iad m' oibre.

10 Ré dhà fhichead bliadhna chuireadh campar orm leis a' ghinealach ud, agus thubhairt mi : Is sluagh seacharanach 'n an cridhe iad, agus cha-n aithne dhoibh mo shlighean ;

11 D'an d'thug mi mo mhionnan a'm' fheirg : nach rachadh iad a steach do m' fhois.

An xcvi. Salm.

Cantate Domino.

CAnaibh do an Tighearn laoidh nuadh : canaibh do an Tighearn, a thèran uile.

2 Canaibh do an Tighearn, beannaichibh 'Ainm : foillsichibh o là gu là a shlàinte.

3 Cuiribh 'an céill 'am measg nan cinneach a ghlòir : 'am measg gach sluaigh 'iongantais-san.

4 Oir is mòr an Tighearn, agus is ro airidh e air cliu : is aobhar eagail esan os ceann nan uile dhiathan.

5 Oir is ìodhoil uile dhiathan nan cinneach : ach is e'n Tighearn a rinn na nèamhan.

6 Tha urram agus mòralachd 'n a fhianuis : neart agus maise 'n a ionad naomh.

7 Thugaibh do an Tighearn, sibhse fhineacha nan sluagh : thugaibh do an Tighearn glòir agus neart.

8 Thugaibh do an Tighearn a' ghlòir a's cubhaidh d'a Ainm : thugaibh tabhartas leibh, agus thigibh a steach d'a chùirtibh.

9 Sleuchdaibh do an Tighearn ann am maise na naomhachd : bitheadh eagal oirbh 'n a fhianuis, gach uile thèr.

10 Abraibh 'am measg nan cinneach, Tha an Tighearn a' rìoghachadh : mar an ceudna daing-

nichear an domhan chum nach gluaisear e, bheir e breth air na slòigh le ceartas.

11 Bitheadh na nèamhan aoibhneach, agus deanadh an talamh gairdeachas : beucadh an fhairge agus a làn.

12 Bitheadh a' mhachair ait, agus gach ni a tha innte : an sin deanadh uile chranna na coille luathghaire 'an làthair an Tighearna.

13 Oir tha e a' teachd, oir tha e a' teachd a thoirt breth air an talamh : bheir e breth air an t-saoghal le ceartas, agus air na slòigh le 'fhirinn.

An xcvi. Salm.

Dominus regnavit.

THa an Tighearn a' rìoghachadh, bitheadh aiteas air an talamh : deanadh na h-eil-eana lionmhor gairdeachas.

2 Tha neoil agus dorchadas m'a thimchioll : is iad ceartas agus breitheanas àite-còmhnuidh a rìgh-chaitreach.

3 Théid teine roimhe : agus loisgidh e suas a naimhdean air gach taobh.

4 Shoillsich a dhealanaich an cruinne-cé : chunnaic, agus chriothnaich an talamh.

5 Leagh na beanntan as mar chéir o làthair an Tighearna: o làthair Thighearna na talmhainn uile.

6 Cuiridh na nèamhan 'an céill a cheartas : agus chi gach sluagh a ghloir.

7 Bithidh amhladh orra-san uile a ni seirbhis do dhealbhan snaidhte, a ni uail a' òdholaibh: sleuchdaibh dha, a dhiathan uile.

8 Chuala Sion, agus bha aoibhneas oirre :

agus rinn nigheanan Iudah gairdeachas, air son do bhreitheanas, a Thighearna.

9 Oir tha thusa, a Thighearn', àrd os ceann na talmhainn uile : tha thu air d' àrdachadh gu mòr os ceann nan uile dhiathan.

10 Sibhse a ghràdhaicheas an Tighearn, fuathaichibh olc : gleidhidh e anaman a naomh ; á làimh nan aingidh saoraidh e iad.

11 Dh' éirich solus do'n fhìrean : agus aoibhneas dhoibh-san a tha ionraic 'n an cridhe.

12 Bitheadh aoibhneas oirbh, fhìreana, anns an Tighearn : agus thugaibh buidheachas ri cuimhneachadh air a naomhachd.

URNUIGH FHEASGAIR.

An xcvi. Salm.

Cantate Domino.

O Seinnibh do'n Tighearn laoidh nuadh : oir rinn e nithean iongantach.

2 Dh' oibrich a dheas làmh : agus a ghairdean naomh slàinte dha.

3 Thaisbein an Tighearn a shlàinte : ann an sealladh nan cinneach dh' fhoillsich e 'fhireantachd.

4 Chuimhnich e a thròcair agus 'fhirinn do theaghlach Israeil : chunnaic uile chrìocha na talmhainn slàinte ar Dé.

5 Togaibh iolach ait do'n Tighearn, a thèran uile : togaibh 'ur guth, deanaibh gairdeachas, agus seinnibh cliu.

6 Seinnibh do'n Tighearn le clàrsaich : le clàrsaich agus guth sailme.

7 Le trompaidibh agus guth na h-adhair: togaibh iolach ait 'an làthair an Rìgh Iehobhah.

8 Beucadh an fhairge agus a làn: an saoghal agus iadsan a tha 'n an còmhuidh ann.

9 Buailleadh na tuitlean am bosan, cuideachd deanadh na beannta luathghaire 'an làthair an Tighearna: oir tha e a' teachd a thabhairt breth air an talamh.

10 Bheir e breth air an t-saoghal ann am fireantachd: agus air na slòigh ann an ceartas.

An xcix. Salm.

Dominus regnavit.

THa an Tighearn a' rìoghachadh, crioth-naicheadh na slòigh: the e 'n a shuidhe eadar cheruban, bitheadh crith air an talamh.

2 Tha an Tighearn mòr ann an Sion: agus tha e àrd os ceann gach sluaigh.

3 Moladh iad d' Ainm mòr agus uamhasach: is naomh e.

4 Agus is toigh leis an rìgh chumhachdach breitheanas, is tu a shocrucias a' chòir: ni thusa breitheanas, agus ceartas ann an Iacob.

5 Ardaichibh an Tighearn ar Dia: agus sleuchdaibh aig stòl a chos, is naomh esan.

6 Bha Maois agus Aaron 'am measg a shagart, agus Samuel 'n am measg-san a ghairm air 'Ainm: ghairm iadsan air an Tighearn, agus fhreagair esan iad.

7 Ann am baideal neoil labhair e riu: ghléidh iad a theisteis, agus an reachd a thug e dhoibh.

8 A Thighearn' ar Dia, fhreagair thusa iad: is tu an Dia a thug maitheanas dhoibh, ged a rinn thu dìogháltas air son an gnìomhara.

9 Ardaichibh an Tighearn ar Dia, agus sleuchdaibh aig a shliabh naomh: oir is naomh an Tighearn ar Dia.

An c. Salm.

Jubilate Deo.

TOgaibh iolach ait do'n Tighearn, a thèran uile: deanaibh seirbhis do'n Tighearn le h-aobhneas, thigibh 'n a fhianuis le luathghaire.

2 Bitheadh fios agaibh gur e'n Tighearn a's Dia ann; is e a rinn sinn, agus cha sinn féin: is sinn a shluagh, agus caoraich 'ionaltraidhsan.

3 Thigibh a steach air a gheataibh le buidheachas, d' a chùirtibh le moladh: thugaibh buidheachas dha, beannaichibh 'Ainm.

4 Oir tha 'n Tighearn maith, mairidh a thròcair gu bràth: agus 'fhèrinn o linn gu linn.

An ci. Salm.

Misericordiam et iudicium.

MU thròcair agus breitheanas canaidh mi: dhuit-sa, a Thighearna, seinnidh mi.

2 Iomchairidh mi mi féin gu glic: air slighe ionraic.

3 O c'uin a thig thu a m' ionnsuidh: gluaisidh mi ann an ionracas mo chridhe 'am meadhon mo thighe.

4 Cha chuir mi ni ole sam bith fa chomhair mo shùl; is fuathach leam obair luchd-eusaontais: cha lean i rium.

5 Triallaidh cridhe iargalta uam : air an daoi cha chuir mi eòlas.

6 An ti gu dìomhair a bheir beum d'a choimhearsnach : esan gearraidh mi as.

7 An ti aig am bheil sealladh àrd, agus cridhe uaibhreach : esan cha-n fhuing mi.

8 Bithidh mo shùilean air fireanaibh na tìre : chum gu'n gabh iad còmhnuidh leam.

9 Esan a ghluaiseas ann an slighe ionraic : ni e seirbhis dhomh.

10 Cha ghabh fear-deanamh ceilge còmhnuidh ann am thigh : cha-n fhuirich fear-labhairt bhreug fa chomhair mo shùl.

11 Gu moch gearraidh mi as uile dhroch dhaoine na tìre : chum gu'n sgath mi as o chaithir an Tighearn' uile luchd-deanamh an uile.

URNUIGH MHAIDNE.

An. cii. Salm.

Domine, exaudi.

A Thighearn', éisd ri m'urnuigh : agus thigeadh mo ghlaodh a d'ionnsuidh.

2 Na folaich do ghnùis uam ann an là mo theinn : aom do chluas rium 's an là air an gairm mi ort ; éisd rium gu grad.

3 Oir tha mo làithean air teireachdainn mar dheataich : agus tha mo chnàmhan air an losgadh mar theinntein.

4 Tha mo chridhe air a bhualadh, agus air seargadh mar fheur : air chor as nach cuimhne leam m'aran itheadh.

5 Le guth m'osnaich : lean mo chnàmhan ri m'fheadil.

6 Tha mi cosmhuil ri pelican an fhàsaich : tha mi mar chomhachaig nan ionad aonaranach.

7 Tha mi ri faire, agus tha mi mar eun : 'n a aonar air mullach tighe.

8 Air feadh an là tha mo naimhde 'g am mhasluchadh : agus iadsan, a tha air bhoile rium, mhionnaich iad a'm' aghaidh.

9 Oir dh'ith mi luath mar aran : agus mheasg mi mo dheoch le m' dheuraibh ;

10 Trid do chorruich agus d'fheirge : oir thog thu mi suas, agus leag thu mi sìos.

11 Tha mo làithean, mar sgàile, ag aomadh sìos : agus tha mi féin, mar fheur, air seargadh.

12 Ach mairidh tusa, a Thighearna, gu bràth : agus do chuimhne o linn gu linn.

13 Eiridh tusa, ni thu tràcair air Sion : oir tha 'n t-àm gu deadh-ghean a nochdadh dhi, seadh, an t-àm suidhichte air teachd.

14 Oir tha do sheirbhisich a' gabhail tlachd 'n a clachaibh : agus tha deadh rùn aca d'a luathre.

15 Mar sin bithidh eagal air na cinnich roimh Ainm an Tighearn' : agus air uile rìghribh na talmhainn roimh a ghlòir.

16 An uair a thogas an Tighearn suas Sion : chithear e 'n a ghlòir ;

17 Bheir e 'n aire do urnuigh nan dìobarach : agus cha dean e tàir air an athchuinge.

18 Sgrìobhar so do'n àl ri teachd : agus molaidh an sluagh a ghinear an Tighearn.

19 Oir dh'amhaire e nuas o Airde a naomh-

achd féin : o na nèamhan sheall an Tighearn air an talamh ;

20 A chluinntinn osnaich a' phrìosanaich : chum fuasgladh orra-san a dh'orduicheadh chum bàis ;

21 Chum Ainm an Tighearna 'chur 'an céill ann an Sion : agus a chliu ann an Ierusalem ;

22 An uair a chruinnichear na slòigh le 'chéile : agus na rìoghachda gu seirbhis a d'eanamh do an Tighearn.

23 Chlaoidh e anns an t-slighe mo neart : ghiorraich e mo làithean.

24 Thubhairt mi, Mo Dhia, na tabhair air falbh mi ann am meadhon mo làithean : tha do bhliadhnan-sa air feadh nan uile linn.

25 O chian leag thu bunaite na talmhainn : agus is iad na nèamhan obair do làmh.

26 Théid as doibh-san, ach mairidh tusa : fàsaidh iadsan uile sean mar eudach.

27 Mar thrusgan caochlaidh tu iad, agus bithidh iad air an caochladh : ach is tusa an ti ceudna, agus cha chrìochnaichear do bhliadhnan.

28 Mairidh clann do sheirbhiseach : agus daingnichear an sliochd a'd' fhianuis.

An ciii. Salm.

Benedic anima mea.

BEannaich an Tighearn, O m'anam : agus moladh gach ni a tha 'n taobh a stigh dh'òim, 'Ainm naomh-san.

2 Beannaich an Tighearn, O m'anam : agus na dì-chuimhnich a thiodhlacan uile.

3 'S e 'mhaitheas dhuit do pheacaidhean gu léir : a shlànuicheas d' euslaintean uile ;

4 A shaoras do bheatha o sgrios : a chrùnas thu le caoimhneas-gràidh agus caomh-thrècairibh ;

5 A shànuicheas do bheul le nithibh maithe : air chor as gu'n ath-nuadhaichear d' òige mar òige na h-iolaire.

6 Ni an Tighearn ceartas agus breitheanas : dhoibh-san uile a tha air an sàruchadh.

7 Dh' fhoillsich e a shlighean do Mhaois : a ghnìomhara do chloinn Israeil.

8 Is trècaireach agus is gràmhor an Tighearn : mall chum fheirge agus pailt ann an caoimhneas-gràidh.

9 Cha chronaich e do ghnàth : agus cha ghléidh e 'fhearg gu bràth.

10 A réir ar peacaidhean cha d' rinn e oirnn : agus a réir ar n-eucearta cha d' thug e luigh-eachd dhuinn.

11 Oir mar a tha na nèamhan àrd os ceann na talmhainn : mar sin tha a thrècair mòr d'an taobh-san d'an eagal e.

12 Cho fad as a tha 'n àird an ear o'n àird an iar : cho fad as sin chuir e uainn ar n-eusaontais.

13 Mar ghabhas athair truas d'a chloinn : gabhaidh an Tighearn truas dhiubh-san d'an eagal e.

14 Oir is aithne dha ar dealbh : is cuimhne leis gur duslach sinn.

15 An duine, mar fheur tha a làithean : mar bhlàth na macharach, mar sin fàsaidh e fo bhlàth.

16 Oir gabhaidh a'ghaoth thairis, agus cha bhi e ann : agus cha-n aithnich 'ionad féin e na's mò,

17 Ach tha tròcair an Tighearn' o shìorruidh-eachd orra-san d'an eagal e : agus 'fhìreantachd do chloinn an cloinne ;

18 Dhoibh-san a chumas a choimhcheangal : agus a chuimhnicheas 'àitheanta chum an deanamh.

19 Shocruich an Tighearn a rìgh-chaitir anns na nèamhan : agus tha a' rìoghachd a' riaghladh os ceann nan uile.

20 Beannaichibh an Tighearn, sibhse 'Aingle, treun ann an neart : a' deanamh 'iarrtuais, ag éisdeachd ri fuaim 'fhocail.

21 Beannaichibh an Tighearn, a shìdigh uile : sibhse a luchd-frithealaidh a tha 'deanamh a thoile.

22 Beannaichibh an Tighearn, 'oibre uile, anns gach àite d'a thighearnas : beannaich an Tighearn, O m'anam.

URNUIGH FHEASGAIR.

An civ. Salm.

Benedic, anima mea.

BEannaich an Tighearn, O m'anam : A Thighearna mo Dhia, tha thusa ro mhòr, le urram agus mòralachd tha thu air do sgeadachadh.

2 Tha thu a' cur soluis umad mar thrusgan : a' sìneadh a mach nan nèamh mar chùirtein.

3 Tha e a' leagadh sailthean a shedmar anns na h-uisgeachaibh : a' deanamh nan neul 'n an carbad dha féin, a' siubhal air sgiathaibh na gaoithe.

4 A' deanamh 'Aingle 'n an spioradaibh :

a luchd-frithealaidh 'n an teine lasarach.

5 Shuidhich e an talamh air a bhunaitibh : chum nach gluasteadh e gu bràth.

6 Leis an doimhneachd mar le trusgan chòmhdach thu e : sheas na h-uisgeachan os ceann nam beann.

7 O d'achmhasan-sa theich iad : o ghuth do thairneanaich ghreas iad rompa.

8 Chaidh iad suas ri taobh nam beann, chaidh iad sìos air feadh nan gleann : do'n àit a dh'orduich thusa dhoibh.

9 Shuidhich thu cròch air nach téid iad thairis : chum nach pill iad a rìs a chòmhdachadh na talmhainn.

10 Tha e a' cur thobar anns na gleanntaibh : a tha a' ruith air feadh nam beann.

11 Bheir iad deoch do uile bheathaichibh na macharach : coisgidh na h-asail fhiadhaich an ìotadh.

12 Am fagus doibh còmhnuidhidh eunlaith nan speur : a bhitheas a' seinn 'am measg nan geug.

13 Uisgichidh e na beanntan o'shedmraichibh : le toradh a ghnìomh sàsuichear an talamh.

14 Bheir e air feur fàs do'n spréidh : agus air luibh chum seirbhis an duine.

15 Chum aran a thabhairt as an talamh, agus fion a ni cridhe an duine subhach : oladh a ni a ghnùis dealrach, agus aran a neartaicheas cridhe an duine.

16 Tha craobhan an Tighearna làn brìgh : seudair Lebanoin a shuidhich e.

17 Far an dean na h-eoin an nid : aig an store tha na craobhan giuthais mar ionad-tàimh.

18 Tha na beanntan àrda 'n an tearmunn do na gabhair fhiadhaich : na creagan do na coin-eanaibh.

19 Rinn e a' ghealach air son aimsirean : is aithne do'n ghréin mar a luidheas i.

20 Ni thu dorchadas agus tha 'n oidheche ann : an sin snàigidh uile bheathaiche na coille mach.

21 Beucaidh na leòmhain òga air son cobh-artaich : agus ag iarraidh am bidh air Dia.

22 Eiridh a' ghrian, cruinnichidh iad le 'chéile : agus 'n an àitibh-tàimh luidhidh iad.

23 Théid an duine mach gu 'obair : agus gu 'shaothair gu feasgar.

24 Cia hionmhor d' oibre, a Thighearna : ann an gliocas rinn thu iad gu léir, tha 'n talamh làn de d' shaoibhreas.

25 Mar an ceudna an cuan so a tha mòr agus farsuinn : anns am bheil creutairean snàigeach gun àireamh, araon beathaichean beaga agus mòra.

26 An sin siubhlaidh na longan : agus an Lebhiatan sin, a dhealbh thu gu sùgradh ann.

27 Feithidh iad sin uile ort-sa : chum gu'n tabhair thu dhoibh am biadh 'n a thràth.

28 Bheir thusa dhoibh, cruinnichidh iadsan : fosgailidh tu do làmh, sàsuichear iad le maith.

29 Folaichidh tu do ghnùis, bithidh iad fo amhladh : bheir thu uatha an deò, eugaidh iad, agus pillidh iad ri'n ùir.

30 Cuiridh tu mach do spiorad, cruthaichear iad : agus ath-nuadhaichidh tu aghaidh na tal-mhainn.

31 Mairidh Glòir an Tighearna gu bràth : ni an Tighearn gairdeachas 'n a oibrìbh.

32 Seallaidh e air an talamh, agus criothnaichidh e : beanaidh e ris na beanntaibh, agus bithidh deatach dhiubh.

33 Seinnidh mise do an Tighearn an cian is beò mi : canaidh mi moladh do m' Dhia fhad 's a bhitheas bith agam.

34 Bithidh mo smuaintean air mìlis : ni mi gairdeachas anns an Tighearn.

35 Sgriosar peacaich a mach as an talamh, agus cha bhi na h-aingidh ann na's mò : beannaich an Tighearn, O m' anam ; molaibh-se an Tighearn.

URNUIGH MHAIDNE.

An cv. Salm.

Confitemini Domino.

O Thugaibh buidheachas do an Tighearn, gairmibh air 'Ainm : foillsichibh 'am measg nan sluagh a ghnìomhara.

2 Seinnibh dha, seinnibh sailm dha : labhraibh air 'oibrìbh iongantach-san gu léir.

3 Deanaibh uaill á 'Ainm naomh-san : bitheadh gairdeachas air cridhe na dream a dh' iarras an Tighearn.

4 Iarraibh an Tighearn agus a neart : iarraibh a ghnùis a ghnàth.

5 Cuimhnichibh 'oibrean iongantach a rinn e : a chomharaidhean agus breitheanais a bheoil ;

6 O sibhse a shliochd Abrahaim 'oglaich-san : sibhse a chlann Iacoib a dhaoine taghta-san.

7 Is esan an Tighearn ar Dia-ne : air feadh na talmhainn uile tha a bhreitheanais.

8 Chuimhnich e gu siorruidh a choimhcheangal : am focal a dh' orduich e do mhìle ginealach ;

9 A rinn e ri Abraham ; agus a mhionnan do Isaac ;

10 Agus dhaingnich e sin do Iacob mar reachd : do Israel mar choimhcheangal bith-bhuan.

11 Ag ràdh, Dhuit-sa bheir mi fearann Chan-aain : crannchur 'ur n-oighreachd.

12 An uair nach robh iad ach ro thearc ann an àireamh : agus 'n an coigrich ann ;

13 Agus a chaidh iad o chinneach gu cinneach : o ròghachd gu sluagh eile ;

14 Cha do leig e le duine sam bith eucoir a dheanamh orra : agus smachdaich e rìghrean air an son.

15 Ag ràdh, Na beanaihb ri m' Dhaoinibh ungtà : agus air m' fhàidhibh na deanaibh cron.

16 Agus ghairm e gorta air an tìr : bhris e uile lorg an arain.

17 Chuir e duine rompa : Ioseph, a reiceadh mar thràill ;

18 Le geimhlibh dhochainn iad a chosan : chuireadh ann an iarunn e gu teann ;

19 Gu ruig an t-àm anns an d' thàinig a bhriathar : dhearbhadh focal an Tighearn' e.

20 Chuir an rìgh teachdaire uaith, agus dh' fhuasgail e air : uachdaran an t-sluaigh, agus leig e saor as e.

21 Rinn se e 'n a thighearn air a thigh : agus 'n a uachdaran os ceann a mhaoin uile ;

22 Chum gu'n ceangladh e 'ard-cheannardan a réir a thoile : agus gu'n deanadh e a sheanairean glic.

23 Agus thàinig Israel do'n Eiphit : agus bha Iacob air chuairt ann an tìr Cham.

24 Agus thug e air a shluagh fàs ro lìonmhor : agus rinn e na bu treise iad na'n naimhdean ;

25 Dh' iompaich e an cridhe gu fuath a thoirt d'a shluagh : agus gu buntainn gu cealgach r'a sheirbhisich.

26 Chuir e d'an ionnsuidh Maois 'òglach féin : Aaron a thagh e.

27 Nochd iad a chomharaidhean 'n am measg : agus a bheartan iongantach ann an tìr Cham.

28 Chuir e mach dorchadas, agus bha dorchadas ann : agus cha d' rinn iad ceannaire an aghaidh 'fhocail.

29 Thionndaidh e an uisgeacha gu fuil : agus mharbh e an iasg.

30 Thug an tìr a mach losgairn gu pailt : ann an seòmraichibh an rìghrean.

31 Labhair e, agus thàinig iomadh gnè chuil-eag : agus mialan 'n an crìochaibh uile.

32 Air son an uisge thug e dhoibh clach-mheallain : agus teine lasarach 'n an tìr.

33 Agus bhuaill e an croinn-fhìona agus an croinn-fhìge : agus bhris e craobhan an crìoch.

34 Labhair e, agus thàinig locuist, agus burruis, agus sin gun àireamh : agus dh' ith iad gach luibh 'n an tìr, agus dh' ith iad meas am fearainn.

35 Agus bhuaill e gach ceud-ghin 'n an tìr : toiseach an neirt uile.

36 Agus thug e mach iad le airgiod agus le òr : agus 'n an treubhan uile cha robh aon neach lag.

37 Bha aoibhneas air an Eiphit an uair a chaidh iad a mach : oir thuit an eagal-san orra.

38 Sgaoil e neul mar chòmhdach : agus teine gu solus a thoirt 's an oidhche.

39 Dh' iarr iad agus thug e dhoibh gearra-
goirt : agus le aran nèimh shàsuich e iad.

40 Dh' fhosgail e a' chreag, agus bhrùchd uisgeacha mach : ruith iad air na h-ionadaibh tioram mar amhainn.

41 Oir chuimhnich e a ghealladh naomh : do Abraham a sheirbhiseach.

42 Agus thug e mach a shluagh le aoibhneas : a dhaoine taghta le gairdeachas.

43 Agus thug e dhoibh fearann nan cinneach : agus shealbhaich iad saothair nan sluagh ;

44 Chum gu'n tugadh iad fainear a reachdan : agus gu'n gleidheadh iad a laghan. Molaibh an Tighearn.

URNUIGH FHEASGAIR.

An cvi. Salm.

Confitemini Domino

MOlaibh an Tighearn. O thugaibh buidh-
eachas do an Tighearn, oir tha e maith :
oir gu bràth mairidh a thrècair.

2 Cò is urrainn gnìomhara treuna an
Tighearn' a chur 'an céill : cò is urrainn a
chliu uile fhoillseachadh ?

3 Is beannaichte iadsan a choimhideas breith-
eanas : a ni ceartas anns gach àm.

4 Cuimhnich oirnn, a Thighearna, leis an
deadh-ghean a nochdas tu do d' shluagh féin :
O fiosraich sinn le d' shlàinte.

5 Chum gu faic sinn maith do dhaoine
taghta : chum gu'n dean sinn aoibhneas ann an
aoibhneas do chinnich, chum gu'n dean sinn
uaill le d' oighreachd-sa.

6 Pheacaich sinne le'r n-aithrichibh : rinn sinn
gu h-ole, rinn sinn gu h-aingidh.

7 Cha do thuig ar n-aithriche d'iongantais
anns an Eiphit, cha do thuig iad lionmhoireachd
do throcairean : ach bhrosnuich iad thu làimh
ris a' mhuir, aig a' mhuir ruaidh.

8 Gidheadh theasaig e iad air sgàth 'Ainme
féin : chum gu nochdadh e a chumbachd.

9 Agus smachdaich e a' mhuir ruadh, agus
thiormaicheadh i : agus thrèdraich e iad troimh
na doimhneachdaibh, mar troimh fhàsach.

10 Agus theasaig e iad o làimh an ti a thug
fuath dhoibh : agus shaor e iad o làimh an
nàmhaid.

11 Agus dh'fholaich na h-uisgeachan an
eascairdean : cha d'fhàgadh aon diubh.

12 An sin chreid iad a bhriathran : agus
sheinn iad a chliu.

13 Gu luath dhì-chuimhnich iad a ghnìomh-
ara : cha d'fheith iad r'a chomhairle.

14 Ach ghlac ana-miann iad 's an fhàsach :
agus bhuairead Dia anns an ionad uaigheach.

15 Agus thug e dhoibh an iarrtus : ach chuir
e caoile air an anam.

16 Agus ghabh iad farmad ri Maois anns a'
champ : agus ri Aaron sagart naomh an
Tighearna.

17 Dh'fhosgail an talamh, agus shluig e sìos
Datan : agus dh'fholaicheadh cuideachd Abir-
aim.

18 Agus las teine 'n an cuideachd : loisg an lasair suas na droch dhaoine.

19 Rinn iad laogh ann an Horeb : agus shleuchd iad do'n dealbh leaghta.

20 Agus chaochail iad an glòir : gu coslas daimh a dh'itheas feur.

21 Dhì-chuimhnich iad Dia am fear-saoraidh : a rinn nithe mòra anns an Eiphit ;

22 Nithean iongantach ann an tìr Cham : nithean uamhasach aig a' mhuir ruaidh.

23 Uime sin thubhairt e, gu milleadh e iad, mur bhitheadh gu'n do sheas 'òglach taghta Maois fa chomhair anns a' bhèairn : gus a chorruich a thionndadh uatha, chum nach sgriosadh e iad.

24 Agus rinn iad tarcuis air an tìr thaitnich : cha do chreid iad 'fhocal.

25 Agus rinn iad gearran 'n am bùthaibh : agus cha d' éisd iad ri guth an Tighearna.

26 An sin thog e a làmh 'n an aghaidh : a thoirt orra tuiteam anns an fhàsach ;

27 Agus a thilgeadh sìos an sliochd 'am measg nan cinneach : agus gu 'n sgaoileadh air feadh nan tìrean.

28 Mar an ceudna naisg iad iad féin ri Baal-peor : agus dh'ith iad ìobairtean nam marbh.

29 Agus bhrosnuich iad e le'n gnìomharaibh : agus bhris a' phlàigh a steach orra.

30 An sin sheas Phinehas agus chuir e breitheanas 'an gnìomh : agus choisgeadh a' phlàigh.

31 Agus mheasadh sin dha mar fhìreantachd : o linn gu linn gu bràth.

32 Chuir iad fearg air mar an ceudna aig

uisgeachaibh Mheribah : agus dh' éirich olc do Mhaois air an son ;

33 Oir bhrosnuich iad a spiorad : air chor as gu'n do labhair e gu h-aithghearr le 'bhilibh.

34 Cha do sgrios iad na sloigh : mu 'n d' thug an Tighearn àithne dhoibh ;

35 Ach choimh-mheasg iad iad féin 'am measg nan cinneach : agus dh' fhòghluim iad an oibre.

36 Agus rinn iad seirbhis d'an ìodholaibh, a bha mar ribe dhoibh : agus dh' ìobair iad am mic agus an nigheana do dheamhnaibh,

37 Agus dhòirt iad fuil neò-chiontach, fuil am mac agus an nighean : a dh' ìobair iad do ìodholaibh Chanaain, agus thruailleadh an tìr le fuil.

38 Agus rinneadh neòghlan iad le'n oibrìbh : agus chaidh iad aistriopachas le'n gnìomharaibh.

39 Agus las fearg an Tighearn 'an aghaidh a shluaigh : agus ghabh e gràin d'a oighreachd.

40 Agus thug e suas iad do làimh nan cinneach : agus bha iadsan, a dh' fhuathaich iad, 'n an uachdarain os an ceann.

41 Agus shàruich an naimhdean iad : agus leagadh gu h-ìosal iad fo 'n làimh.

42 Iomadh uair shaor e iad : ach bhrosnuich iad e le'n comhairlibh, agus dh' ìslicheadh iad air son an cionta.

43 Gidheadh thug e an àmhghar fainear : an uair a chual' e an glaoth.

44 Agus chuimhnich e dhoibh a choimh-cheangal, agus ghabh e aithreachas, a réir lìonmhoireachd a thròcair : agus fhuair e truas dhoibh ann an sealladh na muinntir sin a thug leo 'n am braighdibh iad.

45 Saor sinn, a Thighearn' ar Dia, agus tionail sinn o mheasg nan cinneach : chum buidheachas a thabhairt do d'Ainm naomh-sa, chum caithream a dheanamh ann ad chliu.

46 Gu ma beannaichte an Tighearn Dia Israeil o shìorruidheachd gu sìorruidheachd : agus abradh an sluagh uile, Amen. Molaibh-se an Tighearn.

URNUIGH MHAIDNE.

An cvii. Salm.

Confitemini Domino.

O Thugaibh buidheachas do an Tighearn, oir tha e maith : oir gu bràth mairidh a thròcair.

2 Mar so abradh iadsan a shaoradh leis an Tighearn : a shaor e o làimh an nàmhaid ;

3 Agus a chruinnich e as na tìribh, o'n àird an ear, agus o'n àird an iar : o'n àirde tuath, agus o'n àirde deas.

4 Chaidh iad air seacharan anns an fhàsach, ann an ionad uaigneach : slighe gu baile tàimh cha d'fhuair iad.

5 Ocrach agus tartmhor : dh'fhàilnich an anam annta.

6 An sin ghlaodh iad ris an Tighearn 'n an aire : agus as an teanntachdaibh shaor e iad.

7 Agus thèdraich e iad air slighe cheirt : chum gu'n rachadh iad gu baile tàimh.

8 O gu moladh daoine Dia air son a mhaith-eis : agus air son a bheartan iongantach do chloinn nan daoine ;

9 Oir shàsuich e an t-anam cìocrach : agus h'òn e an t-anam ocrach le maith ;

10 Iadsan a shuidh ann an dorchadas agus ann an sgàile a' bhàis : ceangailte ann an truaighe agus 'an iarunn.

11 A chionn gu'n d'rinn iad ceannaire an aghaidh bhriathar Dhé : agus gu'n d'rinn iad tàir air comhairle an Ti a's àirde ;

12 Aig an do leagadh sìos an cridhe le docair : thuit iad, agus cha robh fear-cuideachaidh ann.

13 An sin ghlaodh iad ris an Tighearn 'n an aire : agus as an teanntachdaibh shaor e iad.

14 Thug e iad á dorchadas, agus á sgàile a' bhàis : agus bhris e o 'chéile an cuibhreach.

15 O gu moladh daoine an Tighearn air son a mhaith-eis : agus air son a bheartan iongantach do chloinn nan daoine ;

16 Oir bhris e na geatachan umha : agus ghearr e sìos na croinn iarunn.

17 Bha amadain air son an eusaontais : agus air son an eucearta fo àmhghar.

18 De gach biadh ghabh an anam gràin : agus thàinig iad dlùth do gheatachaibh bàis.

19 An sin ghlaodh iad ris an Tighearn 'n an aire : agus as an teanntachdaibh shaor e iad.

20 Chuir e 'fhocal uaith, agus shlànuih e iad : agus shaor e iad o sgrios.

21 O gu moladh daoine an Tighearn air son a mhaith-eis : agus air son a bheartan iongantach do chloinn nan daoine ;

22 Agus gu'n ìobradh iad ìobairtean buidheachais : agus gu'n cuireadh iad 'an céill a ghnìomhara le luathghaire,

23 Iadsan a théid sìos do'n fhairge air long-aibh : a nì obair air uisgeachaibh mòra,

24 Chi iadsan gnìomharan an Tighearn' : agus a bheartan iongantach 's an doimhne.

25 Oir labhraidh e, agus dùisgidh e a' ghaoth dhoinionnach : agus togaidh i a tonnan.

26 Théid iad suas do na nèamhan, théid iad sìos do na doimhneachdaibh : le àmhghar leaghaidh an anam.

27 Théid iad thuige agus uaith, agus tuislichidh iad mar dhuine air mhisg : agus théid as d'an céill uile.

28 An sin glao dhaidh iad ris an Tighearn 'n an aire : agus as an teanntachdaibh bheir e iad.

29 Cuiridh e an doinionn gu fèith : agus bithidh a tonnan 'n an tàmh.

30 An sin bithidh iad ait, a chionn gu'm bi iad sàmhach : agus bheir e iad do'n chaladh a's miannach leo.

31 O gu moladh daoine an Tighearn air son a mhaitheis : agus air son a bheartan iongantach do chloinn nan daoine !

32 Agus gu'n àrdaicheadh iad e ann an coimhthional an t-sluaigh : agus ann an àite-suidhe nan seanair gu moladh iad e !

33 Nì e aimhniche 'n am fàsach : agus tobair uisge 'n an talamh tartmhor.

34 Fearann beartach nì e fàs : air son aingidheachd a luchd-àiteachaidh.

35 Nì e fàsach 'n a linne uisge : agus fearann tioram 'n a thobraichibh uisge.

36 Agus an sin bheir e air na h-ocraich còmhnuidh a ghabhail : agus deasaichidh iad baile-tàimh.

37 Agus sìol-chuiridh iad achanna, agus suidhichidh iad fion-liosan : agus bheir iad toradh pailt uatha.

38 Agus beannaichidh e iad, agus fàsaidh iad ro lionmhor : agus cha lughdaich e an spréidh.

39 Ach ma pheacaicheas iad, lughdaichear agus leigear sìos iad : le fòirneart, ole agus doilgheas ;

40 Dèirtidh e tarhuis air àrd-uaislibh : agus cuiridh e air seacharan iad ann am fàsach as eugmhais slighe ;

41 Agus togaidh e suas am bochd o thruaighe : agus nì e teaghlaichean dha mar threud.

42 Chi na fireana so, agus bithidh iad ait : agus druididh gach euceart a beul.

43 Cò tha glic, agus a bheir fainear na nithe sin : tuigidh esan caoimhneas gràdhach an Tighearna.

URNUIGH FHEASGAIR.

An cviii. Salm.

Paratum cor meum.

THa mo chridhe deas, a Dhé : seinnidh mi agus molaidh mi eadhon le m' ghlòir.

2 Mosgail, a shaltair agus a chlàrsach : mosglaidh mi féin moch air mhaduinn.

3 Molaidh mi thu 'am measg nan sluagh, a Thighearn' : agus seinnidh mi dhuit 'am measg nan cinneach.

4 Oir is mòr do thròcair os ceann nan nèamh : agus tha d' fhìrinn gu ruig na neòil.

5 Bi air d' àrdachadh os ceann nan nèamh,

a Dhé : agus os ceann na talmhainn uile bith-eadh do ghloir.

6 Chum gu'n teasairgear iadsan a's ionmhuinn leat : saor thusa le d' dheas làimh, agus éisd rium.

7 Labhair Dia 'n a naomhachd : ni mi aoibhneas, roinnidh mi Sechem, agus tomhaisidh mi gleann Shucoit.

8 Is leam-sa Gilead, is leam Manaseh : agus is e Ephraim neart mo chinn.

9 Iudah fear-tabhairt mo lagha, is e Moab mo shoitheach-ionnlaid : os ceann Edoim tilgidh mi mo bhròg ; thar Palestina ni mi caithream.

10 Cò bheir mi do'n bhaile dhaingnichte : cò threòraicheas mi gu Edom ?

11 Nach tusa, a Dhé, thusa a thilg uait sinn : agus nach deachaidh a mach, a Dhé, le ar n-armailtibh ?

12 Thoir còmhnaidh dhuinn ann an airc : oir is dìomhain furtachd duine.

13 Trid Dhé ni sinn treubhantas ; oir saltraidh esan sìos ar naimhdean.

An cix. *Salm.*

Deus laudum.

A Dhé, mo chliu, na bi ann ad thosd : oir tha beul an aingidh, agus beul na ceilge fosgailte a' m' aghaidh.

2 Labhair iad a' m' aghaidh le teangaidh nam breug : agus le briathraibh fuatha chuairtich iad mi, agus chog iad a' m' aghaidh gun aobhar.

3 'An éiric mo ghràidh, tha iad naimhdeil dhomh : agus mi ri urnuigh.

4 Agus dhìol iad dhomh ole 'an éiric maith : agus fuath 'an éiric mo ghràidh.

5 Cuir an t-aingidh os a cheann : agus seasadh Sàtan aig a dheas làimh.

6 'N uair a bheirear breth air, faighear ciontach e : agus bitheadh 'urnuigh dha 'n a peacadh.

7 Bitheadh a làithean tearc : agus glacadh neach eile a dhreuchd.

8 Bitheadh a chlann 'n an dilleachdain : agus a bhean 'n a bantraich.

9 A ghnàth air seacharan bitheadh a chlann, agus iarradh iad déirc : agus sireadh iad as an àitibh fàs.

10 Glacadh fear nam fiach gach ni a tha aige : agus creachadh coigrich a shaothair.

11 Na bitheadh neach ann a ni tròcair air : agus na bitheadh aon ann a ghabhas truas d'a chloinn gun athair.

12 Sgrìob gu robh air a shliochd : 's an àl a thig 'n a dhéigh gu'n cuirear as d'a ainm.

13 Air chuimhne bitheadh aingidheachd 'aithrichean aig an Tighearn : agus na cuirear as peacadh a mhàthar.

14 Bitheadh iad 'am fianuis an Tighearn' a ghnàth : agus gearradh e as an cuimhne o'n talamh ;

15 A chionn nach do chuimhnich e tròcair a nochdadh : ach gu'n do gheur-lean e an duine bochd agus uireasbhuidheach, agus aig an robh cridhe goirt, chum a mharbhadh.

16 Mar a ghràdhaich e mallachadh, thigeadh e air : mar nach robh tlachd aige ann am beannachadh, bitheadh e fada uaith.

17 Mar a chuir e mallachadh uime, mar 'eudach: thigeadh e steach mar uisge 'n a chòm, agus mar oladh 'n a chnàmhan.

18 Bitheadh e dha mar an trusgan leis an còmhdach: agus mar an crios leis an crioslaichear e a ghnàth.

19 Is e so obair m' eascairdean 'an làthair an Tighearna: agus nan daoine a labhras ole an aghaidh m'anama.

20 Ach dean thusa air mo shon, a Thighearna Dhé, air sgàth d' Ainme: a chionn gu bheil do thròcair maith.

21 Saor thusa mi, oir tha mi bochd agus uireasbhuidheach: agus tha mo chridhe air a lotadh 'an taobh a stigh dhìom.

22 Mar sgàile a' claoadh sìos tha mi a' siubhal: tha mi air m'fhuadachadh mar an locust.

23 Tha mo ghluinean lag le trasgadh: agus tha m'fheadil a' teireachduinn le dìth sultha.

24 Agus tha mi a'm' aobhar maslaidh dhoibh: 'n uair a sheall iad orm, chrath iad an cinn.

25 Cuidich leam, a Thighearna mo Dhia: saor mi a réir do thròcair:

26 Chum gu'm bi fios aca, gur i so do làmh: gur tusa, a Thighearn', a rinn e.

27 Mallaicheadh iadsan, ach beannaich thusa: 'n uair a dh'éireas iad bitheadh nàire orra; ach bitheadh d'òglach-sa ait.

28 Bitheadh m' eascairdean air an còmhdach-adh le nàire: agus bitheadh iad air am folach le'n amhluidh féin, mar le falluinn.

29 Ard-mholaidh mi an Tighearn le m' bheul: agus 'am measg na mòr-chuideachd bheir mi cliu dha.

30 Oir seasaidh e aig deas làimh an duine bhochd: chum a shaoradh o luchd-dìtidh 'anama.

URNUIGH MHAIDNE.

An cx. Salm.

Dixit Dominus.

THubhairt an Tighearn ri m' Thighearn: Suidh aig mo dheas làimh, gus an cuir mi do naimhdean 'n an stòl fo d' chosaibh.

2 Slat-shuaicheantais do chumhachd cuiridh an Tighearn a mach á Sion: bi thusa a'd' uachdaran, ann am meadhon do naimhdean.

3 Bithidh do shluagh ro thoileach ann an là do chumhachd ann am maise na naomhachd: mar an drùchd o bholg na maidne bithidh d'òigridh agad.

4 Mhionnaich an Tighearn, agus cha ghabh e aithreachas: Is Sagart thu gu bràth a réir orduigh Mhelchisedeic.

5 Buailidh an Tighearn a tha aig do dheas làimh: rìghrean ann an là 'fheirge.

6 Bheir e breth 'am measg nan cinneach; lionadh e gach àite le corpaibh marbha: lotaidh e an t-uachdaran os ceann iomadh tìr.

7 De'n t-sruth air an t-slighe òlaidh e: uime sin togaidh e suas a cheann.

An cxi. Salm.

Confitebor tibi.

MOlaibh-se an Tighearn. Bheir mise cliu do an Tighearn le m' uile chridhe: ann

an coinneamh nam firean, agus anns a' choimh-thional.

2 Tha gnìomharan an Tighearna mòr : rannsaichear iad leo-san uile aig am bheil tlachd anna.

3 Urramach agus glòrmhor tha 'obair-san : mairidh 'fhireantachd gu bràth.

4 Chuir e a gnìomharan iongantach air chuimhne : gràsmhor agus truacanta tha an Tighearn.

5 Thug e lòn dhoibh-san d'an eagal e : cuimh-nichidh e gu bràth a choimhcheangal.

6 Chuir e neart 'oibre 'an céill d'a shluagh : le oighreachd nan cinneach a thabhairt doibh.

7 Is iad firinn agus ceartas gnìomharan a làmh : is fìor 'àitheanta-san uile.

8 Seasmhach tha iad gu saoghal nan saoghal : deanta ann am firinn agus ann an ceartas.

9 Chuir e saorsa dh'ionnsuidh a shluaigh : dh'àithn e a choimhcheangal gu bràth ; is naomh agus urramach 'Ainm-san.

10 Is e eagal an Tighearna toiseach a' ghliocais : tha deadh thuigse aca-san uile a ghleidheas 'àitheanta-san ; mairidh a chliu gu bràth.

An cxii. Salm.

Beatus vir.

MOlaibh-se an Tighearn. Is beannaichte an duine air am bi eagal an Tighearn' : a ghabhas tlachd mòr d'a àitheantaibh.

2 Làidir anns an tìr bithidh a shliochd : beannaichear ginealach nam firean.

3 Bithidh maoin agus saoihbheas 'n a thigh : agus mairidh 'fhireantachd gu bràth.

4 Ann an dorchadas éiridh solus do na firean-aibh : gràsmhor, agus làn truacantais, agus cothromach tha an Tighearn.

5 Is maith do'n duine a bhitheas truacanta agus coingheallach : a riaghlas a ghnòthuichean gu ceart.

6 Oir gu bràth cha ghluaisear e : air chuimhne gu bràth bithidh am firean.

7 Roimh dhroch sgeul cha bhi eagal air : tha a chridhe suidhichte, ag earbsadh as an Tighearn.

8 Tha a chridhe air a shocrachadh, cha bhi eagal air : gus am faic e crìoch a naimhdean.

9 Sgaoil e, thug e do na bochdaibh, mairidh 'fhireantachd gu bràth : mairidh 'adharc le urram.

10 Chi an droch dhuine, agus bithidh fearg air : casaidh e 'fhiaclean, agus seargaidh e as : sgriosar miann nan aingidh.

An cxiii. Salm.

Laudate, pueri.

MOlaibh-se an Tighearn. Molaibh, O sibhse òglacha an Tighearna : molaibh Ainm an Tighearna.

2 Gu ma beannaichte Ainm an Tighearn' : o'n àm so agus gu bràth.

3 O éirigh na gréine, gu ruig a luidhe : is ionmholta Ainm an Tighearna.

4 Ard os ceann nan cinneach uile tha an Tighearn : os ceann nan nèamh a ghàid.

5 Cò is cosmhuil ris an Tighearn ar Dia a

tha 'n a chòmhnuidh shuas : a dh'islicheas e féin gu amhare air na nithibh a tha 's na nèamhan agus air an talamh ?

6 Togaidh e am bochd o'n duslach : o'n òtrach àrdaichidh e an t-ainnis.

7 Chum a chur 'n a shuidhe le àrd-uaislibh : le àrd-uaislibh a shluaigh.

8 Bheir e air a' mhnaoi a tha gun sliochd còmhnuidh a ghabhail ann an tigh : 'n a màthair ait cloinne.

URNUIGH FHEASGAIR.

An cxiv. Salm.

In exitu Israel.

MOlaibh-se an Tighearn. 'N uair a thàinig Israel a mach as an Eiphit : tigh Iacoib o shluagh coimheach,

2 Bha Iudah dha mar a chòmhnuidh naomh : Israel mar a thighearnas.

3 Chunnaic an cuan agus theich e : thionndaidh Iordan air a h-ais.

4 Leum na beannta mar reitheachan : na cnuic mar uain.

5 Ciod, a chuain, a thug ort teicheadh : a Iordan, a thug ort tionndadh air d'ais ?

6 A bheannta, a thug oirbh leum mar reitheachan : a chnoca, mar uain ?

7 Criothnaich, a thalaimh, 'an làthair an Tighearn' : 'an làthair Dhé Iacoib.

8 A thionndaidheas a' charraig gu linne uisge : an ailbhinn gu tobar uisge.

An cxv. Salm.

Non nobis, Domine.

TAbhair glòir, a Thighearna, cha-n ann duinne, cha-n ann duinne, ach do d'ainm féin : air son do thrècair agus air son d'fhèrinn.

2 C'ar son a theireadh na cinnich : càit a nis am bheil an Dia ?

3 Ach tha ar Dia-ne anns na nèamhan : agus rinn e gach ni a b'àill leis.

4 Is airgiod agus òr an ìodhoil-san : obair làmh dhaoine.

5 Tha beoil aca ach cha labhair iad : sùilean aca ach cha-n fhaic iad.

6 Tha cluasan aca ach cha chluinn iad : srònan aca ach cha ghabh iad fàile.

7 Tha làmhnan aca ach cha laimhsich iad, cosan aca ach cha-n imich iad : agus cha labhair iad troimh an sgornan.

8 Cosmhuil riu féin tha iadsan a ni iad : agus gach neach a dh'earbas asda.

9 Earbadh tigh Israeil as an Tighearn : is esan an còmhnadh agus an sgiath.

10 Earbadh tigh Aaroin as an Tighearn : is esan an còmhnadh agus an sgiath.

11 Iadsan air am bi eagal an Tighearn', carbadh iad as an Tighearn : is esan an còmhnadh agus an sgiath.

12 Bha an Tighearn cuimhneachail oirnn, beannaichidh e sinn : beannaichidh e tigh Israeil, beannaichidh e tigh Aaroin.

13 Beannaichidh e iadsan air am bi eagal an Tighearna : na big agus na mòir.

14 Cuiridh an Tighearn sibh 'an Ìonmhoir-eachd : sibh féin agus 'ur clann.

15 Is beannaichte sibhse o an Tighearn : a rinn na nèamhan agus an talamh.

16 Is leis an Tighearn na nèamhan, eadhon na nèamhan : ach an talamh thug e do chloinn nan daoine.

17 Cha mhol na mairbh an Tighearn : no iadsan uile a théid sìos tosdach do'n uaigh.

18 Ach beannaichidh sinne an Tighearn : o'n àm so agus gu bràth. Molaibh-se an Tighearn.

URNUIGH MHAIDNE.

An cxvi. Salm.

Dilexi, quoniam.

IS toigh leam an Tighearn : oir dh'éisd e ri guth m'athchuingean.

2 A chionn gu'n d'aom e a chluas rium : uime sin ri m' bheò éighidh mi ris.

3 Chuairtich doilgheasan a' bhàis mi : agus ghlac piantan ifrinn mi.

4 Fhuair mi teinn agus bròn, an sin ghairm mi air Ainm an Tighearn' : A Thighearna, guidheam ort, saor m'anam.

5 Is gràs-mhor an Tighearn agus cothromach : agus is trècaireach ar Dia-ne.

6 Gleidhidh an Tighearn na daoine aon-fhillte : dh'ìslicheadh mi, agus theasairg e mi.

7 Pill, O m'anam, gu d' shuaimhneas : oir bhuin an Tighearn riut gu fial.

8 Oir shaor thu m'anam o'n bhàs : mo shùil o dheuraibh, agus mo chos o shleamhnachadh.

9 Gluaisidh mi ann am fianuis an Tighearn' : ann an tìr nam beò.

10 Chreid mi, uime sin labhair mi, chlaoidh-eadh mi gu mòr : thubhairt mi a'm' dheifir, Tha gach duine breugach.

11 Cìod a dh'ìocas mi do an Tighearn : air son 'uile thiodhlacan dhomh ?

12 Glacaidh mi cupan na slàinte : agus gairmidh mi air Ainm an Tighearna.

13 Iocaidh mi mo bhàidean do an Tighearn a nis 'an làthair a shluaigh uile : is luachmhor ann an sealladh an Tighearna bàs a naomh.

14 O a Thighearna, gu deimhin is mi d'òglach : is mi d'òglach, mac do bhanoglaich, sgaoil thu mo chuibhreach.

15 Dhuit-sa ìobraidh mi ìobairt mholaidh : agus air ainm an Tighearna gairmidh mi.

16 Iocaidh mi mo bhàidean do an Tighearn a nis, 'an làthair a shluaigh uile : ann an cùirtibh tìghe an Tighearn', ann ad mheadhon-sa, O Ierusalem. Molaibh-se an Tighearn.

An cxvii. Salm.

Laudate Dominum.

MOlaibh an Tighearn, sibhse a chinneacha uile : molaibh e, a shlòigh uile.

2 Oir is mòr a thrècair chaomh d'ar taobh-ne : agus mairidh firinn an Tighearna gu bràth. Molaibh-se an Tighearn.

An cxviii. *Salm.**Confitemini Domino.*

O Thugaibh buidheachas do an Tighearn, oir tha e maith: oir gu bràth mairidh a thròcair.

2 Abradh Israel a nis: gu mair a thròcair gu bràth.

3 Abradh tigh Aaroin a nis: gu mair a thròcair gu bràth.

4 Abradh iadsan a nis, d'an eagal an Tighearn: gu mair a thròcair gu bràth.

5 Ann an teinn ghairm mi air an Tighearn: fhreagair an Tighearn mi, gu m' chur ann an ionad farsuinn.

6 Tha an Tighearn leam: cha-n eagal leam ciod a dh'fheudas duine a dheanamh orm.

7 Tha an Tighearn 'am measg mo luchd-cuideachaidh: agus chi mi crìoch mo luchd-fuatha.

8 Is fearr earbsadh as an Tighearn: na earbsadh á duine.

9 Is fearr earbsadh as an Tighearn: na earbsadh á uachdarain.

10 Chuairtich na cinnich gu léir mi: ach ann an Ainm an Tighearna gearraidh mi as iad.

11 Chuairtich iad mi, seadh, chuairtich iad mi: ach ann an Ainm an Tighearna gearraidh mi as iad.

12 Chuairtich iad mi mar bheachaibh, cuirear as iad mar theine droighnich: oir ann an Ainm an Tighearna gearraidh mi as iad.

13 Thug thu ionnsuidh dhian orm, chum mo leagadh: ach chuidich an Tighearn leam.

14 Is e an Tighearn mo neart, agus mo cheòl: agus is e mo shlàinte.

15 Tha guth gairdeachais agus slàinte ann am pàilliunaibh nam firean: rinn deas làmh an Tighearna treubhantas.

16 Dh'àrdaicheadh deas làmh an Tighearna: rinn deas làmh an Tighearna treubhantas.

17 Cha-n fhaigh mi bàs, ach mairidh mi beò: agus cuiridh mi 'n céill oibre an Tighearna.

18 Throm-smachdaich an Tighearn mi: ach gu bàs cha d'thug e thairis mi.

19 Fosglaibh dhomh geatachan an ionracais: théid mi steach orra, agus molaidh mi an Tighearn.

20 Is e so geata an Tighearn': air an téid na fireana steach.

21 Molaidh mi thu, oir dh'éisd thu rium: agus is tu mo shlàinte.

22 A' chlach a dhiùlt na clachairean: rinneadh i 'n a cloich-chinn na h-oisinn.

23 O an Tighearn tha so: is iongantach e 'n ar sùilbhe.

24 Is e so an là a rinn an Tighearn: deanamaid gairdeachas agus bitheamaid ait air.

25 Guidheamaid ort, a Thighearna, saor a nis: guidheamaid ort, a Thighearna, soirbhich leinn a nis.

26 Beannaichte gu robh an Ti a thig 'an Ainm an Tighearna: thug sinne beannachd oirbhse o thigh an Tighearna.

27 Is e Dia a's Tighearn ann, agus dhealraich e oirnn: ceanglaibh an ìobairt le cordaibh, eadhon ri adharcaibh na h-altarach.

28 Is tusa mo Dhia, agus molaidh mi thu :
mo Dhia, àrdaichidh mi thu.

29 O thugaibh buidheachas do an Tighearn,
oir tha e maith : oir gu bràth mairidh a
thrèair.

URNUIGH FHEASGAIR.

An cxix. Salm.

Beati immaculati.

IS beannaichte iadsan a tha neo-lochdach
's an t-slighe : a dh'ìmicheas ann an
lagh an Tighearna.

2 Is beannaichte iadsan a ghleidheas a theist-
eis : a dh'iarraas e le'n uile chridhe.

3 Mar an ceudna cha dean iad aingidheachd :
'n a shlighibh imichidh iad.

4 Dh'àithn thu : d'orduighean a bhi air an
coimhead gu dìchiollach.

5 O nach robh mo cheuman air an stiùradh :
chum do reachdan a choimhead.

6 An sin cha ghabh mi nàire : an uair a bheir
mi spéis do d'aitheantaibh gu léir.

7 Molaidh mi thu le tréibhdhreas cridhe :
'n uair o dh'fhòghlumas mi breitheanais do
cheartais.

8 Coimhididh mi do reachdan : O na tréig
mi gu tur.

In quo corrigit.

CIod leis an glan an t-òganach a shlighe :
trid faicill a réir d'fhocail.

2 Le m'uile chridhe dh'iarr mi thu : na leig
dhomh dol air seacharan o d'aitheantaibh.

3 A'm' chridhe dh'fholaich mi d'fhocal : chum
nach peacaichinn a'd' aghaidh.

4 Is beannaichte thusa, a Thighearna : teag-
aisg dhomh do reachdan.

5 Le m' bhilibh chuir mi 'n céill : uile
bhreitheanais do bheoil.

6 Ann an slighe do theistear rinn mi gaird-
eachas : mar os ceann gach uile shaoibhreis.

7 Air d'aitheantaibh beachd-smuainichidh mi :
agus dearcaidh mi air do cheuman.

8 Ann ad reachdaibh gabhaidh mi tlachd :
cha dì-chuimhnich mi do bhriathra.

Retribue seruo tuo.

BUin gu fial ri d'òglach : chum gu'm bi
mi beò agus gu'n coimhid mi do bhriath-
ra.

2 Fosgail mo shùilean : chum gu faic mi
nithean iongantach o d'lagh.

3 Is coigreach air thalamh mi : na ceil orm
d'aitheantan.

4 Tha m'anam brùite : le déigh air do
bhreitheanais gach tràth.

5 Smachdaich thu na h-uaibhrich : is mall-
uichte iadsan a théid air seacharan o d'aithean-
taibh.

6 Tionndaidh uam masladh agus tàir : oir
ghléidh mi do theisteis.

7 Shuidh eadhon uachdarain agus labhair iad
a'm' aghaidh : ach bheachd-smuainich d'òglach
air do reachdaibh.

8 Mar an ceudna is iad do theisteis mo thlachd :
mo chomhairlichean.

Adhasit pavimento.

THa m'anam a' leantuinn ris an ùir : beothaich mi a réir d'fhocail.

2 Chuir mi 'an céill mo shlighean, agus dh'éisd thu rium : teagaisg dhomh do reachdan.

3 Thoir orm slighe d'aitheantan a thuigsinn : agus labhraidh mi air d'oibribh iongantach.

4 Tha m'anam a' leaghadh as le tuirse : neartaich mi a réir d'fhocail.

5 Cuir uam slighe nam breug : agus gu gràsmhor deònaich dhomh do lagh.

6 Ròghnaich mi slighe na firinn : chuir mi do bhreitheanais fa m' chomhair.

7 Dhùth-lean mi ri d' theisteis : a Thighearna, na cuir gu nàire mi.

8 Ann an slighe d'aitheantan ruithidh mi : 'n uair a chuireas tu mo chridhe ann am farsuinneachd.

*URNUIGH MHAIDHNE.**Legem pone.*

TEagaisg dhomh, a Thighearna, slighe do reachdan : agus gleidhidh mi i gu ruig a' chrìoch.

2 Thoir tuigse dhomh, agus gleidhidh mi do lagh : seadh, coimhididh mi e le m'uile chridhe.

3 Thoir orm triall ann an ceum d'aitheantan : oir ann-san tha mo thlachd.

4 Lùb mo chridhe gu d' theisteis : agus ni h-ann gu sannt.

5 Tionndaidh mo shùilean, o amharc air dìomhanas : ann ad shlighibh beothaich mi.

6 Daingnich d'fhocal do d'òglach : air an bheil d'eagal-sa.

7 Cuir uam mo mhasladh a's eagal leam : oir tha do bhreitheanais maith.

8 Feuch, is miannach leam-sa do reachdan : ann ad cheartas beothaich mi.

Et veniat super me.

AGus thigeadh do thròcair a m'ionnsuidh, a Thighearna : do shlàinte a reir d'fhocail.

2 An sin bithidh freagrachd agam dhà-san a bheir masladh dhomh : gu bheil m'earbsadh á d'fhocal-sa.

3 Agus na buin focal na firinn gu h-iomlan as mo bheul : oir ann ad bhreitheanais chuir mi mo dhòchas.

4 Agus coimhididh mi do lagh a ghnàth : gu suthainn 'us gu sìor.

5 Agus gluaisidh mi ann am farsuinneachd : a chionn gu'n iarr mi do reachdan.

6 Agus labhraidh mi air do theisteis, 'an làthair rìghrean : agus cha bhi nàire orm.

7 Agus gabhaidh mi tlachd do d'aitheantaibh : d'an d'thug mi gràdh.

8 Agus togaidh mi mo làmhan ri d'aitheantaibh, d'an d'thug mi gràdh : agus beachd-smuainichidh mi air do reachdaibh.

Memor esto servi tui.

CUimhnich am focal do d'òglach : as an d'thug thu orm earbsadh.

2 Is e so mo chomfhurtachd ann am àmhghar : oir bheothaich d'fhocal mi.

3 Rinn na h-uaibhrich fanoid orm gu mòr : gidheadh o d' lagh cha do chlaon mi.

4 Chuimhnich mi do bhreitheanais o chian, a Thighearn': agus fhuair mi comhfhurtachd.

5 Ghlac uamhunn mi: a thaobh nan daoine aingidh a thréigeas do lagh.

6 B'iad do reachdan mo cheòl: ann an tigh mo chuairt.

7 Chuimhnich mi d'Ainm, a Thighearn', anns an oidhche: agus ghléidh mi do lagh.

8 Mar so tharladh e dhomh-sa: a chionn gu'n do ghléidh mi do reachdan.

Portio mea, Domine.

IS tusa mo chuibrionn, a Thighearna: thubhairt mi gu'n coimhidinn d'fhocail.

2 Dh'asluich mi do dheadh-ghean le m'uile chridhe: dean tràcair orm a réir d'fhocail.

3 Chnuasaich mi mo shlighean: agus phill mi mo chosan ri d' theisteis.

4 Rinn mi deifir, agus cha robh mi mairnealach: chum d'aitheantan a choimhead.

5 Chreach buidhnean dhroch dhaoine mi: ach cha do dhì-chuimhnich mi do lagh.

6 Mu mheadhon-oidhche éiridh mi chum buidheachas a thoirt duit: air son bhreitheanas do cheartais.

7 Is fear-comuinn mi dhoibh-san uile air am bi d'eagal: agus dhoibh-san a ghleidheas do reachdan.

8 De d' thròcair, a Thighearna, tha'n talamh làn: teagaisg dhomh do reachdan.

Bonitatem fecisti.

RInn thu gu maith do d'òglach, a Thighearn': a réir d'fhocail.

2 Teagaisg dhomh deadh thuigse agus eòlas: oir chreid mi d'aitheantan.

3 Mu'n robh mi ann ar àmhghar, chaidh mi air seacharan: ach a nis tha mi a' gleidheadh d'fhocail.

4 Is maith thusa agus ni thu maith: teagaisg dhomh do reachdan.

5 Dhealbh na h-uairbhric breug a'm' aghaidh: ach gleidhidh mise d'aitheantan le m'uile chridhe.

6 Co reamhar ri saill tha an cridhe-san: ach ann ad lagh tha mo thlachd-sa.

7 Is maith dhomh-sa gu robh mi ann an àmhghar: chum gu fòghlumainn do reachdan.

8 Is fearr dhomh-sa lagh do bheoil: na mìltean a dh'òr agus a dh' airgiod.

URNUIGH FHEASGAIR.

Manus tuæ fecerunt me.

RInn agus dhealbh do làmhan mi: thoir tuigse dhomh, chum gu fòghlum mi d'aitheantan.

2 Chi iadsan air am bi d'eagal mi agus bithidh iad ait: a chionn gu'n d'earb mi á d'fhocal.

3 Tha fhios agam, a Thighearna, gu bheil do bhreitheanais ceart: agus gur ann 'am fìrinn a chlaoidh thu mi.

4 Bitheadh a nis do thròcair chaomh chum comhfhurtachd dhomh: a réir d'fhocail ri d'òglach.

5 Thigeadh do chaomh-thròcairean a m'ionnsuidh, chum gu'm bi mi beò: oir is e do lagh mo thlachd.

6 Bitheadh nàire air luchd an àrdain, oir gun aobhar bhuin iad gu fiar rium: ach beachd-smuainichidh mise air d'aitheantaibh.

7 Pilleadh iadsan air am bheil d'eagal rium: agus iadsan a tha edlach air do theisteis.

8 Bitheadh mo chridhe tréibhdhireach ann ad reachdaibh: chum nach nàraichear mi.

Defecit anima mea.

THa m'anam air a chlaoidh le déigh air do shlàinte: ann ad fhocal chuir mi mo dhòchas.

2 Tha mo shùilean air an caitheamh le feitheamh ri d'fhocal: 'n uair a tha mi ag ràdh, C'uin a ni thu furtachd orm?

3 Oir tha mi mar shearraig ann an deataich: gidheadh cha do dhì-chuimhnich mi do reachdan.

4 Cia lion iad làithean d'òglaich: c'uin a chuireas tu breitheanas 'an gnìomh orra-san a tha'n tòir orm?

5 Chladhaich na h-uabhrich sluichd dhomh: nach 'eil a réir do lagha.

6 Is fìrinn d'aitheantan-sa gu léir: gu fealltach tha iad 'an tòir orm, cuidich thusa leam.

7 Is beag nach do chuir iad as domh air thalamh: ach cha do thréig mise do reachdan.

8 A réir do chaomh thrècair beothaich thusa mi: agus gleidhidh mi teisteas do bheoil.

In æternum, Domine.

GU bràth, a Thighearna, tha d'fhocal: seasmhach anns na nèamhan.

2 O linn gu linn tha d'fhìrinn: dhaingnich thu an talamh, agus seasaidh e.

3 A réir d'orduighean tha iad buan gus an diugh: oir is iad na h-uile do sheirbhisich.

4 Mur bhitheadh gu'm b'e do lagh mo thlachd: an sin gheibhinn bàs ann am àmhghar.

5 Gu bràth cha dì-chuimhnich mi do reachdan: oir leo-san bheothaich thu mi.

6 Is leat mise, saor mi: oir dh'iarr mi do reachdan.

7 Dh'fheith na h-aingidh orm, chum mo sgrios: ach beachd-smuainichidh mise air do theisteis.

8 Chunnaic mi crìoch gach iomlaineachd: ach tha d'aithe-sa ro fharsuinn.

Quomodo dilexi!

OCia ionmhuinn leam do lagh-sa: gach là is e mo smuaineachadh.

2 Le d'aithe rinn thu mi na's glìce na m'eascairdean: oir tha i a ghnàth leam.

3 Os ceann mo luchd-teagaisg uile tha mi a' tuigsinn: oir is iad do theisteis mo smuaineachadh.

4 Os ceann nan seanair tha mi crìonna: a chionn gu bheil mi a' gleidheadh do reachdan.

5 O gach droch shlighe chum mi mo chosan: chum gu'n coimhidinn d'fhocal.

6 O d'bhreitheanais cha do chlaon mi: oir theagaisg thusa mi.

7 Cia milis le m'bhlas do bhriathra: na's milse tha iad na mil do m' bheul.

8 Trid do reachdan fhuair mi tuigse: uime sin is fuathach leam gach slighe bhreugach.

URNUIGH MHAIDNE.

Lucerna pedibus meis.

IS lèchran d'fhocal do m' chois : agus solus do m' cheum.

2 Mhionnaich mi, agus coimhlionaidh mi e : gu'n coimhid mi breitheanais do cheartais.

3 Tha mi ann an àmhghar ro mhòr : ath-bheothaich mi, a Thighearn', a réir d'fhocail.

4 Gabh uam gu taitneach, guidheam ort, a Thighearna, saor-thabhartais mo bheoil : agus teagaisg dhomh do bhreitheanais.

5 Tha m'anam a ghnàth a'm' làimh : gidheadh cha do dhì-chuimhnich mi do lagh.

6 Chuir droch dhaoine ribe romham : ach o d' reachdaibh cha deachaidh mise air seacharan.

7 Ghabh mi do theisteis mar oighreachd gu bràth : oir is iad aoibhneas mo chridhe.

8 Dh'aom mi mo chridhe chum do reachdan a chur 'an gnìomh a ghnàth : gu ruig a' chrìoch.

Iniquos odio habui.

IS fuath leam smuaintean faoin' : ach is toigh leam do lagh.

2 Is tusa m'ionad-folaich agus mo sgiath : a d'fhocal-sa tha m'earbsa.

3 Imichibh uam, a luchd-deanamh an uile : oir gleidhidh mise àitheantan mo Dhé.

4 Cum suas mi a réir d' fhocail agus mairidh mi bèd : agus na leig fo nàire mi a thaobh mo dhèchais.

5 Daingnich mi, agus bithidh mi tèaruinte : agus bithidh tlachd agam ann ad reachdaibh a ghnàth.

6 Shaltair thu orra-san uile a chaidh air seacharan o d' reachdaibh : oir is breug an cealg.

7 Mar shal tilgidh tu uait uile dhroch dhaoine na talmhainn : uime sin is toigh leam do theisteis.

8 Chrìothnaich m' fheòil le uamhunn romhad : agus bha eagal orm roimh do bhreitheanais.

Feci iudicium.

RInn mi breitheanas agus ceartas : na fàg mi do m' luchd-fòirneirt.

2 Bi-sa 'an urras air d' òglach chum maith : na deanadh na h-uaibhrich fòirneart orm.

3 Tha mo shùilean air an caitheamh le bhì 'sealltuinn air son do shlàinte : agus air son focail d' fhèrantachd.

4 Buin ri d' òglach a réir do throcair : agus teagaisg dhomh do reachdan.

5 Is mi d' òglach, thoir tuigse dhomh : chum gu'm bi eòlas agam air do theisteis.

6 Is mithich dhuit, a Thighearna, a bhì 'deanamh : bhris iad do lagh.

7 Uime sin is annsa leam-sa d' àitheantan : na'n t-òr, seadh, na'n t-òr fìor-ghlan.

8 Uime sin measam do reachdan uile a thaobh gach nì a bhì ceart : is fuathach leam gach slighe bhreugach.

Mirabilia.

IS iongantach do theisteis : air an aobhar sin gleidhidh m' anam iad.

2 Bheir fosgladh do bhriathar solus : a' teagasg nan daoine aon-fhillte.

3 Dh' fhosgail mi mo bheul a' ploscartaich : oir bha mi 'an geall air d' àitheantaibh.

4 Amhairc orm, agus dean tràcair orm : mar is gnàth leat a dheanamh dhoibh-san le 'n ionmhuinn d' Ainm.

5 Stiuir mo cheuman a réir d' fhocail : agus na bitheadh aig euceart sam bith uachdaranachd orm.

6 Teasairg mi o fhàirneart dhaoine : agus coimhididh mi d' òrduighean.

7 Thoir air do ghnùis dealrachadh air d' òglach : agus teagaisg dhomh do reachdan.

8 Ruith srutha dheur a sìos o m' shùilibh : a chionn nach do choimhid iad do lagh.

Justus es, Domine.

IS cothromach thusa, a Thighearn' : agus is ceart do bhreitheanas.

2 Dh' àithn thu do theisteis : mar cheartas agus mar fhàirinn mhàir.

3 Chlaidh m' eud mi : a chionn gu'n do dhì-chuimhnich mo naimhdean do bhriathran.

4 Ro ghlan tha d' fhocal-sa : agus is ionmhuinn le d' òglach e.

5 Beag agus suarach tha mise : gidheadh cha dì-chuimhnich mi do reachdan.

6 Is ceartas sìorruidh do cheartas-sa : agus is fìrinn do lagh.

7 Ghlac teinn agus àmhghar mi : ach is iad d' àitheantan mo thlachd.

8 Mairidh ceartas do theisteas gu bràth : thoir-sa tuigse dhomh, agus bithidh mi beò.

URNUIGH FHEASGAIR.

Clamavi in toto corde meo.

GHlaodh mi le m' uile chridhe : éisd rium, a Thighearna, gleidhidh mi do reachdan.

2 Ghlaodh mi riut : saor mi, agus coimhididh mi do theisteis.

3 Thàinig mi roimh 'n scarthanaich, agus dh' èigh mi : a d' fhocal dh' earb mi.

4 Ghabh mo shùilean roimh fhairibh na h-oidheche : chum gu'm beachd-smuainichinn air d' fhocal.

5 Eisd ri m' ghuth a réir do chaoimhneis-gràidh, a Thighearn' : a réir do bhreitheanas beothaich mi.

6 Thàinig luchd-leanmhuinn droch-bheirt am fagus : ach fada bha iad o d' lagh.

7 Am fagus tha thusa, a Thighearn' : agus is fìrinn d' àitheantan uile.

8 O thoiseach b' fhiosrach mi a thaobh do theisteas : gu'n do shuidhich thu iad gu bràth.

Vide humilitatem.

AMhaire air m' àmhghar, agus teasairg mi : oir cha do dhì-chuimhnich mi do lagh.

2 Tagair mo chùis, agus saor mi : a réir d' fhocail beothaich mi.

3 Is fada slàinte o dhroch dhaoineibh : oir cha-n iarr iad do reachdan.

4 Is lìonmhor do chaomh-thràcairean, a Thighearn' : a réir do bhreitheanas beothaich mi.

5 Is lìonmhor mo luchd-tòrachd agus m' eascairdean : gidheadh o d' theisteis cha do chlaon mise.

6 Chunnaic mi luchd-eusaontais agus bha doilgheas orm : a chionn nach do choimhid iad d' fhocal.

7 Feuch, is ionmhuinn leam do reachdan, a

Thighearn' : a réir do chaoimhneis-gràidh beothaich thusa mi.

8 O thoiseach is firinn d' fhocal-sa : agus gu bràth mairidh uile bhreitheanais do cheartais.

Principes persecuti sunt.

BHa uachdarain 'an tòir orm gun aobhar : ach roimh d' fhocal-sa tha eagal air mo chridhe.

2 Tha aiteas orm ri d' fhocal-sa : mar neach a fhuair creach mhòr.

3 Is fuath leam, agus is oillteil leam breug : ach is toigh leam do lagh-sa.

4 Seachd uairean 's an là bheiream moladh dhuit : air son bhreitheanas do cheartais.

5 Is mòr sìth na muinntir a tha 'toirt gràidh do d' lagh : agus cha-n éirich aobhar tuislidh dhoibh.

6 Dh' fheith mi ri d' shlàinte, a Thighearn' : agus choimhid mi d' àitheantan.

7 Choimhid m' anam do theisteis : agus is ro ionmhuinn leam iad.

8 Choimhid mi do reachdan agus do theisteis : oir tha mo shlighean uile fa d' chomhair.

Appropinquet deprecatio.

THigeadh mo ghlaodh am fagus a' d' làthair, a Thighearn' : a réir do bhriathar thoir tuigse dhomh.

2 Thigeadh m' asluchadh a' d' làthair : a réir d' fhocail teasairg mi.

3 Cuiridh mo bhilean 'an céill do chliu : 'n uair a theagaisgeas tu dhomh do reachdan.

4 Aithrisidh mo theangadh d' fhocal : oir is ceartas d' àitheantan uile.

5 Cuidicheadh do làmh leam : oir ròghnaich mi do reachdan.

6 Bha mi 'n geall air do shlàinte, a Thighearn' : agus is e do lagh mo thlachd.

7 Bitheadh m' anam beò, agus molaidh e thu : agus cuidicheadh do bhreitheanais leam.

8 Chaidh mi air seacharan mar chaora chailte : iarr d' òglach, oir cha do dhì-chuimhnich mi d' àitheantan.

URNUIGH MHAIDNE.

An cxx. Salm.

Ad Dominum.

A' M' éigin ghlaodh mi ris an Tighearn : agus dh' éisd e rium.

2 A Thighearna, saor m' anam o bhilibh nam breug : o'n teangaidh chealgaich.

3 Ciod a bheirear dhuit agus ciod a nithear ort, a theangadh chealgach : geur shaighde laoich, le éibhlibh de 'n aiteal.

4 Mo thruaighe mi, gu bheil mi air chuairt ann am Mesech : gu bheil mi a' m' chòmhnuidh ann am bùthaibh Chedair.

5 Is fada ghabh m' anam còmhnuidh leo-san : a thug fuath do shìth.

6 Tha mise air son sìth', ach 'n uair a labhras mi : tha iadsan air son cogaidh.

An cxxi. Salm.

Levavi oculos.

TOgaidh mi mo shùilean chum nam beann : o'n tig mo chabhair.

2 Thig mo chabhair o'n Tighearn : a rinn nèamh agus talamh.

3 Cha leig e le d' chois sleamhnachadh : cha tuit clò codail air d' fhear-coimhead.

4 Feuch, cha tuit clò codail no suain : air fear-coimhead Israeil.

5 Is e an Tighearn d'fhear-coimhead : is e an Tighearn do sgàile air do làimh dheis.

6 'S an la cha bhuail a' ghrian thu : no a' ghealach 's an oidhche.

7 Coimhididh an Tighearn thu o gach ole : coimhididh e d'anam.

8 Coimhididh an Tighearn do dhol a mach, agus do theachd a steach : o'n àm so eadhon gu bràth.

An cxxii. Salm.

Lectatus sum.

BHa aoibhneas orm an uair a thubhairt iad rium : Do thigh an Tighearna théid sinn.

2 Seasaidh ar cosan an taobh a stigh de d' gheatachaibh : O Ierusalem.

3 Tha Ierusalem air a togail mar chaithir : a tha air a coimheangal ri 'chéile.

4 D'an téid na treubhan a suas, treubhan an Tighearna : gu teistean Israeil, a thoirt buidh-eachais do Ainm an 'Tighearn'.

5 Oir an sin tha caithriche breitheanais air an suidheachadh : caithriche tighe Dhaibhidh.

6 Guidhibh-se air son sìth' Ierusalem : soirbhichidh iadsan leis an ionmhuinn thu.

7 Sìth gu robh an taobh a stigh de d' bhall-achaibh : suaimhneas a'd' lùchairtibh.

8 Air sgàth mo bhràithrean agus mo chàird-ean : their mi nis, Sìth gu robh an taobh a stigh dhìot.

9 Air sgàth tighe an Tighearn' ar Dé : iarraidh mi maith dhuit.

An cxxiii. Salm.

Ad te levavi oculos meos.

AD'ionnsuidh thog mi mo shùilean : O thusa a tha a' d' chòmhnuidh anns na nèamhan.

2 Feuch, mar tha sùilean òglach air làimh am maighstirean, agus mar tha sùilean banoglaich air làimh a bana-mhaighstir : mar sin tha ar sùile-ne air an Tighearn ar Dia, gus an dean e trècair oirnn.

3 Dean trècair oirnn, a Thighearna, dean trècair oirnn : oir tha sinn air ar lìonadh làn de tharcuis.

4 Lìonadh ar n-anam làn le fanoid luchd na seasgaireachd : le tarcuis nan uaibhreach.

An cxxiv. Salm.

Nisi quia Dominus.

MUr bitheadh an Tighearn leinn, abradh Israel a nis : mur bitheadh an Tighearn leinn, an uair a dh' éirich daoine 'n ar n-aghaidh ;

2 An sin shluigeadh iad beò sinn : an uair a las am fearg 'n ar n-aghaidh.

3 An sin thigeadh tuiltean uisgeacha thar-uinn : rachadh an sruth thar ar n-anam.

4 An sin rachadh na h-uisgeachan uaibhreach : thar ar n-anam.

5 Beannaichte gu robh an Tighearn: nach d'thug sinn mar chreich d'am fìaclaibh.

6 Chaidh ar n-anam as mar eun á ribe nan eunadair: bhriseadh an ribe, agus chaidh sinn as.

7. Tha ar cabhair ann an ainm an Tighearna: a rinn nèamh agus talamh.

An cxxv. Salm.

Qui confidunt.

BIthidh iadsan a dh'earbas as an Tighearn, mar shliabh Shioin: nach caruichear, ach a mhaireas gu sìorruidh.

2 Mar tha na beannta mu thimchioll Ierusalem: mar sin tha an Tighearn mu thimchioll a shluaigh, o'n àm so agus gu bràth.

3 Oir cha ghabh slat nan daoibh tàmh air crannchur nam firean: air eagal gu'n sìneadh na fireanan an làmhan chum euceirt.

4 Dean maith, a Thighearna: dhoibh-san a tha maith agus dhoibh-san a tha ionraic 'n an cridhe.

5 Ach iadsan a théid a thaobh d'an slighibh claona: iomainidh an Tighearn a mach le luchd-deanamh an uile; sìth gu robh air Israel.

URNUIGH FHEASGAIR.

An cxxvi. Salm.

In convertendo.

'N Uair a thug an Tighearn air ais braighdeanas Shioin: bha sinn mar dhaoine a chunnaic aisling.

2 An sin lìonadh ar beul le gàire: agus ar teangadh le luathghaire.

3 An sin thubhairt iad 'am measg nan cinn-each: rinn an Tighearn nithe mòra air an son.

4 Rinn an Tighearn nithe mòra air ar son-ne: bha sinn aoibhneach.

5 Pill a ris, a Thighearn', ar braighdeanas: mar shruthaibh 's an àirde deas.

6 Iadsan a chuireas sìol le deuraibh: buainidh iad le gairdeachas.

7 Esan a théid a mach, agus a ghuilcas, ag iomchar roghadh sìl: gu cinnteach thig e a ris le gairdeachas, ag iomchar a sguab.

An cxxvii. Salm.

Nisi Dominus.

MUr tòg an Tighearn an tigh: gu dìomhain saothraichidh a luchd-togail.

2 Mur gleidh an Tighearn am baile: gu dìomhain ni am fear-coimhid faire.

3 Is dìomhain dhuibh-se 'bhi 'g éirigh gu moch, a bhi 'suidhe gu h-anmoch, ag itheadh arain a' bhròin: 'n uair a bheir esan codal d'a sheir-cinn.

4 Feuch, is iad clann oighreachd an Tighearna: toradh na bronn a dhuais.

5 Mar shaighdibh ann an làimh gaisgich: mar sin tha mic na h-dìge.

6 Is sona am fear aig am bheil a bholg-saigh-ead làn diubh: cha bhi nàire orra 'n uair a labhras iad r'an naimhdibh anns a' gheata.

An cxxviii. Salm.

Beati omnes.

IS beannaichte gach neach air am bi eagal an Tighearn': a ghluaiseas 'n a shlighibh.

2 Oir ithidh tu toradh do làmh: sona bithidh tu, agus éiridh gu maith dhuit.

3 Bithidh do bhean mar fhìonain tharbhaich: ri taobhan do thighe.

4 Do chlan mar òg chroinn-olaidh: mu thimchioll do bhùird.

5 Feuch, mar so beannaichear an duine: air am bi eagal an Tighearna.

6 Beannaichidh an Tighearn thu á Sion: agus chi thu maith Ierusalem ré uile làithean do bheatha.

7 Seadh, chi thu clann do chloinne: agus sìth air Israel.

An cxxix. Salm.

Sæpe expugnauerunt.

IS minic a chràidh iad mi o m'òige: abradh Israel a nis.

2 Is minic a chràidh iad mi o m'òige: gidh-eadh cha d'thug iad buaidh orm.

3 Air mo dhruim threabh an luchd-treabhaidh: tharruing iad an sgrìoban fada.

4 Tha an Tighearn cothromach: ghearr e o 'chéile cuird nan aingidh.

5 Cuirear gu amhluidh agus pillear air an ais: iadsan uile le'm fuathach Sion.

6 Bithidh iad mar fheur air mullach thigh-ean: a sheargas mu'm fàs e suas.

7 Leis nach lion am buanaiche a ghlac: no fear-ceangail nan sguab a bhroilleach.

8 Ni mò their iadsan a bhitheas a' dol seachad riu, Beannachd an Tighearna gu robh oirbh: tha sinne 'g 'ur beannachadh ann an Ainm an Tighearna.

An cxxx. Salm.

De profundis.

O Na doimhneachdaibh ghlaodh mi riut, a Thighearna: a Thighearn', éisd ri m' ghuth.

2 Thugadh do chluasan an aire: do ghuth m'athchuingean.

3 Ma chomharaicheas tusa aingidheachd, a Thighearn': a Thighearn', cò sheasas?

4 Ach agad-sa tha maitheanas: agus uime sin bithidh eagal air daoibh romhad.

5 Tha mi a' feitheamh air an Tighearn, tha m'anam a' feitheamh: agus 'n a fhocal tha mo dhòigh.

6 Tha m'anam a' feitheamh air an Tighearn: na's mò na luchd-faire na maidne, seadh, na luchd-faire na maidne.

7 Earbadh Israel as an Tighearn, oir aig an Tighearn tha tròcair: agus aige-san tha mòr-shaorsa.

8 Agus saoraidh e Israel: o 'euccartaibh gu léir.

An cxxxi. Salm.

Domine, non est.

A Thighearna, cha-n'eil mo chridhe uaibh-reach: no mo shùilean àrd.

2 Agus cha do ghabh mi gnothuch ri nithibh mòra: no ri nithibh àrda air mo shon.

3 Gu deimhin shoeraich agus chùinich mi m'anam, mar leanabh a chuireadh o chèh a mhàthar: mar leanabh a chuireadh o'n chèh tha m'anam-sa.

4 Earbadh Israel as an Tighearn: o'n àm so agus gu bràth.

URNUIGH MHAIDNE.

An cxxxii. Salm.

Memento, Domine.

CUimhnich, a Thighearn', air Daibhidh: agus air 'uile àmhghar.

2 Mar a mhionnaich e do an Tighearn: a bhòidich e do Dhia treun Iacoib, ag ràdh,

3 Gu deimhin cha téid mi do phàillium mo thighe: cha téid mi suas air mo leabaidh;

4 Cha toir mi codal do m' shùilibh: no suain do m' rosgaibh,

5 Gus am faigh mi àite do an Tighearn: ionad-còmhnuidh do Dhia treun Iacoib.

6 Feuch, chuala sinn uime aig Ephratah: fhuair sinn e ann am machraichibh na coille.

7 Théid sinn a steach d'a phàilliuanaibh: sleuchdaidh sinn aig stòl a chois.

8 Eirich, a Thighearna, gu d' thàmh: thu féin agus àire do neirt.

9 Sgeadaichear do shagairt le ionracas: agus deanadh do naoimh luathghaire.

10 Air sgàth Dhaibhidh d'òglaich: na cuir air a h-ais aghaidh d'Aoin ungt.

11 Mhionnaich an Tighearn do Dhaibhidh ann am firinn: cha phill e uaith;

12 De thoradh do chuirp: suidhichidh mi air do rìgh-chaithir.

13 Ma choimhideas do chlann mo choimh-cheangal, agus mo theisteads a theagaisgeas mi dhoibh: suidhidh mar an ceudna an clann-san air do rìgh-chaithir gu bràth.

14 Oir ròghnaich an Tighearn Sion: mhiannaich e i mar ionad-còmhnuidh dha féin, ag ràdh,

15 Is i so mo shuaimhneas gu sìorruidh: an so gabhaidh mi còmhnuidh, oir mhiannaich mi i.

16 Beannaichidh mi gu mòr a lòn: sàsuichidh mi a bochdan le aran.

17 Eididh mi a sagairt le slàinte: agus ni a naoimh àrd luathghaire.

18 An sin bheir mi air adhaire Dhaibhidh fàs: dh'orduich mi lèchran do m' Aon ungt.

19 Eididh mi a naimhdean le nàire: ach air féin thig a choron fo bhlàth.

An cxxxiii. Salm.

Ecce, quam bonum.

FEuch cia maith agus cia taitneach an ni: do bhràithribh còmhnuidh a ghabhail cuideachd ann an aonachd.

2 Mar dheadh oladh-ungaidh air a' cheann, a' ruith sìos air an fheusaig: feusaig Aaroin, a' ruith sìos air iomall a thrusgain.

3 Mar dhealt air Hermon: a thuiteas air sléibhtibh Shioin.

4 Oir an sin dh'àithn an Tighearn am beannaichadh: beatha gu sìorruidh,

An cxxxiv. *Salm.**Ecce nunc.*

FEuch, beannaichibh an Tighearn : sibhse òglacha an Tighearna gu léir ;

2 A sheasas ann an tigh an Tighearna : gach oidhche.

3 Togaidh 'ur làmhan anns an ionad naomh : agus beannaichibh an Tighearn.

4 Beannaicheadh an Tighearn thu á Sion : a rinn nèamh agus talamh.

An cxxxv. *Salm.**Laudate Nomen.*

MOlaibh an Tighearn, molaibh Ainm an Tighearna : molaibh-se, òglacha an Tighearna.

2 Sibhse a sheasas ann an tigh an Tighearn' : ann an cùirtibh tìghe ar Dé,

3 Molaibh an Tighearn, oir tha an Tighearn maith : seinnibh cliu d'a Ainm, oir tha e taitneach.

4 Oir ròghnaich an Tighearn Iacob dha féin : Israel mar 'ionmhas sònruichte.

5 Oir tha fios agam gur mòr an Tighearn : agus gu bheil ar Tighearn os ceann nan uile dhia.

6 Ge b'e ni 'bu toil leis an Tighearn, rinn e air nèamh, agus air talamh : anns na cuaintibh, agus anns na doimhneachdaibh uile.

7 Is esan a bheir air a' cheò dol suas o chrìch na talmhainn : a ni dealanach le uisge, a bheir a mach a' ghaoth á 'ionadaibh-tasgaidh.

8 A bhuail ceud-ghin na h-Eiphit : araon duine agus ainmhidh.

9 A chuir comharaidhean agus iongantais ann ad mheadhon, O Eiphit : air Pharaoh, agus air 'òglachaibh gu léir ;

10 A bhuail cinnich mhòra : agus a mharbh rìghrean mòra ;

11 Sihon rìgh nan Amorach, agus Og rìgh Bhàsain : agus uile rìoghachda Chanaain ;

12 Agus a thug am fearann mar oighreachd : mar oighreachd do Israel a shluagh.

13 Mairidh d' Ainm-sa, a Thighearna, gu bràth : do chuimhne, a Thighearn', o linn gu linn.

14 Oir bheir an Tighearn breth air a shluagh : agus gabhaidh e aithreachas a thaobh a sheirbhiseach.

15 Is airgiod agus òr ìodhoil nan cinneach : obair làmhan dhaoine.

16 Tha beoil aca, ach cha labhair iad : sùilean aca, ach cha-n fhaic iad.

17 Tha cluasan aca, ach cha chluinn iad : ni mò a tha anail 'n am beul.

18 Cosmhuil riu féin tha iadsan a ni iad : gach neach a dh' earbas asda.

19 A thigh Israeil, beannaichibh an Tighearn : a thigh Aaroin, beannaichibh an Tighearn.

20 A thigh Lebhi, beannaichibh an Tighearn : sibhse air am bheil eagal an Tighearna, beannaichibh an Tighearn.

21 Beannaichte gu robh an Tighearn á Sion : aig am bheil a chòmhnuidh ann an Ierusalem. Molaibh-se an Tighearn,

URNUIGH FHEASGAIR.

An cxxxvi. Salm.

Confitemini.

O Thugaibh buidheachas do an Tighearn, oir tha e maith : oir gu bràth mairidh a thròcair.

2 Thugaibh buidheachas do Dhia nan dia : oir gu bràth mairidh a thròcair.

3 Thugaibh buidheachas do Thighearn nan tighearnan : oir gu bràth mairidh a thròcair.

4 Dhà-san 'n a aonar a ni iongantais mhòra : oir gu bràth mairidh a thròcair.

5 Dhà-san a rinn na nèamhan le gliocas : oir gu bràth mairidh a thròcair.

6 Dhà-san a shìn an talamh os ceann nan uisgeachan : oir gu bràth mairidh a thròcair.

7 Dhà-san a rinn soluis mhòra : oir gu bràth mairidh a thròcair ;

8 A' ghrian a riaghladh an là : oir gu bràth mairidh a thròcair ;

9 A' ghealach agus na reultan a riaghladh na h-oidhche : oir gu bràth mairidh a thròcair.

10 Dhà-san a bhuail na h-Eiphitich 'n an ceud-ghinibh : oir gu bràth mairidh a thròcair ;

11 Agus a thug a mach Israel as am meadhon : oir gu bràth mairidh a thròcair ;

12 Le làimh thréin agus le gairdean sìnte mach : oir gu bràth mairidh a thròcair.

13 Dhà-san a roinn a' mhuir ruadh 'n a roinnibh : oir gu bràth mairidh a thròcair ;

14 Agus a thug air Israel dol troimh a meadhon : oir gu bràth mairidh a thròcair.

15 Ach a thilg Pharaoh agus 'armailt bun os ceann anns a' mhuir ruaidh : oir gu bràth mairidh a thròcair.

16 Dhà-san a thredraich a shluagh troimh an fhàsach : oir gu bràth mairidh a thròcair.

17 Dhà-san a bhuail rìghrean mòra : oir gu bràth mairidh a thròcair ;

18 Agus a mharbh rìghrean treuna : oir gu bràth mairidh a thròcair ;

19 Sihon rìgh nan Amorach : oir gu bràth mairidh a thròcair ;

20 Agus Og rìgh Bhàsain : oir gu bràth mairidh a thròcair ;

21 Agus a thug am fearann mar oighreachd : oir gu bràth mairidh a thròcair ;

22 Mar oighreachd do Israel 'òglach féin : oir gu bràth mairidh a thròcair.

23 A chuimhnich oirnn 'n ar staid iosail : oir gu bràth mairidh a thròcair ;

24 Agus a shaor sinn o ar naimhdibh : oir gu bràth mairidh a thròcair.

25 A tha 'tabhairt bìdh do gach feòil : oir gu bràth mairidh a thròcair.

26 O thugaibh buidheachas do Dhia nan nèamh ; oir gu bràth mairidh a thròcair.

An cxxxvii. Salm.

Super flumina.

L Aimh ri aimhnichibh Bhabiloin, an sin shuidh agus ghuil sinn : an uair a chuimhnich sinn air Sion.

2 Air na crannaibh seilich 'n a meadhon chroch sinn ar clàrsaichean.

3 Oir an sin dh'iarr iadsan a thug ann am braighdeanas sinn, òran oirnn, agus dh'iarr iadsan a rinn fògaraich dhinn aoibhneas oirnn, ag ràdh : Seinnibh dhuinn aon de laoidhean Shioin.

4 Cionnus a sheinneas sinne laoidh an Tigh-earn' : ann an tìr choimhich ?

5 Ma dhì-chuimhnicheas mise thusa, a Ierusalem : dì-chuimhnicheadh mo làmh dheas a seòltachd.

6 Leanadh mo theangadh ri m' ghiall, mur cuimhnic mi ort : mur fearr leam Ierusalem na m'aoibhneas a's àirde.

7 Cuimhnic, a Thighearna, air clann Edoim, ann an là Ierusalem : a thubhairt, Leagaibh, leagaibh sìos i, gu ruig a bunait.

8 A nighean Bhabiloin, a lom-sgriosar : is sona esan a dhìolas dhuit-sa a réir mar a rinn thu oirne.

9 Is sona esan a ghlacas : agus a phronnas do chlànn bheag ris na clachailbh.

An cxxxviii. Salm.

Confitebor tibi.

MOlaidh mi thu, a Thighearna, le m'uile chridhe : 'an làthair nan dia seinnidh mi cliu dhuit.

2 Sleuchdaidh mi aig do theampull naomh, agus molaidh mi d'Ainm, air son do chaoimhneis-gràidh agus air son d'fhìrinn : oir dh'àrd-aich thu d'fhocal os ceann d'Ainme uile.

3 'S an là air an do ghlaodh mi riut fhreag-air thu mi : neartaich thu mi a'm' anam le trèid.

4 Molaidh uile rìghrean na talmhainn thu, a Thighearna : 'n uair a chluinneas iad briathran do bheicil.

5 Agus seinnidh iad ann an slighibh an Tigh-earn' : oir is mòr glòir an Tighearna.

6 Ge h-àrd an Tighearna, gidheadh seallaidh e air an iriosal : ach aithnichidh e an t-uaibhreach fad as.

7 Ged ghluais mi ann am meadhon àmhghair, ath-bheothaichidh tu mi : an aghaidh corruich mo naimhde sìnidh tu do làmh, agus saoraidh do dheas làmh mi.

8 Coimhionaidh an Tighearna air mo shon : mairidh do thròcair, a Thighearna, gu bràth ; na tréig oibre do làmh.

URNUIGH MHAIDNE.

An cxxxix. Salm.

Domine probasti.

A Thighearna, rannsaich thu mi, agus is aithne dhuit mi : is aithne dhuit mo shuidhe, agus m'éirigh, tuigidh tu mo smuaintean fad as.

2 Chuairtich thu mo cheum, agus mo luidhe sìos : agus air mo shlighibh gu léir is fiosrach thu.

3 Oir feuch, cha-n'éil focal air mo theangaidh : a Thighearna, nach aithne dhuit gu léir.

4 'Am dhéigh agus romham chuairtich thu mi : agus chuir thu do làmh orm.

5 Is ro iongantach an t-eòlas so air mo shon, tha e àrd : cha ruig mi air.

6 C'àit an téid mi o d' Spiorad : agus c'àit an teich mi o d' ghnùis ?

7 Ma théid mi suas do nèamh, tha thu 'n sin : ma ni mi mo leabadh ann an ifrinn, feuch, tha thu'n sin.

8 Ma ghabhas mi sgiathan na maidne : agus gu'n còmhnuich mi ann an ionadaibh iomallach na faire ;

9 Eadhon an sin stiùraidh do làmh mi : agus cumaidh do dheas làmh mi.

10 Ma their mi, Gu deimhin folaichidh an dorchadas mi : bithidh an oidheche féin mar sholus mu'n cuairt orm.

11 Cha-n fholaich eadhon an dorchadas uait-sa, ach dealraichidh an oidheche mar an là : is ionann an dorchadas agus an solus duit-sa.

12 Oir ghabh thu sealbh air m'àirnibh : dh'fholaich thu mi ann am broinn mo mhàthar.

13 Molaidh mi thu, oir is uamhasach, iongantach a dhealbhadh mi : is iongantach d'oibre-sa, agus is ro fhiosrach m'anam air sin.

14 Cha d'fholaicheadh mo chorp uait : an uair a rinneadh mi 'an dìomhaireachd, a dhealbhadh mi gu h-iongantach ann an ionadaibh ìochdarach na talmhainn.

15 Chunnaic do shùilean mo cheud-fhàs anab-uich : agus ann ad leabhar sgrìobhadh sìos mo bhuill uile ;

16 A dhealbhadh ri ùine : gun aon diubh fathast ann.

17 O cia luachmhor leam-sa do smuaintesa, a Dhé : cia mòr an àireamh !

18 Nan àirmhinn iad, is lìonmhoire iad na a' ghaineamh : 'n uair a dhùisgeas mi, tha mi a ghnàth maille riut-sa.

19 Gu cinnteach, a Dhé, marbhaidh tusa an

t-aingidh : uime sin a dhaoine fuileachdach imichibh uam.

20 Oir labhair iad a'd' aghaidh gu h-aingidh : thug do naimhde d'Aium ann an dìomhanas.

21 Nach 'eil mi 'toirt fuath, a Thighearna, dhoibh-san a tha 'toirt fuath dhuit-sa : agus nach 'eil mi 'gabhail gràin dhiubh-san a tha 'g éirigh suas a'd' aghaidh ?

22 Le fuath iomlan tha mi 'toirt fuath dhoibh : mar naimhde measam iad.

23 Rannsaich mi, a Dhé, agus aithnich mo chridhe : dearbh mi, agus tuig mo smuaintean.

24 Agus amhaire am bheil slighe olc air bith annam : agus tredraich mi anns an t-slighe shìorruidh.

An cxi. Salm.

Eripe me, Domine.

TEasaig mi, a Thighearn', o'n droch dhuine : o fhear an fhèirneirt gleidh mi.

2 A tha 'smuaineachadh aimhleis 'n an cridhe : cruinnichidh iad gach là chum cogaidh.

3 Gheuraich iad an teangadh, mar theangaidh nathrach : tha nimh na nathrach fo'm bilibh.

4 Gleidh mi, a Thighearn', o làmhan nan aingidh : o fhear an fhèirneirt dìon mi, le'm b'àill mo cheuman a thilgeadh bun os ceann.

5 Dh'fholaich na h-uairibh riibe dhomh, agus cuird, sgaoil iad lìon ri taobh na slighe : leag iad ceapa-tuislidh dhomh.

6 Thubhairt mi ris an Tighearn, Is tu mo Dhia : éisd, a Thighearna, ri guth m'ath-chuingean.

7 A Iehobhah, a Thighearna, neart mo shlàinte : dh'fholaich thu mo cheann ann an là a' chatha.

8 Na dednaich, a Thighearna, miannan an aingidh : na soirbhich le 'ais-innleachd, air eagal gu'n àrdaich iad iad féin.

9 A thaobh nan daoine a chuairtich mi : còmhdaicheadh aimhleas am bilean féin iad.

10 Tuiteadh éibhlean teine orra : 's an teine tilgear iad, ann an slochdaibh domhain, chum nach éirich iad a ris.

11 Na daingnichear fear-labhairt uile air an talamh : sealgaidh ole air fear an fhòirneirt chum a sgrios.

12 Tha fhios agam gu'n cum an Tighearn ceartas ris an duine through : còir ris na bochdaibh.

13 Gu dearbh bheir na fireana moladh do d'Ainm : gabhaidh na h-ionracain còmhnuidh a'd' fhianuis.

An cxli. Salm.

Domine, clamavi.

A Thighearna, tha mi ag éigheach riut, greas a m' ionnsuidh : éisd ri m' ghuth, 'n uair a dh'éigheas mi riut.

2 Cuirear m'urnuigh a'd' làthair mar thùis : togail suas mo làmh mar an ìobairt-fheasgair.

3 Cuir, a Thighearna, faire air mo bheul : gleidh dorus mo bhilean.

4 Na h-aom mo chridhe gu ni ole air bith : gu beartan aingidh a chur 'an gnìomh le luchd-deanamh na h-euceirt, agus na h-itheam féin d'an nithibh milis.

5 Buailleadh am firean mi, is caoimheas e : agus cronaicheadh e mi.

6 Is oladh luachmhor e, nach bris mo cheann : oir fathast bithidh m'urnuigh mar an ceudna air an son 'n an àmhghairibh.

7 'N uair a thilgear sìos am breitheamhnan ann an ionadaibh clachach : éisdidh iad ri m' bhriathraibh, oir tha iad milis.

8 Mar a ghearras agus a sgoilteas neach fiodh air an làr : sgaoileadh ar cnàmhan aig beul na h-uaigne.

9 Ach riut-sa, a Iehobhah, a Thighearna, tha mo shùilean : annad-sa chuir mi mo dhòigh, na tréig m'anam.

10 Coimhid mi o'n ribe a leag iad dhomh : agus o cheapaibh-tuislidh luchd-deanamh na h-euceirt.

11 Tuiteadh na h-aingidh 'n an liontaibh féin : am feadh a bhitheas mise a' gabhail thairis.

URNUIGH FHEASGAIR.

An cxlii. Salm.

Voce mea ad Dominum.

LE m' ghuth ghlaodh mi ris an Tighearn : le m' ghuth dh'asluich mi air an Tighearn.

2 Thaom mi mo ghearan 'n a làthair : chuir mi 'n céill mo theinn 'n a fhianuis.

3 'N uair a chlaoidheadh mo spiorad annam, b'aithne dhuit-sa mo cheum : 's an t-slighe air an d'imich mi dh'fholaich iad ribe dhomh.

4 Dh'amhaire mi air mo làimh dheis : agus feuch, cha robh fear ann d'am b'aithne mi.

5 Thréig cabhair mi : cha robh neach ann a dh'fhèdraicheadh air son m'anama.

6 Ghlaodh mi riut, a Thighearna, thubhairt mi : Is tu mo thearmunn, mo chuibrionn ann an tìr nam bèd.

7 Thoir an aire do m' ghlaodh : oir dh'ìslich-eadh mi gu mòr.

8 Saor mi uatha-san a tha'n tòir orm : oir is treise iad na mi.

9 Thoir m'anam á prìosan, chum gu mol mi d'Ainm : cuairtichidh na fireana mi, oir buinidh tu gu fial rium.

An cxliii. Salm.

Domine, exaudi.

CLuinn m'urnuigh, a Thighearn', éisd ri m'athchuingibh ann ad fhìrinn : freag-air mi ann ad cheartas.

2 Agus na tig ann am breitheanas le d'òglach : oir ann ad fhianuis cha-n fhìreanaichear duine bèd air bith.

3 Oir gheur-lean an nàmhaid m'anam, bhuaile mo bheatha sìos gu làr : thug e orm còmh-nuidh a ghabhail ann an dorchadas, mar iadsan a bha fada marbh.

4 Uime sin chlaoidheadh mo spiorad annam : tha mo chridhe briste an taobh a stigh dhìom.

5 Is cuimhne leam na làithean o chian, tha do ghnìomhara gu léir a' teachd a'm' aire : tha mi a' beachd-smuaineachadh air obair do làmh.

6 Shìn mi mo làmhan riut-sa : tha m'anam mar thalamh tartmhor 'an geall ort.

7 Eisd rium gu grad, a Thighearna, chaidh as do m' spiorad : na folaich do ghnùis orm, air eagal gu'm bi mi cosmhuil riu-san a théid sìos do'n t-slochd.

8 Thoir orm do chaoimhneas-gràidh a chluinntinn anns a' mhaduinn, oir annad-sa chuir mi mo dhòigh : thoir orm gu'n aithnich mi an t-slighe anns an còir dhomh imeachd, oir riut-sa tha mi 'togail suas m'anama.

9 Teasaig mi o m' naimhdibh, a Thighearn' : a d'ionnsuidh-sa teichidh mi.

10 Teagaisg dhómh do thoil a dheanamh, oir is tu mo Dhia : treðraicheadh do Spiorad maith mi gu tìr an ionracais.

11 Air sgàth d'Ainme, a Thighearna, beothaich thusa mi : trid d' fhìreantachd saor m'anam o theinn.

12 Agus trid do thròcair gearr as mo naimhd-eàn : agus sgrìos iadsan uile a tha 'claoidh m'anama, oir is mi d'òglach.

URNUIGH MHAIDNE.

An cxliv. Salm.

Benedictus Dominus.

BEannaichte gu robh an Tighearn mo charraig : a theagaisgeas mo làmhan gu cath, mo mheoir gu comhrag ;

2 Mo mhaith agus mo dhaingneach, mo thùr àrd agus m'fhear-saoraidh-sa, mo sgiath, agus an tì as an earb mi : a cheannsaicheas mo shluagh fodham.

3 A Thighearna, ciod e an duine, gu bheil thu a' gabhail eòlais air : mac an duine, gu bheil meas agad air ?

4 Is cosmhuil an duine ri dìomhanas : tha a làithean mar sgàile a ghabhas seachad.

5 A Thighearna, lùb do fhlaitheasan, agus thig a nuas : bean ris na beanntaibh, agus bithidh deatach dhiubh.

6 Cuir a mach dealanach agus sgaoil iad : tilg do shaighdean agus claidh iad.

7 Sin uait do làmh o'n àirde : saor mi, agus teasaig mi o uisgeachaibh mòra, a làimh cloinne choigreach ;

8 Aig am bheil am beul a' labhairt dìomhanais : agus is i'n deas làmh deas làmh na bréige.

9 A Dhé, seinnidh mi dhuit òran nuadh air an t-saltair : air inneal-ciuil nan deich teud, seinnidh mi moladh dhuit.

10 Is esan a bheir buaidh do rìghribh : a shaoras Daibhidh 'òglach féin o'n chladheamh mhilleach.

11 Saor mi, agus teasaig mi o làimh cloinne choigreach : aig am bheil am beul a' labhairt dìomhanais, agus is i'n deas làmh deas làmh na bréige.

12 Chum gu'm bi ar mic mar ùr-chroinn a' fàs suas 'n an òige : ar nigheana mar chlach-aibh oisinn, snàidhte a réir coslais lùchairt.

13 Chum gu'm bi ar saibhlean làn, a' toirt uatha de gach gnè thoraidh : ar caoraich a' breth 'n am mìltean, seadh deich mìltean 'n ar macharaibh.

14 Gu'm bi ar daimh làidir gu obair, nach

bi briseadh a steach ann : no dol a mach, agus nach bi gearan 'n ar sràidibh.

15 Is sona an sluagh, a tha 's an staid so : is sona an sluagh d'an Dia an Tighearn.

An cxlv. Salm.

Exaltabo te.

A Rdaichidh mi thu, mo Dhia, mo Rìgh : agus beannaichidh mi d'Ainm gu saoghal nan saoghal.

2 Gach là beannaichidh mi thu : agus molaidh mi d'Ainm gu saoghal nan saoghal.

3 Is mòr an Tighearn, agus is ro airidh e air moladh : agus cha-n fheudar a mhòrachd a rannsachadh.

4 Molaidh àl do àl do ghnìomharan : agus cuiridh iad 'an céill d' oibre cumhachdach.

5 Air urram glòire do mhòrachd : agus air d' oibrìbh iongantach labhraidh mi.

6 Agus labhraidh daoine air neart do bheartan uamhasach : agus aithrisidh mise do mhòrachd.

7 Cuiridh iad 'an céill gu pailt cuimhne do mhaitheis mhòir : agus àrd-mholaidh iad d' fhèrantachd.

8 Is gràs-mhor agus truacanta an Tighearn : mall chum feirge, agus pailt ann an tràcair.

9 Is maith an Tighearn do na h-uile : agus tha a chaomh-thròcairean os ceann 'oibre uile.

10 Molaidh d' oibre gu léir thu, a Thighearn' : agus beannaichidh do naoimh thu.

11 Air glòir do rìoghachd labhraidh iad : agus cuiridh iad 'an céill do chumhachd ;

12 Chum a bheartan iongantach a dheanamh

aithnichte do chloinn nan daoine : agus glòir mòralachd a rìoghachd.

13 Is rìoghachd shìorruidh do rìoghachd-sa ; agus mairidh d' uachdaranachd air feadh nan uile ghinealach.

14 Tha an Tighearn frinneach 'n a uile bhriathraibh ; agus naomh 'n a uile ghnìomharaibh.

15 Cumaidh an Tighearn suas iadsan uile a tha 'tuiteam : agus togaidh e 'n àird iadsan uile a tha air cromadh sìos.

16 Tha sùilean nan uile a' feitheamh ort : agus bheir thu dhoibh am biadh 'n a thràth.

17 Tha thu a' fosgladh do làimhe : agus a' sàsuchadh miann gach nì beò.

18 Tha an Tighearn ceart 'n a uile shlighibh : agus naomh 'n a uile ghnìomharaibh.

19 Is dlùth an Tighearn dhoibh-san uile a ghairmeas air : dhoibh-san uile a ghairmeas air ann am firinn.

20 Coimhlionaidh e miann na dream d'an eagal e : agus éisdidh e r'an glaodh, agus saoraidh e iad.

21 Gleidhidh an Tighearn iadsan uile a ghràdhaicheas e : ach sgriosaidh e na h-aingidh gu léir.

22 Air cliu an Tighearna labhraidh mo bheul : agus beannaichidh gach fèdìl 'Ainm naomh-san gu saoghal nan saoghal.

An cxlvi. *Salm.*

Lauda, anima mea.

MOlaibh-se an Tighearn. Mol an Tighearn, O m'anam, molaidh mi an Tighearn

an cian is beò mì: seinnidh mi cliu do m' Dhia, am feadh a bhitheas bith agam.

2 Na h-earbaibh á uachdarain, á mac duine sam bith : anns nach 'eil furtachd.

3 Thèid 'anail as, pillidh e g'a ùir : 's an là sin féin thèid as d'a smuaintibh.

4 Is sona an tì aig am bheil Dia Iacoib mar a chabhair ; aig am bheil a dhòchas anns an Tighearn a Dhia.

5 A rinn nèamh agus talamh, a' mhuir agus gach nì a tha annta: a ghleidheas firinn gu bràth.

6 A chumas còir riu-san a tha fo fhòirneart : a bheir biadh do na h-ocraich.

7 Cuiridh an Tighearn na prìosanaich fa sgaoil : fosgailidh an Tighearn sùilean nan dall.

8 Togaidh an Tighearn suas iadsan a tha air an cromadh sìos: is ionmhuinn leis an Tighearn na fireana.

9 Gleidhidh an Tighearn na coigrich, togaidh e suas an dilleachdan agus a' bhantrach : ach tilgidh e slighe nan aingidh bun os ceann.

10 Rìoghaichidh an Tighearn gu bràth, do Dhia-sa, a Shìon : o linn gu linn. Molaibh-se an Tighearn.

URNUIGH FHEASGAIR.

An cxlvii. *Salm.*

Laudate Dominum.

MOlaibh-se an Tighearn, oir is maith an nì a bhi 'tabhairt cliu d'ar Dia : oir tha e taitneach, agus tha moladh ciatach.

2 Togaidh an Tighearn suas Ierusalem : cruinnichidh e ri 'chéile dìobaraich Israeil.

3 Leighisidh e iadsan aig am bheil cridhe briste : agus ceanglaidh e suas an leòntan.

4 Innsidh e àireamh nan reul : bheir e ainmean orra uile.

5 Is mòr ar Tighearn, agus is mòr a chumhachd : tha a thuigse gun tomhas.

6 Togaidh an Tighearn suas na daoine ciuine : tilgidh e sìos na h-aingidh gu làr.

7 Seinnibh do'n Tighearn le buidheachas : seinnibh moladh d'ar Dia-ne air a' chlàrsaich.

8 A dh' fholaicheas nèamh le neulaibh, a dh' ulluicheas uisge do'n talamh : a bheir air feur fàs air na sléibhtibh.

9 Bheir esan a bhiadh do'n ainmhidh : do na fithich òga a ghoireas.

10 Ann an neart an eich cha bhi a dhùil : ann an cosaibh fir cha ghabh e tlachd.

11 Gabhaidh an Tighearn tlachd annta-san d'an eagal e : a chuireas an dòigh 'n a thròcair.

12 Mol an Tighearn, a Ierusalem : mol do Dhia, a Shion.

13 Oir neartaich e croinn do gheatacha : bheannaich e do chlann an taobh a stigh dhìot.

14 Ni e sìth a'd' chrìochaibh : sàsuichidh e thu le smior a' chruithneachd.

15 Cuiridh e mach 'àithne air thalamh ; gu luath ruithidh 'fhocal.

16 Bheir e sneachd mar olainn : sgaoilidh e an liath-reodhadh mar luathre.

17 Tilgidh e mach 'eigh mar ghreamanna : cò dh' fheudas seasamh fa chomhair 'fhuachda ?

18 Cuiridh e mach 'fhocal, agus leaghaidh

e iad : séididh a ghaoth, sruthaidh na h-uisge eacha.

19 Foillsichidh e 'fhocal do Iacob : a reachd-an agus a bhreitheanais do Israel.

20 Cha do bhuin e mar so ri cinneach sam bith : cha mhò a b'aithe dhoibh a bhreitheanais. Molaibh-se an Tighearn.

An cxlviii. Salm.

Laudate Dominum.

MOlaibh-se an Tighearn. Molaibh an Tighearn o na nèamhan : molaibh e anns na h-àrdaibh.

2 Molaibh e, 'aingle uile : molaibh e, a shlàigh uile.

3 Molaibh e, a ghrian agus a ghealach : molaibh e, uile reulta soluis.

4 Molaibh e, a nèamha nan nèamh : agus uisgeachan a tha os ceann nan nèamh.

5 Moladh iad Ainm an Tighearn' : oir dh' àithn e, agus chruthaichidh iad.

6 Agus dhaingnich e iad gu saoghal nan saoghal : rinn e àithne, nach téid thairis.

7 Molaibh an Tighearn o'n talamh : a dhràgona agus a dhoimhneachdan uile ;

8 Teine agus clach-shneachd, sneachd agus ceò : gaoth dhoinionnach, a' coimhlionadh 'fhocail.

9 Na beanntan agus na cnuic uile : craobhan-meas agus na h-uile sheudair ;

10 Fiadh-bheathaichean agus gach uile ainmhidh ; nithe snàigeach agus eunlaith iteagach ;

11 Rìghrean na talmhainn agus na h-uile

shlòigh ; uachdarain agus uile bhreitheamh-
na na talmhainn ;

12 Araon òig-fhir agus òighean, seann daoine
agus clann, moladh iad sin Ainm an Tighearn' :
oir tha 'Ainm-san a mhàin urramach, tha a
ghlòir os ceann na talmhainn agus nan nèamh.

13 Agus dh'ardaich e adharc a shluaigh,
moladh a naomh uile : eadhon cloinn Israeil,
sluaigh a tha am fagus da. Molaibh-se an Tigh-
earn.

An cxlix. Salm.

Cantate Domino.

MOlaibh-se an Tighearn. Seinnibh do'n
Tighearn òran nuadh : seinnibh a
mholadh ann an coimhthional nan naomh.

2 Bitheadh Israel aoibhneach 'n a Chruith-
fhear : deanadh clann Shioin gairdeachas 'n an
Rìgh.

3 Moladh iad 'Ainm anns an dannsadh : le
tiompan agus le clàrsaich seinneadh iad dha.

4 Oir gabhaidh an Tighearn tlachd 'n a
shluagh : nì e na daoine sèimhe sgiamhach le
slàinte.

5 Deanadh na naoimh gairdeachas ann an
glòir : deanadh iad iolach air an leapaichibh.

6 Bitheadh àrd-chliu Dhé 'n am beul : agus
claidheamh dà fhaobhair 'n an làimh ;

7 A chum dìoghaltas a dheanamh air na
cinnich : smachdachadh goirt air na slòigh ;

8 A chum an rìghrean a cheangal le slabh-
raidhibh : agus an àrd uaislean le geimhlibh
iaruinn.

9 A chum am breitheanas a tha 'sgrìobhta a
'chur 'an gnìomh orra : Tha 'n t-urram so aig a
naoimh uile. Molaibh-se an Tighearn.

An cl. Salm.

Laudate Dominum.

MOlaibh-se an Tighearn. Molaibh Dia 'n a
ionad naomh : molaibh e ann an speur-
aibh a chumhachd.

2 Molaibh e air son a ghnìomhara treuna :
molaibh e a réir àirde a mhòrachd.

3 Molaibh e le fuaim trompaid : molaibh e le
saltair agus le clàrsaich.

4 Molaibh e le tiompan agus dannsadh :
molaibh e le innealaibh-ciuil nan teud agus le
organ.

5 Molaibh e le ciombalaibh fonumhor : mol-
aibh e le ciombalaibh àrd-fhuaimneach.

6 Moladh gach nì anns am bheil anail an
Tighearn : Molaibh-se an Tighearn.